

Aposel

Yesuyen Mere Basan Marte Meten

¹ Be, Tiofilus, nebe Yesu megen gar hinhinya daha mat meten ten hinhin, irde al saba yirde hinhin goyen hanƙapya gogo kan gunmirin. ² Irde kamyinde mat huwarde komatmin yingen basina yiryin mar goyen Holi Spirityen tarende hulyan yiryin gote baranya Al Kurun belen tumulgan tike hurkurin goyen gote baranya manan asan goyenter kamirin.

Yesu belen Holi Spirit nin doyan henayin yen mere basan marmen yinyin

³ Be, Yesube nurde hayen gwahade goyen po, al belen mayke ulin misin kurun katen kamyinde mat huwaryin. Irdeb, “Gwaha timekeb nenen fufinde huwarun gago yen nurnayin,” yenbe komatmin yago dilinde forok yen mere yirde hike dilinde wor po kenen hinhan. Be, kamyinde mat huwardeb nanƙahal 40 gayen megen gar hinhinya goyenbe Al Kurun belen al doyan yird yird mata nin komatmin yago goyen mere yirde saba yirde hinhin. ⁴⁻⁵ Be, go ten hinhinya goya goyen po komatminya gabu hen dula ten henyabe gaha yinyin: “Adone belen det dunen yen bina tiyyin goke momon dirde hinhem gobe Holi Spirityen baptais. Ningeb goke doyan hen hinayin. Yonbe fe belen baptais yirde hinhin gega, denbe hitnen tenbe Al Kurun belen Holi Spirit po baptais

diryen. Niŋgeb goke teŋbe aran ma Yerusalem tubul teŋ kunayin,” yinyin.

⁶ Be, Yesuyen komatmin yago beŋ mere go nurde kamereb Yesuya Olip dondonde gabu irdeb, “Doyan Al Kurun, bikken asininin yago beŋ neŋ Israel mar doyan dirde hinhan gwahade goyen gayenter ge beŋ wor kuruninin heŋ doyan dirke igin megeninin neŋ Israel mar beŋ tumulgan titek we?” yeŋ gusunan iramin.

⁷ Irkeb wol heŋbe gaha yinyin: “Nanne beŋ mata forok yenayin yeŋ sanjinminde nalu yirtin gobe dufayminde po yirtin geb deŋ beŋ nurtek mon. ⁸ Gega deŋ nurtek detbe gago momon direŋ tihim. Holi Spirit deŋ hitte katke tareŋmin teŋbe alya bereya Yerusalem taunde ninya Yudia nanare ninya Samaria nanare ninyabe megen kurun gayen bana nin mar ne beŋ mataya mereya teŋ himeke neneŋ hinhan goke tagalde tukun hinayin,” yinyin.

*Yesube Al Kurun hitte mulgan heŋ hurkurin
(Mak 16:19-20; Luk 24:50-53)*

⁹ Be, mere tiyyin go kamereb komatmin beŋ dilinde wor po keneŋ hikeya Al Kurun beŋ tumulgan tike hurkurin. Irkeb gagap beŋ bana kerkeb go ma kenamin. ¹⁰ Irdeb dilinbe Yesu hurkurin beŋ gon po nankenen hinhan. Irkeb al irawa amil faykekde umna titin gore gor kura mat wayhar minmon, bemel po ketalminde forok yeŋ huwardebe, ¹¹ “Mel, Galili mar, danin nankinde nankenen diltin misin teŋ han? Yesube diltin mar Al Kurun beŋ tumulgan tike hurka kenhan

al goyen kamebe gwahade go po mulgañ heñ wayyen,” yinaryum.

Matias belej Yudasyen gasuñ tirin

¹² Be, go kamereb Yesu komatmin yago gobe Olip dondon go tubul tenbe Yerusalem taunde mulgañ hamin. Olip dondonde mat Yerusalembe 1 kilomita gwahade. ¹³ Be, mel go Yerusalem forok yenbe ya yen hinhande gor kwamin. Ya goyenbe al heñ heñ gasuñbe irawa hende bande ningeb, yenbe hende hinhan. Be, mel gobe hinhande gor hurkamin. Go mar gobe Pita, Yon, Yems, Andru, Filip, Tomas, Batolomiyu, Matiyu, Alfius urmin Yems, Yems urmin Yudasyabe Saimonya. Saimon gobe Roma gabman asogo irde hinhan mar Selot buda goyen bana nin al. ¹⁴ Be, mel go huginen gabu irde dufaymin unkuñ po irde Al Kurun mere irde hinhan. Bere buda Yesu gama irde hinhan goya Yesu kulin wenya milin Mariaya manañ bana gon tumnan heñ Al Kurun mere irde hinhan.

¹⁵ Be, ¹²⁰ al gwahade Yesu nin dufaymin taren iramin mar goyen Pitaya huginen gabu irde hinhan. Be, wawun kurareb Pita belej huwarde gaha yinyin: ¹⁶⁻¹⁷ “Be, kadne yago, nebe Iskariot nin al Yudas nin yewen tihim. Yenbe Yesu belej basaña irde meten unyin. Irke nenya tumnan meten ten hinhet. Gega yen belej Yesu maytek mar goyen belej kerde yunke kun Yesu tamin. Ningeb al gore mata bulun gwahade tiyyen yen bikken Holi Spirit belej Dewit dufay unke mere Al Kurunyen asande katin gobe gayenter fudinde gwahade po forok yiyun,” yinyin.

18 (Be, Yudas mata bulun tiyyin gote hora belenbe megen tapum kura damu tiyamin. Irdeb megen goyenterbe yingen timiyyin. Irkeb bin pol yeke araynen fur tiyamin. 19 Irkeb al buda kurun Yerusalem hinhan gore mere momonmin nurdeb naña tapum gobe Akeldama inamin. Akeldama gote minbe ‘dari wok yitin’.)

20 Be, Pita belen sopte gaha yinyin: “Al goyen goke Al Kurunyen Tikin Asandebe gahade katin hi:

‘Yende tiyunbe bulun hen dulnen hiyen. Al kura gor ma po hiyen,’ yitin. *Tikin 69:25*

Irde Tikin Asande gor kurabe mere gahade manan kayin:

‘Yen wolminenbe al hoyan kura gasunmin go ten meten tiyyen,’ yitin. *Tikin 109:8*

21-22 Niñgeb katin gwahade goyen po gama irtek yenbe al kura Yon belen baptais nin mere tagalde hinhide mat kun kun Al Kurun belen Yesu tumulgan tike kinyin al goyen tenbe Yudasyen gasun wol kertek. Al gobe nenya tumnan Yesu gama irde kun wan ten hinhet al gore gab nenya henbe Yesuyen mere basan al hen Yesube fudinde huwarun yen tagalde tukun hiyen,” yirin.

23 Be, gwaha yinenbe gabu iramin bana gon nin al irawa denye yuramin. Matiasyabe Yosepya. Yosep gote denyabe irawa. Kurabe Basabas, munan kurabe Yastus inen hinhan. 24-25 Go kamereb Al Kurun gahade mere iramin: “Doyan Al Kurun, Yudasbe Yesuyen mere basan al hinhin gega, meten go tubul ten kamdebe nebe gor nin yenbe gor po kun. Niñgeb al kura yende gasun ten Yesuyen mere basan al hewon yen nurde hite.

Gebe al kurun gate dufayminya binya kenkela yenej ha geb, al irawa gayen ganunbe meten go tiyyen yen basin irarin goyen dikala dirayin,” inen gusunon iramin. ²⁶ Gwaha inenbe irem gote denem kanbe Yuda marte matare tilin tanaramin. Irkeb Matias denemde huwaryin. Irkeb gor hinhan mar gore Matiasbe Yesuyen mere basan al hihi yen nuramin. Irkeb al 11 hinhan goyen 12 hamin.

2

Pentekos nalure Holi Spirit katyin

¹ Be, Yuda marte gabu nalu kura Pentekos yen hanjen goyen forok yekeb Yesuyen mere basan mar aposel budaya Yesu nin dufaymin tarej irde hinhan mar tumnon 120 gobe gasun unkennde po gabu iramin. ² Gwaha ten hikeyab bemel po mene kurun migirin yara kura nankinde mat forok yeke nuramin. Irkeb migirin gore po katenbe ya bin mel go hinhande goyen ep irde tukurin. ³ Irkeb koton kan nankenamin. Irdeb det kura kak melak yara gore yen hitte po katenbe bur yen kun al tonan heren keperde tukurin. ⁴ Irkeb Holi Spirit belen hard yunkeb almet mere kurayen kurayen yen go ma nurde hitin kurun goyen gwaha mat mere titin ala tiyamin.

⁵ Be, Yerusalem gorbe Pentekos nalu kurun goke tenbe Yuda mar nana kurar kurar hen Al Kurun dolon irde hanjen mar goyen wan gor hinhan. ⁶ Be, Yesuyen mere basan mar aposel buda hinhande gor migirin go nurdeb al buda kurun gore yinnin yen wayamin. Irdeb aposel

budaya Yesu niŋ dufaymiŋ tareŋ irde hinhan marya gore mere kurayen kurayen mat tikeb mel goreb merem mat merem mat nurdeb dinon kok yeŋ tulfut yamiŋ. ⁷ Irdeb dufaymiŋ titmiŋ hekeb gaha yamiŋ: “Ey! Mel gab tumŋaŋ Galili mar. ⁸ Gega dahade niŋgeb mereniniŋ nende gigen yeke nindikeŋ nurhet? ⁹ Irdeb neŋbe naŋa hoyande niŋ hoyande niŋ. Neŋ kurabe Partia naŋare niŋ, kurabe Midia niŋ, munan kurabe Elam naŋare niŋ, kurabe Mesopotemia niŋ, kurabe Yudia niŋ, kurabe Kapadosia niŋ, kurabe Pontus naŋare niŋ. Irde kurabe Esia* naŋare niŋ. ¹⁰⁻¹¹ Goyenbe go po moŋ. Neŋ kurabe Frigia naŋare mat watiŋ. Munan kurabe Pamfilia niŋ, Isip niŋ, irde Libia naŋa bana goŋ niŋ al Sairini taun bindere hanŋen mar. Irde al kurabe Krit motmotde niŋ, kurabe Arebia naŋare niŋ. Irdeb al kurabe Rom mat belŋeŋ wayan. Goyenbe dahade niŋgeb Al Kurun belen mata tiŋeŋ kurayen kurayen al belen gwaha mat forok yeŋ haŋ yeŋ ma nurtek goyen forok yirde hinhin gobe mereniniŋ mat yeŋ haŋ?” yeŋ kukuwamŋeŋ nuramiŋ. (Be, Rom mat wayamiŋ mar goyen kurabe Yuda mar, munan kurabe al miŋ hoyan goyen Yuda marte tikula gama irde hanŋen mar.) ¹² Irdeb hurkunŋat teŋ gor ŋakŋak teŋbe, “Gab da matabe gago?” yeŋ yiŋgeŋ uliŋ kadam gusaŋan gird tiyamiŋ. ¹³ Gega kuramiŋbe Yesu niŋ dufaymiŋ saŋiŋ irde hinhan mar goyen nanosak mere yirdeb, “Mel gabe wain uguŋ po

* **2:9:** Esia naŋa gobe gayenter niŋ Esia naŋa kurun goke ma yitiŋ. Gayenterbe Turki inen hanŋen.

nene kukuwa hahan,” yaminj.

Pita belenj mere tagalyinj

¹⁴ Irkeb Pitabe aposel buda 11 goya huwardeb kuware al buda goyen gaha yinyinj: “Be, kadne yago, denj Yuda mar, Yerusalem taunde ninja sinjare ninja, ga nurnanj. Mata forok yihi gayen minj gwahade yenj momonj direnj tihim geb, kenkela kirmintinj kernanj ko. ¹⁵ Gabe 9 kilok wampot Al Kurunj mere ird ird nalure hite. Gega denj belenbe fe nen kukuwa hahanj yenj denhanj? ¹⁶ Monj, hakot Al Kurunyen mere basanj al Yoel belenj Yuda mar ninj mere tenj asanjde kayyinj gobe hanjka gago forok yihi. ¹⁷ Al Kurunj belenbe gaha yirinj:

‘Tonne Holi Spiritbe al megen ninj hitte fe wogor-tinj yara irde yunenj.

Irkeb kame gab nalu funanj forok yiyyenj.

Irkeb urtinjya wertinj yagoya belenj merene basanj henj tagalnayinj.

Irde al fonjentinj belenj yuwarwarte dufayne yenenj bebak tinayinj.

Irde salannentinj belenj mitere dufayne yenenj bebak tinayinj.

¹⁸ Fudinde, nalu goyenterbe metenj marne, alya bereya, tumnanj

Tonne Holi Spirit yunmeke merene basanj henj tagalnayinj.

¹⁹⁻²⁰ Irdeb Doyanj Al Kurunj wayyenj nalu kurunj goyen forok yewenj tikeb

megenya nanjkinjdeyabe mata tinenj kurayen kurayen al belenj yenenj tulfut yetek goyen forok yirmeke yennayinj.

Nanabe kidoma hiyyen, munan gagasibe buk yen dari yara hiyyen.

Munan megenbe dari, kakyabe kaki bukdulnen forok yenayin, ' yitin hi. *Yoel 2:28-32*

²¹ Gega nalu funan goyenterbe al kura ne nin nurde gama nirde hinayin mar goyen mun po gab tumnan yawaren, ” yirin.

²² “Ningeb, mel Israel mar, mere ga nurnan ko. Nasaret nin al Yesube fudinde Al Kurun belen ten kerke wayun yen nurnayin yenbe Al Kurun belen taren unen hike diltinde mata tinen kurayen kurayen kurun gogo forok yirde hike yenen hinhan. Denbe goyen kenkela nurde han gogo. ²³ Be, Al Kurunbe kame mata forok yiyyen goyen kenkela nurde hinhin geb, bikken dufaymin kiryin goyen po gama irde Yesu goyen den hantinde kirun. Irkeb den belenbe Al Kurun ma nurde unen han mar haninde pel irkeb kuruse hende mayke kamun. Ningeb den gare po Yesu mayke kamun.

²⁴ Gega kamde kamde taren Yesu tanartek goyen Al Kurun belen ten sin irde isan hekeb huwarun. Kamde kamde sanin gore epte ma basi irun.

²⁵ Be, Yesu huwarun goke bikken Dewit belen asandebe gahade kayyin:

‘Doyan Alnebe huginen neya hike kenen hime.

Yenbe ketalner hen faran nurde hi geb, kafura ma hewen.

²⁶⁻²⁷ Goke tenbe bener mat amanen wor po nurde Al Kurun turun irde hime.

Nebe ge belen metere ma nubul tike bida hewen. Delger wukke wor po nenen ha gayen nubul tike bida hen hen mata gobe ma kenen.

Kamde bida hetek yara gega, fudinde wor po ge belen faran nurke huwareñ yen nurde hime.

²⁸ Huginen hen hen belnen goyen nikala nirañ.

Ningeb kame geya tumñan henbe goke amanen nurde hen, 'yitiñ hi,' yiriñ. *Tikiñ 16:8-11*

²⁹ Be, Pita belen sopte gaha yinyiñ: "Kadne yago, asininiñ Dewit belen gwaha yiriñ gega, yenbe bikken kamke mete tiyamiñ. Irde fudinde wor po gasunbe gor mete tiyamiñ yen nurde hite. Irde wañ wañ gayenter wor metemiñ gobe hi. ³⁰ Goke tenbe Dewit belen mere tiyyiñ gobe yingen ge ma yiriñ. Yenbe Al Kurunyen mere basan al geb, Al Kurun belen biña tenya, 'Kame Dewityen minde niñ al kura yingen yara po forok yenbe gasunmiñ ten Doyan Al Kurun hiyyen,' yiriñ goyen nurde hinhin. ³¹ Mata kame forok yiyyen goyen nurde ep henbe Al Kurun belen Mesaia metere mat isan hekeb bana goñ ma bida hiyyen goke tagalyiñ. ³² Be, Mesaia gobe Yesu. Nen kurun gab Al Kurun belen kamtiñde mat isan heke huwarun goyen dilniniñde wor po kintiñ geb, yen ge kawan tagalde hite gago. ³³ Yesu gobe Naniñ Al Kurun belen tumulgan tike hurkunbe Naniñde tareñ ten Doyan Al Kurun hiyun. Irde Naniñ belen Holi Spirit niñ biña tiyyiñ goyen unke tenbe gago fe wogortiñen irde duna. Irkeb migiriñ kurun goyen nurde diltiñde wor po mata kenhan gago. ³⁴ Dewitbe uliñ tumñan ma Al Kurun hitte hurkuriñ. Gega gahade kayyiñ:

'Al Kurun belenbe Doyan Alne gaha inyiñ:

Wañ ketalner hen al denem yan wor po hawayiñ.

³⁵ Irkeb asogo girde han mar goyen bul yirde yawan gasa yirmeke katkeb yufurka tiyayin,' yitin. *Tikin 110:1*

Mere gabe yingen ge ma kayyin. Yesu nin ten kayyin. ³⁶ Ningeb den Israel mar, mere diren tihim gayen fudinde wor po yen nurnan ko: den belen Yesu kuruse hende mayke kamun. Gega Al Kurun belen kamtinde mat isan heke huwarun. Irkeb yen belen po Doyan Al Kurunya Mesaiaya irun," yinyin.

Al budam Al Kurun nin bin mulgan heke baptais tamin

³⁷ Be, al buda go meremin nurdeb, 'Fudinde mata bulun tin,' yen memyak wor po nurdeb Pitaya aposel buda kadom yagoya goyen, "Kad-ninin yago, ningeb daha titek?" yen gusunan yiramun. ³⁸ Irkeb Pita belen wol henbe gaha yinyin: "Ningeb den kurun gayen mata buluntin yubul ten Al Kurun nin bitin mulgan hena. Irdeb Yesu Kristu nin dufaytin taren irde yende denemde baptais tenayin. Gwaha tike gab Al Kurun belen mata buluntin goyen haldeb Holi Spiritmin dulin dunen yen bin tiyyin goyen dunyen. ³⁹ Go bin tiyyin gobe al kura Al Kurun belen hoy yiryen mar kurun goke ten bin tiyyin. Ningeb bin tiyyin gobe denya fonentin yagoya al gisaw han mar goke manan nurde tiyyin," yinyin.

⁴⁰ Irde saba min unkuren goyen po ma yiryin. Saba kurayen kurayen yirde hayhay yirde gaha yinyin: "Ga hite nalure gayenbe mata bulun kurun forok yen hi. Ningeb mata bulun goyen yenen yilwa yirnayin. Gogab Al Kurunyen bearar

go ma kennayin,” yinyin. ⁴¹ Be, al buda gobe Pitayen mere goyen fudinde yeñ nurdeb Yesu niñ dufayminñ sanñ irdeb baptais taminñ. Goyare al tiñeñ baptais taminñ marbe 3,000 gwahade forok yaminñ. Irdeb mel hakotkenñ goya tumñanñ Yesuyen alya bereya haminñ. ⁴² Be, go tiyaminñ mar gobe yende aposel buda gote saba goyen hugineñ teñ hinhan. Irdeb hugineñ awalikde po heñ kadom farañ gurd teñ hinhan. Irde Yesu kamenya komatminñ yagoya binje nene yeñ kamde kamde niñ mere yiryinñ goyen bin bak yeñ yeñ ge binje kadom gunenñ teñ awalikde nene hinhan. Irdeb hugineñ Al Kurunñ mere irde hinhan.

Yesu niñ dufayminñ tareñ irde hinhan marte mata igin

⁴³ Be, aposel buda belenñ mata tiñeñ kurayen kurayen forok yirke al tumñanñ goyen yenenbe hurkunñkat teñ kafura haminñ. ⁴⁴ Irdeb Yesu niñ dufayminñ tareñ irde hinhan marbe tumñanñ gabu irde awalikde heñ det kadom gunenñ teñ hinhan. ⁴⁵ Gwaha teñ henyabe dawetminnya samunminñ yago al belenñ damu teñ hikeb murungem yade diñunñ yago det kuranñ nurkeb farañ yurde hinhan. ⁴⁶ Mel gobe hugineñ gise hañka Al Kurunyen ya balem koya belenñ po milgu irtinñ bana sawsawa al gabu irde hanyende gor gabu irde hinhan. Irdeb kurate yayanñ gabu mukneñ mukneñ irde hinhan. Gwaha teñ henbe Yesu kamenya komatminñ yagoya funañ dula teñ yeñ kamde kamde niñ mere yiryinñ goke dufay heñ dula teñ hinhan. Binde mat fudinde wor po kadom niñ dufay heñ

tumṅaṅde aman heṅ gwaha teṅ hinhan. ⁴⁷ Irkeb Al Kurunṅ turun irde hinhan. Be, mata kurunṅ goyen teṅ hikeb Yerusalem hinhan mar gore iginṅ nurde yuneṅ turun yirde hinhan. Irkeb Al Kurunṅ beleṅ hugiṅeṅ gise haṅka al tiṅeṅ yawaṅ Yesu gama irde hinhan mar hitte gabu yirde hinhin.

3

Pita beleṅ al kahaṅ simsimam sope iryiṅ

¹⁻² Be, goyare goyenbe al kura kahaṅ simsimam miliṅ beleṅ gwahade po kawaṅ kiryiṅ goyen al beleṅ hugiṅeṅ tukunṅbe Al Kurunṅyen ya balem milgu irtiṅ koya gote yame kura goyenter kerde hinhan. Yame gote deṅembe “Yame kusamuṅ” ineṅ hanṅyen. Gor keperde hikeb alya bereya Al Kurunṅ doloṅ irniṅ yeṅ wakeb hora kaṅaṅ yirde hinhin. Be, 3 kilok wawunṅbana kura Al Kurunṅ mere ird ird nalu hekeb Pitaya Yonyabe Al Kurunṅyen ya balemde kwaryum.

³ Be, Pitaya Yonya gobe hako ga yamere hurkurenṅ tikeyabe al kahaṅ simsimam goreb hora niṅ kaṅaṅ yiryiṅ. ⁴ Irkeb irem gore tumṅaṅde huwarde kimiṅde keneṅbe Pita beleṅ, “Deyya ga dena,” inyiṅ. ⁵ Gwaha inkeb det kura wet nunyeṅ tahar yeṅbe kotaṅ kaṅ yinyiṅ. ⁶ Gega Pita beleṅbe, “Nebe horanem moṅ wor po. Goyenpoga det kura ne hitte hi goyen guneṅ tihim geb, Nasaret niṅ al Yesu Kristuyen deṅemde ginhem, huwarde kwa!” inyiṅ. ⁷ Gwaha ineṅbe yeṅ beleṅ po al goyen hanṅ yase beleṅ tanarde isaṅ hiriṅ. Irkeb goyare po kahaṅ huwa heṅ saṅiṅ haryum. ⁸ Irkeb huwardebe solok solok

yeŋ kuŋ waŋ tiyyiŋ. Irdeb Pitaya Yonya irde tumŋaŋ Al Kurunyen ya balem koya beleŋ po milgu irtin bana sawsawa al gabu irde hanjende gor hurkuŋbe kuŋ waŋ teŋ solok solok yeŋ Al Kurun turun iryiŋ. ⁹ Be, al go kuŋ waŋ teŋ Al Kurun turun irde hikeb al gor hinhan gore al go keneŋ ¹⁰ bebak teŋbe, “Ey! Al gabe kahaŋ simsimam, yame denem Yame kusamuŋde gor keperde hiyen al go goyen gago,” yeŋ hurkuŋkat teŋ diliŋ fot yamiŋ.

Pita beleŋ Al Kurunyen ya balemde mere tagalyiŋ

¹¹ Be, al goreb Pitaya Yonya yubul titek ma irkeb irem go gama yirde Al Kurunyen ya balem koya beleŋ po milgu irtin bana sawsawa al gabu irde hanjende gor kwamiŋ. Gasuŋ gobe “Solomonyen Paranda”^{*} inen hanjen. Irkeb al gor hinhan gore keneŋ hurkuŋkat teŋbe yeŋ hitte kup yeŋ kwamiŋ. ¹² Irkeb Pita beleŋ al yeŋ hitte waŋ hike yeneŋbe gaha yinyiŋ: “Deŋ Israel mar, al igiŋ hihi gayen keneŋ goke hurkuŋkat teŋ diltiŋ fot ma yenayiŋ. Deyya gabe Al Kurun diliŋde al igiŋ niŋgeb, gore al kahaŋ simsimam gayen sope irhar yeŋ denen haŋ? Moŋ! Deyyat tareŋdebe epte moŋ geb. ¹³⁻¹⁵ Niŋgeb ga nurnaŋ ko. Yesube Al Kurunyen Meten Al, Al Wukken, irde Al Huwak wor po. Gega deŋ beleŋ igiŋ ma nurd unenbe mayke kami yeŋ tukun Pailat haniŋde kerdeb pel

^{*} **3:11:** Solomonyen Paranda: Al Kurunyen ya balem kurun gote ya murun sobam siŋa siŋa kutiŋ hinhan. Ya murun gobe tola karkuwaŋ yimiytiŋ hinhan. Ya siŋa kurhanbe “Solomonyen Paranda” inen hinhan gogo.

iranj. Irkeb Pailat belenj tubul timeke kwi yekeb denj belenj kamyenj po yanj. Irdeb al kura al gasa yirke kamtinj al goyen tenj sinja irke kat kuyenj yanj. Gwaha tenjbe Al Kurunya huginjenj henj henj gote belenj kerd duntek albe gogo mayanj. Gega hakwanininj Abraham, Aisak, Yekopya, asinininj yagoyat Al Kurunj belenjbe kamunjde mat isanj henjbe al belenj turunj irde hinayinj yenj al denjem turunj yanj wor po irunj. Ninjgeb Yesu kamunjde mat huwarunj gobe dilnininj bilminjde wor po kintinj geb, gago momonj dirde hite. ¹⁶ Deyyabe Yesu ninj hekkej nurde har geb, al kahanj simsimam kenenj hinhan gago kahanj huwa henj tarenj hihi. Deyyabe Yesuyen saninj belenj gab al ga sope iryenj yenjbe yenj ge hekkej nurde har gore al gago kenjela wor po sope ira kenhanj,” yinyinj.

¹⁷ Irde sopte gaha yinyinj: “Be, kadne yago, denj wor doyanj martinj belenj tiyanj gwahade goyen po Yesube al gwahade yenj minj kenjela ma nurdeya bulunj iranj yenj nurde hime. ¹⁸ Gega gobe bikkenj Al Kurunj belenj kame Mesaiaminjbe ulinj misinj kurunj katenj kamyenj yenj mere basanj marminj yinke tagalaminj geb, gwahade goyen po forok yiyunj. ¹⁹ Ninjgeb mata buluntinj yubul tenj Al Kurunj hitte mulganj henayinj. Irkeb Doyanj Al Kurunjininj belenj mata buluntinj halde dunenjbe tontinj tarenj yiryenj. ²⁰ Irde kamebe Yesu, Mesaia bikkenj denj ge tenj basinja iryinj goyen tenj kerke katyenj. ²¹ Gega yenjbe gayenterbe Al Kurunya har. Be, kunj kunj Al Kurunj belenj det kurunj gayen yirde gergenj yire yeke gab katyenj. Mata gabe bikkenj Al Kurunj belenj mere basanj marminj

diliñde wukkenj wor po yenej hinhin goyen momon yirke tagalamin. ²² Be, bikkenjbe Mose belej Yesu niñ yeñ Israel mar gaha yinyiñ: ‘Doyañ Altin Al Kurunj belejbe mere basañ almiñ kura ne yara po den miñde niñ forok iryen. Niñgeb al gore mere dirde hiyenj kurunj gobe kenkela nurde gama irde hinayiñ. ²³ Al kura yende mere ma nurde hiyenj al gobe Al Kurunj belej biñ arñenj nurd yunke go mar gobe yende al ma henayiñ,’ yiriñ,” yinyiñ.

²⁴ Irde sopte gaha yinyiñ: “Irde Al Kurunjen mere basañ al, Samuelya, mere basañ mar kame kame wañ hinhan kurunj gore wor mata kurunj gayenter forok yeñ hañ gake gwahade po forok yenayiñ yeñ bikkenj tagalde hinhan. ²⁵ Niñgeb Al Kurunjen mere basañ marmiñ belej gwahade tagalde hinhan gobe den ge teñ tagalde hinhan. Irde den ge teñbe Al Kurunj belej Abraham diliñde biña teñbe, ‘Kame foñenge kura forok yiyyenj gore megen niñ al buda kurunj gayen nere guramya tareñya teñ teñ hiryonj hiyyenj,’ inyiñ. Be, biña tiyyiñ gwahade po Al Kurunj belej asetin wenj hitte wor biña teñ hinhin gobe den ge teñ biña teñ hinhin. ²⁶ Niñgeb den ge teñbe Al kurunj belej guram dirde sañinj dirke mata bulunñin goyen yubul tinayiñ yeñ nurdeb meten almiñ basiña irde teñ kerke den hitte wa wayyiñ,” yinyiñ.

4

Pitaya Yonya yade koyare yeraminj

1-2 Be, Pitaya Yonya belen Solomonyen Paranda inen hanyende gor hinaryumya goyenbe gor gabu iramin mar goyen Yesu kamde huwaryin mere goke momon yirde hinaryum. Gwaha ten henyabe Yesu tiyyin gwahade goyen po al kamtin manan kame huwarnayin yen mel goyen saba yiraryum. Gwaha ten hikeb Al Kurun dolon ird ird mata doyan mar pris budaya, Al Kurunyen ya balem kurun gote doyan marte kurunminyabe Sadusi marya belen* wan mere go nurdeb bin ar yamin. ³ Irkeb mel gore Pitaya Yonya yad merere yertek yen yawaramin. Gega bikken wawun hirin ningeb, gise ga yenbe yad koyare yeramin. ⁴ Gega irem gote mere nuramin marbe budam wor po mere goyen fudinde yen nurde Yesu nin dufaymin taren iramin. Irkeb al yen wa Yesu nin dufaymin taren iramin mar bikkek goyabe gayamunkek goya gabu irde al parguwak po kapyan haminbe 5,000 gwahade hirin.

Pitaya Yonya mere kurunde hararyum

⁵ Be, fay urkeb Yudia nanare nin doyan marya Yuda marte doyan mar parguwakyabe Moseyen saba basan hen tagal tagal marya belen irem gote mere nurnin yen Yerusalem gor gabu iramin. ⁶ Gabu iraminde gorbe Al Kurun dolon ird ird mata doyan mar pris buda gote karkuwanmin Anas, Kaiafas, Yonya, Aleksandaya, irde Anas gote taynen wen hoyan manan gor gabu iramin. ⁷ Be, mel gore Pitaya Yonya yawanbe yen ge igin ma nurde yunenya, “Ganun belen igin dinkeb

* **4:1-2:** Sadusi mar: Al kamtin sopte huward huward goyen fudinde yen ma nurde hinhan mar.

mata gogo tiyarun? Ganunđe sanjinde gogo tiyarun?” yeŋ gusuŋaŋ yiramiŋ. ⁸ Irkeb Pita gobe Holi Spirit beleŋ hard unkeb wol heŋbe gaha yinyiŋ: “Be, deŋ Yuda marte doyaŋ marya doyaŋ mar parguwakya, ga nurnan ko! ⁹ Deŋbe al kahaŋ simsimam faraŋ uryeke igiŋ hiyuŋ goyen goke muŋ teŋ merere derde daha mat igiŋ hiyuŋ gote miŋ nurniŋ yeŋ gusuŋaŋ dirhaŋ? ¹⁰ Niŋgeb deŋya Israel mar hoyan manan tumnan mere tiyeŋ tihim gayen ga nurde bebak tinayiŋ. Be, al kahaŋ simsimam gabe Nasaret niŋ al Yesu Kristu deŋ beleŋ mayke kamuŋ gega, Al Kurun beleŋ isaŋ heke huwarun al gote tarende igiŋ hiyuŋ. Niŋgeb diltiŋ mat huwarke gago kenhaŋ. ¹¹ Yesu niŋ teŋ Al Kurunyen asaŋdebe siraw mere mat gahade katiŋ hi:

‘Deŋ, ya ird ird mar beleŋ ya irniŋ yeŋ hora kura tawayamiŋ gega, igiŋ ma keneŋbe temeyamiŋ.

Goyenbe al hoyan beleŋ tukuŋ gore po yamiŋ tareŋ wor po iryiŋ,’ yitiŋ hi. *Tikiŋ 118:22*
 Niŋgeb hora gwahade goyenbe deŋ beleŋ Yesu gogo pel iran. Gega Al Kurun beleŋ teŋ meten kurun wor po unun. ¹² Niŋgeb Yesu po ga neŋ mata bulunde mat dumulgan teŋ teŋ sanjigoyen Al Kurun beleŋ unun. Niŋgeb megen niŋ al kura beleŋ epte ma Al Kurun hitte alya bereya yumulgan tiyyen,” yinyiŋ.

¹³ Be, gor gabu iramiŋ mar goreb Pitaya Yonyabe saba kurun ma titiŋ, irde al denem moŋ yeŋ nuramiŋ gega, ‘Neŋ ge kafura ma heŋ mere tareŋ po tagalde har,’ yeŋbe hurkunƙat tiyamiŋ.

Irde irem gobe Yesuya tumnañ heñ kuñ wan ten hinhan mar goyen kurabe gago yen biñ bak yamiñ. ¹⁴ Irde al kahañ simsimam goyen igiñ heñ Pitaya Yonya irde tumnañ huwarde hike kenenbe Pita belen mere tiyyiñ goyen wol heñ heñ ge kukuwamneñ nuramiñ. ¹⁵ Irdeb mere ten ten gasunde matbe yakira tike belneñ mun po sinare kukeb yingeneñ uliñ mere sege irde gaha yamiñ: ¹⁶ “Al irawa gabe daha yirtek? Al buda kurun Yerusalem taunde han kurun gobe irem gore mata tineñ wor po goyen tike kenan. Neñ wor mata forok yiyun gote iginenbe kenhet gago niñgeb, epte ma ‘usi’ yetek. ¹⁷ Gega mata forok iraruñ gote mere momonbe kurun heñ kuke al nurde pasi henayiñ goke igiñ ma nurde hite geb irem goyen, ‘Sopte Yesu inen hanyen al goke tagalkeb muduntek,’ yinen utañ yirtek,” yamiñ. ¹⁸ Gwaha yenbe irem go sopte hoy yirke wakeb, “Derbe al hoyañ hitte kuñ Yesu niñ ma wor po tagalde saba yiriryen!” yen mere tareñ po yirdeb utañ yiramiñ. ¹⁹ Gega Pitaya Yonya belen wol henbe, “Al Kurunbe da mata niñ igiñ nuryen? Yende mere gama irtek ma dende mere gama irtek? Goyen dindiken dufay henañ ko. ²⁰ Munañ deyyabe Yesuyen mata delderer yenen meremiñ nurde tiyaryum goyen tagal tagal niñ epte ma wor po bada hereñ,” yinaryum.

²¹⁻²² Gega al kahañ simsimam miliñ belen gwahade po kawan kiryiñ, damam 40 fole irtiñ goyen Pitaya Yonya belen Al Kurunen saninde sope iraryum goyen al budam wor po go kenenbe Al Kurun turun iramiñ geb, Yuda marte doyan mar

belen goyen nurdeb gwaha mat kura irem goyen bulun yirtek mon hamin. Niñgeb dulin mohonde po kafura mere yirde yubul tike kwaryum.

Yesu nin dufayminj tarej irde hinhan mar belen Al Kurunj mere iraminj

²³ Be, Pitaya Yonya gobe yubul tike mulgan hen dinun yago hitte kwaryum. Irdeb pris buda gote karkuwanminya Yuda marte doyan mar parguwakya belen mere yiramin goyen tumnan dinun momon yiraryum. ²⁴ Irkeb mere goyen kanduknen nurdeb tumnande Al Kurunj ugun po gahade inamin: “Doyan Al Kurun, ge belen po nankinya megenya makanya yirdeb dawet bana gon han kurun gayen yirarin. Irde doyan yirde ha. ²⁵ Ge belen mere tike meten alge asininin Dewit gore Holi Spirityen tarende merege nurde basan hen gaha yirin:

‘Danin megen nin marbe yen ge bearar ten han? Irde danin dufay bulun kukuwamnen po yerde mere mayde han?’

²⁶ Megen nin doyan mar karkuwanya nana ga doyan irde han mar wan gabu irdeb Doyan Al Kurun asogo irde han.

Fuinde, al buda kurun gobe bikken Al Kurun belen basina irde olip finin tonande sam irtin Al goyen gogo asogo irde han,’ yirin.
Tikin 2:1-2

²⁷ Niñgeb, fuinde, Dewit belen mata goke yirin gwahade goyen po forok yiyun. Yesube ge belen bikken Mesaia inen basina irarin. Gega Israel nana doyan al Herotya Roma gabmanyen al Pontius Pailatya belen Yesu, gere Meten Al, delger

wukken wor po kenen hayen al goyen asogo irtek yen Israel mar Yerusalem bana gan han goya al min hoyan Yuda mar monya gabu irde mere mayan. Irdeb mayke kamun. ²⁸ Goyenbe mata gobe mali ma forok yiyun. Mel buda gore gwaha tinayin yen dufayge bikken kerarinyen geb, gogo gwahade po forok yiyun. ²⁹ Ningeb Doyan Al Kuruninin, Yesu nin tagalde hite goyen utan dirnin yen mel gore kafura dirde han gabe yenen ha. Ningeb nen meten marge sanin dirkeb mel goke kafura ma henbe igin merege tagalde tukutek. ³⁰ Irde Yesu, gere Meten Al, delger wukken wor po gote denemde garbam mar sope yirde, mata tinen kurayen kurayen forok yirde hitekeyab tarenge kurun goyen alya bereya yikala yirde hayin.” inamin.

³¹ Be, Pitaya Yonya irde gabu iramin mar belen Al Kurun mere irde pasi irkeb goyare po Al Kurun belen wol henbe mel go hinhan gasun goyen ansok iryin. Irkeb gor hinhan mar gobe tumnan Holi Spirit belen hard yunkeb Al Kurunyen mere tagal tagal nin kafura ma henbe tagalde kun hinhan.

Yesu nin dufaymin taren irtin marbe detmin kadam gunen tej hinhan

³² Be, Yesu nin dufaymin sanin irde hinhan mar gobe tumnan dufayminya mataminya unkuren po hamin. Irdeb al kura belen, “Detne kurun han gabe nere kudinon mon,” yen hinhan, irde detmin kurun goyen yingen ulin kadam gunen tej hinhan. ³³⁻³⁵ Be, aposel buda belen Yesu kamyinde mat huwaryin goyen Al Kurunyen

tarenđe tagalde hike al beleş fudinđe yeş nurde hinhan. Irde al tumŋaŋ megeş minyaŋya ya minyaŋ marbe al beleş damu tikeb muruŋgem goyen aposel hitte yawaŋ haniŋde yerde hinhan. Irkeb aposel beleş al kura det kuraŋ amu heş hinhan mar tumŋaŋ gale heş yuneş hinhan. Gwaha teş hikeb al kura det kuraŋ ma amu heş hinhan. Be, Al Kuruş beleş yeş gama irde hinhan mar goyen mata gwahade teş hikeb guram yirde igiş igiş wor po yirde hinhin.

³⁶⁻³⁷ Be, al kura, deŋembe Yosep manaş megeş tapummiş kura al beleş damu tike muruŋgem goyen tawaŋbe aposel buda yuniş. Yeşbe Liwai mar al, irde Saiprus motmotde niş al. Aposel buda beleşbe Banabas ineş hinhan. Deş gote mişbe, “kadom faraş yurde tarenş yird yird al.”

5

Ananiasya Safiraya

¹ Be, al kura deŋembe Ananiasya berem Safiraya manaş megeş tapummiş kura al beleş damu tikeb muruŋgem taryum. ² Gega ire uŋya gobe hora goyen tumŋaŋ Yesuyen mere basaş mar aposel buda haniŋde kertek ma yirkeş goke sege irdeb hora kurhanbe yiŋgeş ge basaş irdeb uş beleş kurhan po tawaŋbe, “Megeş gote muruŋgembe gago po,” yeş aposel buda haniŋde kiryiş. ³ Irkeş Holi Spirityen saŋiŋde Pita beleş bebak teşbe, “Ananias, daniş geb Satanyen dufay po gama irde hora kurhanbe giŋgeş ge bana kerdeb tumŋaŋ gago po tawayhem yara teş Holi Spirit usi irha? ⁴ Megeşge goyen damu ma

tikeyabe gere hinhin. Irde damu tike murungem wor gere po. Niñgeb hora go ten dufayger det kura ire yenbe gwaha irtek yara. Gega da belen wor po girkeb dufay goyen forok yekeb mata bulun gogo taha? Usi taha gobe al ma usi yirha, Al Kurun usi irha geb,” inyiñ. ⁵⁻⁶ Irkeb Ananias gobe mere goyen nurdeb goyare po kamde katiñ. Irkeb al fonen kura gor hinhan gore wanbe al hakwa go mala ten tukun mete tiyamiñ. Be, Ananias belen Holi Spirit usi irde goke mun po kamke kenamiñ marya mere momonmiñ nuramiñ marya tumnan tulfut yen kafura hamiñ.

⁷ Be, 3 awa gwahade kamereb berem Safira gobe un hitte mata gwahade forok yihi yen ma nurdeya Pita hinhin ya binde gor hurkurin. ⁸ Irkeb Pita belenbe, “Safira, momon nira. Megentirinde murungembe gago po we?” inkeb, “Gwaha, tumnan gogo po,” inyiñ. ⁹ Irkeb Pita belen wol henbe, “Dahade niñgeb derbe tumnande mere sege irdeb Doyan Al Kurunyen Holi Spirit tunan urhar? Almege tukun mete tahañ marbe yamere gogo forok yahan yenha. Niñgeb ge wor gade kuniñ tahañ geb,” inyiñ. ¹⁰ Irkeb goya goyen po Pitayen kahañ minde gor po katen kamiñ. Be, un tukun mete tiyamiñ mar gore wan hurkunbe berem wor kamtiñ kenenbe tukun un ketalde po mete tiyamiñ. ¹¹ Be, ire unya go hitte mata forok yirin gote mere momon nurdeb Yesuyen alya bereya sios gobe tumnan kafura wor po hamiñ. Yesuyen alya bereya mon wor gwahade po kafura hamiñ.

Aposel buda belen garbam mar budam sope

yiramiñ

¹² Be, aposel buda belen mata tinen Al Kurun belen po forok yirtek goyen al hitte budam forok yirde hike diliñ fot yen hinhan. Irde Yesu niñ dufaymiñ taren irde hinhan marbe tumñan dufaymiñ unñkuren po kerde Al Kurun doloñ irniñ yen al wañ gabu irde hanñen gasuñ kurun kura “Solomonyen Paranda”^{*} inen hanñende gor gabu irde hinhan. ¹³ Be, Yerusalem taunde hinhan mar goyen tumñan Yesu niñ dufaymiñ taren irde hinhan mar goke tagalde turuñ yirde hinhan. Gega go mar goyen hitte mata forok yen hinhan goke kafura henbe al kura yenya awalik hen hen ge kama hen hinhan. ¹⁴ Gega alya bereya tinen belen Doyañ Al Kurun niñ dufaymiñ sañiñ irdeb budam forok yen hinhan. Irkeb Yesuyen alya bereyabe budam wor po hamiñ. ¹⁵ Irde aposel buda belen mata tinen kurayen kurayen ten hinhan goyen yenen hinhan geb, garbam miñyañ mar sapirte yawañ belenyañ yerde hinhan. Kurabe yawañ gasuñ ugamde yunke goyañ ferde hinhan. Gwaha yirteke gab Pita wañ belen goyañ kuñ henyañ hanñ yerde yuni yenbe gogo ten hinhan. Munañ kurabe Pita toneñ belen po awrum yurke igiñ henayiñ yen nurde ten hinhan. ¹⁶ Irkeb tiyuñ budam Yerusalem biñyañ biñyañ niñ mar gore garbam marya al unñgura ketal yurtiñ miñyañ mar goyen aposel buda hitte yawañ hike sope yirke tumñan igiñ hen hinhan.

^{*} **5:12:** Solomonyen Paranda: Al Kurunyañ ya balem kurun gote ya muruñ sobam siña siña kutiñ hinhan. Ya muruñ gobe tola karkuwañ yimiñtiñ hinhan. Ya siña kurhanbe “Solomonyen Paranda” inen hanñen gogo.

Aposel budabe kanduk kenaminj

¹⁷ Be, pris buda gote kurunminya yen faran urde hinhan mar Sadusi budaya belen, ‘Neñ fole dirniñ tahañ,’ yen biñ ar yekeb aposel buda niñ igiñ ma wor po nurdeb yade gasa yirniñ yen mere sege iramiñ. ¹⁸ Irdeb aposel buda goyen yade kawe marya mata buluñ tej hinhan marya yerde hanjen koyare gor yeramiñ. ¹⁹ Gega wawuñbe Doyañ Al Kurunyen miyoñ belen kuñbe koya gote yame fegelde siñare yukuriñ. ²⁰ Irdeb, “Al Kurunyen ya balemde kuñbe al buda kurun goyen al kura Yesu niñ dufaymiñ taren iryenbe Al Kurun diliñde al gergen heñ heñ mata goyen goke kenkela po tagalnayin,” yinen hulyañ yiryin. ²¹ Be, miyoñ belen yinyin goyen nurdeb fay urkeb Al Kurunyen ya balemde kuñbe alya bereya saba yird yird miñ uramiñ.

Be, goya goyenbe pris buda gote kurunminya yen faran urde hinhan marya gore aposel buda goyen daha yirniñ yen Yuda marte doyañ mar parguwak tumñañ hoy yirke wañ gabu iramiñ. Irdeb mel go koyare yeramiñ goyen yawan merere yirniñ yenbe al hulyañ yirke kwamiñ. ²² Gega kuñ forok yen nankenamiñbe aposel buda gobe gor ma hinhan. ²³ Gwahade kenenbe mulgañ heñ kuñbe, “Koya yamebe siña mat taren irtin, irdeb ya gote doyañ marbe tumñañ gor hañ. Goyenbe yame fegelde hurkuñ nankenhet gega, gorbe al miñmoñ. Hubu wor po!” yinamiñ. ²⁴ Irkeb pris buda gote karkuwanminya Al Kurunyen ya balem doyañ irde hanjen marte kurunminya belen mere momoñ go nurdeb, “Aposel

budabe daha tahan? Irdeb kamebe da mata forok yiyyen?” yen nakanak tiyamin.

²⁵ Be, gwaha ten hikeb al kura wanbe, “Mel, ga nurnan. Al yad fere tiyan mar gobe Al Kurunyen ya balem bana gon alya bereya saba yirde hike yenhem be!” yinyin. ²⁶ Irke ya balem kurun gote doyan marya kurunminya gore mere go nurdeb kun aposel buda go yad wayamin. Goyenpoga al buda kurun meremin nurde hinhan mar gore yen ge hen hora kaka dirnak yenbe ohkohom po Israel nana doyan mar tumnan gabu iramin gasunde gor yawayamin.

²⁷ Be, aposel buda go yawan dilinde yirkeb pris buda gote kurunmin gore bin ar hende gaha yinyin: ²⁸ “Yesu belen alya bereya ne nin saba yirde hinayin dinun goyen bada po henayin yen utan dirtin. Gega parsay hen Yerusalem taunde gar kawanyan po mere tagalde tukun hikeb al budam nurd pasi hahan. Gwaha tenbe Yesu kamun gobe yen belen po mayan yen minge dirnin ten han?” yinyin. ²⁹ Irkeb Pita belen kadam yagoya huwarde wol henbe, “Nenbe Al Kurunyen mere po gama irtek. Dende mere ma nurtek geb! ³⁰ Be, ga nurnan. Den belen Yesu kuruse hende mayke kamun. Goyenbe nen Israel marte asininin yagot Al Kurun belen kamtinde mat isan hiyun. ³¹ Irde yingen hitte tumulgan ten sanin unenbe denem yan kurun wor po irdeb, nen al gayen ga Dumulgan ten ten Al irun. Goyenbe nen Israel mar kurun gayen mata bulun yubul ten yen ge bininin mulgan heke mata buluninin halde dunen yen nurdeb gogo tiyun. ³² Ningeb nenbe Yesu hitte

mata forok yitiŋ goyen dilniniŋde yeneŋbe gago kawan tagalde hite. Irde Holi Spirit manaŋ bebak tinaŋ yeŋ dikala dirde hi. Be, Holi Spirit gobe Al Kurun beleŋ yende mere gama irde haŋ mar goyen tumŋaŋ yuneŋ hi,” yinyiŋ.

Gamaliel beleŋ aposel buda niŋ igiŋ mat tagalyiŋ

³³ Irkeb meremiŋ nuramiŋ mar gobe biŋ ar yekeb, ‘Fudinde wor po, aposel buda gayen gasa yirteke kamwoŋ,’ yeŋ nuramiŋ. ³⁴ Be, gabu iramiŋde gorbe Yuda marte tikula saŋiŋ po gama irde haŋyen Farisi mar al kura deŋembe Gamaliel goyen gor hinhin. Yeŋbe Moseyen saba basaŋ heŋ tagal tagal al. Al gobe al budam palap irde hinhan. Be, al gore huwardeb, “Aposel buda ga beleŋ po siŋare yukunaŋ,” yinkeb gwaha yiramiŋ. ³⁵ Irkeb gabu iramiŋ mar goyen gaha yinyiŋ: “Mel, Israel mar, al buda gayen ga daha wet kura yirniŋ yeŋbe keŋkela dufay heŋ ga mata tinayiŋ. ³⁶ Nalu kura hakot yara po mata kura forok yiyun goyen bitiŋ sir yaŋ? Al kura deŋem Teudas beleŋ, ‘Nebe al deŋne yaŋ,’ yekeb al 400 gwahade beleŋ gama irde hinhan. Gega go al goyen maykeb yeŋ gama irde hinhan mar gobe bur yekeb hubu po hiriŋ.

³⁷ “Be, Teudas kamereb neŋ Israel marte deŋniniŋ kapyaŋ heŋ tumŋaŋ asaŋde kerd kerd nalure Galili niŋ al kura deŋem Yudas beleŋ, ‘Roma gabman asogo irniŋ,’ yineŋ al usi yirke gama irde hinhan. Gega yeŋ wor mayke kamkeb yeŋ gama irde hinhan mar goyen wor bur yamiŋ. ³⁸⁻³⁹ Niŋgeb gwahade goyen po aposel buda beleŋ

mata tej hañ gayenbe dufayminde po tej hañ kenem metenmin gobe hubu hiyyen. Munañ Al Kurunyen dufay gama irde tej hañ kenem den belen, ‘Bada henañ,’ yinnayin gega, epte ma meretin nurnayin. Monço al buda gayen asogo yirhet usi tenbe Al Kurun asogo irnayin geb. Goke tenbe dinhem gago. Mel gayenbe okohom po yubul tike kunayin,” yinyin.

Aposel budabe Yesu nin tej kanduk yenamin goke amanen nuramin

⁴⁰ Irkeb al buda gor hinhan mar gore, ‘Mere dira gabe fudinde,’ yen nuramin. Irdeb aposel buda go sopte hoy yirke wakeb gabu iramin gote kurunmin belen, “Yesu gore yingen ge al saba yirde hinayin dinun gobe sopte ma po tagal-nayin,” yinen utan yirdeb fuleña marmin yinkeb al gasa yird yird kan po yusulak tenbe yakira tiyamin. ⁴¹ Irkeb aposel buda goyen mere gasun go tubul tej kun henya, “Nenbe Al Kurun belen Yesuyen al wor po yen nurd dunen hi. Ningeb Yesu nin tej ulninin misin katehet gago,” yen amanen wor po nuramin. ⁴² Irdeb al saba yird yird nin bada ma hamin. Huginen gise hanca Al Kurunyen ya balemde gor kun mere igin Yesube Mesaia yitin goyen mere kawan po tagalde kun hinhan. Irdeb almet yayan wor gwahade po tej hinhan.

6

Yesuyen alya bereya sios faran yurd yurd meten nin al 7 basiña yiramin

¹ Be, gwaha ten hinhan goyenterbe Yesu nin dufaymin taren irde hinhan marbe budam forok yen hinhan. Goya goyenbe Yerusalem nin Yuda mar yingende mere ten hitin belej gise hanja beretap binje gale hen yunen hinhan. Goyenbe yende beretap po yunenbe, Grik mere ten hitin beretap gobe yubul ten hinhan. Irkeb Yuda mar Grik mere ten hitin goreb goke igin ma nurdeb tiyuj min mar goya kadam mohonde tiyamin.

² Goke tenbe Yesuyen mere basan mar aposel buda 12 gore Yesuyen alya bereya sios tumnan gabu yirdeb gaha yinamin: “Nende metenje Al Kurunyen mere tagalde tukun tukun. Ningeb binje gale hen hen goke ten metenninin wor po goyen harhokninin untek gobe igin mon.

³ Ningeb kadninin yago, den gabu irde han bana gon nin al 7 kura dindiken basina yirnayin. Goyenbe mel gobe Holi Spirityen saninde wor po meten ten hanyen, irde Al Kurun belej dufay igin yunen hike meten ten hanyen mar goyen po basina yirnayin. Irkeb binje gale hen hen metenje mel gore ten hinayin. ⁴ Gogab nenbe Al Kurun mere ird irdya meremin tagal tagal nin po dufay hetek,” yinamin.

⁵ Be, gwaha yinkeb al buda kurun gob amanen nurdeb al 7 basina yiramin. Denembe Stiwen, Filip,* Prokorus, Nikanor, Timon, Parmenasyabe Antiok taunde nin al Nikolasya. Nikolas gobe al min hoyan gega, Yuda marte tikula gama irde Yuda mar al hirin. Munan Stiwenbe Yesu nin heken wor po nurde hinhin, irde Holi Spirityen

* **6:5:** Filip gabe Yesuyen aposel 12 bana kura gogo mon, al hoyan.

tarenđe po meten ten hinhin. ⁶ Be, al buda gwahade basinja yirdeb aposel buda hitte yukamiņ. Irkeb al 7 gobe sios faran yurd yurd niņ yade yapat yiramiņ goyen goke tonan hende haniņ yerde Al Kurun belen faran yurde hiyen yen gusunan iramiņ.

⁷ Be, Al Kurunyen mere Yesu niņ yitiņ gobe Yerusalem taun kurunde gor niņ mar belen tumnan nurde tukamiņ. Irkeb Yesu niņ dufaymiņ taren iramiņ marbe aran po budam hamiņ. Be, Al kurun doloņ ird ird mata doyan mar wor budam Yesu niņ dufaymiņ sanin iramiņ.

Yuda mar belen Stiwen fere tiyamiņ

⁸ Be, sios faran yurd yurd niņ basinja yirtin al kura Stiwen gobe Al Kurun belen kenkela po guram irde taren kurun unkeb al budam dilinde mata tinen kurayen kurayen Al Kurun belen po yirtek goyen forok yirde hinhin. ⁹ Gega Yuda mar kurabe Stiwen niņ igin ma nurde wan kwep kwep iramiņ. Be, gwaha iramiņ marbe “Doyan Mar Minmon Mar”[†] yineņ hinhan. Mel gobe yingenđe gabu yare po gabu irde Yuda marte tikula po nurde hinhan. Yenbe Sairini taunya Aleksandria taunyare mat wayamiņ. Kurabe Silisia nanaya Esia nanayare mat wayamiņ. Be, mel goreb wan Stiwen gogo merere fulenja iramiņ. ¹⁰ Gega

[†] 6:9: “Doyan Mar Minmon Mar” gabe bikken al hoyan belen yukun meten marmiņ yirde hinhan. Goyenbe murungem mon meten ten hinhan. Irde dufaymiņde kun wan titek mon. Doyan marmiņyen mere po gama irde meten ten hinhan. Goyenbe doyan marmiņ belen yubul tike dufaymiņde kwamiņ goke tenbe denje gwahade yurde hinhan.

Stiwenbe Al Kurunyen Holi Spirit belej faran urkeb kenkela po dufay henya mere yirke asogo irnin yen wayamin mar goyen gwaha mat kura wol hetek yen ma nuramin.

¹¹ Irkeb mel gore al kura balminde hoy yirdeb, “Den belej kunbe, ‘Stiwen belej Moseya Al Kurunya sukal yirke nurtin,’ yen al momon yirde tukunayin,” yinen bin yawaramin. ¹² Irkeb kunbe gwahade po tagalkeb Yuda marte doyan mar parguwakya Moseyen saba basan hen tagal tagal maryabe al buda gote mere go nurdeb bin ar yamin. Irdeb Stiwen fere tenbe mere yare tukamin. ¹³⁻¹⁴ Irdeb merere gor usi titek yen al kura yawaramin gore huwardeb, “Al garebe, ‘Nasaret nin al Yesu belej Al Kurunyen ya balem gayen pir iryen, irde Mose belej mata ten hinayin yen dunyin goyen wor yade hoyan hoyan yiryen,’ yeke nurtin. Al gabe ya balem gaya Yuda marte tikula goyen wor gwahade po huginen sukal yirde hiyen!” yinamin. ¹⁵ Irkeb merere gabu iramin mar gob Stiwen belej daha mat wol heke nurnin tihit yen tumnan her yen kenamin. Irkeb Stiwen kiminbe al bulak wor po Al Kurunyen miyon yara heke kenamin.

7

Stiwen belej saba tiyyin

¹ Irdeb Al Kurun dolon ird ird mata doyan marte kurunmin belej, “Stiwen, mel gare mere ulger irde han gayenbe fudinde?” yen gusunan iryin. ² Irkeb Stiwen belej wol henbe gaha inyin: “Mel, kadne yago, ga nurnan. Bikken

wor pobe hakwaniniŋ Abrahambe Mesopotemia naŋare hinhin. Goŋ po hikeya Al Kurun saŋiŋmiŋ turuŋuŋ yaŋ gore diliŋde forok yeŋbe, ³ ‘Naŋageya tayge yagoya yubul teŋbe naŋa ne belen gikala gireŋde gor kwayiŋ,’ inyiŋ. ⁴ Irkeb Abraham gobe Kaldia marte naŋa Mesopotemia goyen tubul teŋbe Haran taunde kuŋ gor hinhin.

“Be, naniŋbe gor kamkeb Al Kurun belen Abraham teŋ kerke Yudia naŋa ga hite gayenter wayyiŋ. ⁵ Gega Al Kurun belen megeŋ tapum muŋ kura ma unyiŋ. Hubu wor po. Irde gor hinhinya goyenbe diriŋ wor hubu. Gega Al Kurun belen megeŋ Abraham keperde hinhin gayen yeŋya foŋeŋmiŋ yagoya niŋ tubul teŋ yunmeke yende kudiŋeŋ hiyyeŋ yeŋ Abraham hitte biŋa tiyyiŋ. ⁶ Goya goyenbe gaha inyiŋ: ‘Foŋeŋge yagot diriŋeŋ weŋbe almet naŋare kuŋ albak hinayiŋ. Irkeb naŋa miŋ mar belen dama 400 gayen gasa yirde buluŋ buluŋ yirke meten muruŋgem moŋ teŋ hinayiŋ. ⁷ Gega foŋeŋge yago buluŋ buluŋ yirde hinayiŋ mar gobe ne gare gab yeneŋ. Go kamereb foŋeŋge yagobe naŋa go tubul teŋ waŋ megeŋ gayenter doloŋ nirde hinayiŋ,’ inyiŋ. ⁸ Irdeb kame Al Kurun belen biŋa tiyyiŋ goke, ‘Ne biŋa teŋ himyen goyen fudiŋde yeŋ nurnayiŋbe geya foŋeŋge yagoyabe guba yeŋ yeŋ mata teŋ hinayiŋ,’ inyiŋ. Be, kamereb urmiŋ Aisak forok yiriŋ. Irkeb urmiŋ go kawaŋ hiriŋde mat kuŋ naŋa fay 8 hekeb guba yeŋ unyiŋ. Be, Aisakbe kame Yekop naniŋ hiriŋ. Irdeb Yekopbe urmiŋ yago 12 miŋyaŋ hiriŋ. Be, mel goreb hakwaniniŋ yago hamiŋ.

9 “Be, hakwaniniñ 12 kura Yosepbe naniñ belen yeñ po amanen nurde igiñ igiñ irde hinhin. Irkeb itin yago belen daniñ nenbe gwahade ma dirde hi yeñ bin ar yekeb kulin Yosep nin igiñ ma nurdeb, ‘Al kura hitte kun murungem mon meten ten ten almin hiwi,’ yeñ al yunke damu tiyamin. Be, Yosep damu tiyamin mar gore tenbe Isip kwamin. Goyenbe Al Kurunbe yenya huginen hen faran urde hinhin. 10 Ningeb kanduk kurayen kurayen yenen hinhin gega, Al Kurun belen faran urde hikeb igiñ po hinhin. Irde dufay igiñ wukken wor po unkeb go hende mata ten hikeb Isip nin doyan al kurun Fero belen igiñ kinyin. Be, Fero belen Yosep go dufaymin wukken kenenbe Isip nana gote doyan al irdeb dawetmin yago tumnan, ‘Doyan yirde hayin,’ inyin.

11 “Be, go kamereb Isip nanaya Kenan nanaya bana gonbe bingeb kamde kamde nalu kurun wor po forok yekeb hakwaniniñ yagobe bingem mon hamin. 12 Be, Yosep naniñ Yekop go Isip nanabe bingem yan mere momon nurdeb hakwaniniñ yago gogo yad yerke kwamin. Be, mel gobe Isip ma kun hanjen. Tinjen gog po ga kwamin. 13 Be, mel go Isip mat tiyunminde mulgan hamin. Hen henbe sopte Isip kukeb Yosep belen yingen ge, ‘Nebe al gwahade,’ yeñ itin yago momon yiryin. Be, Yosepyen min gote mere momon goyen Isip nin doyan al kurun wor nuryin.

14 “Be, go kamereb Yosep belen naniñ Yekopya dirnen wenya asem yagoya 75 hinhan goke wanan yeñ keya heke wayamin. 15-16 Irdeb gor hinhan. Be, gor hen henbe Yekop go kamkeb

hakwambe tenj tiyujminj Sekem tukaminj. Be, Sekem gorbe Hamor urminj yago belenj al hakwam yerd yerd ninj hora talde horabok yiraminj goyen Abraham belenj damu tiyyinj. Nijgeb Yekop hakwam gobe tukunj gor po keraminj. Irdeb kame hakwanininj 12 goyen wor kamkeb yukunj gor po yeraminj.

¹⁷ “Be, Al Kurunj belenj Abraham hitte binj tiyyinj gote iginenj forok yetek nalu henj hikeb nende al Isip hinhan gobe kurunj bulunj fuful tiyyinj. ¹⁸ Goyenterbe al hoyanj kura Yosep ma nurde untinj al gore Isip nanja gote doyanj al kurunj hirinj. ¹⁹ Irdeb yingenj iginj henj henj ge po nurde asininj yago usi yirdeb bulunj bulunj yirninj yenj nurdeb, ‘Dirinjinj yago besare ninj goyen yemeyke kamnanj,’ yenj patku yirde hinhin.

²⁰ “Be, goya goyenbe Mose kawanj hirinj. Yenbe dirinj mali yara moj. Al Kurunj dilinde iginj kinyinj. Dirinj gobe Isip mar belenj kennak yenj naninya milinya belenj gagasi karwo gayen yaminj bana po balminj kerde hinaryum. ²¹ Gega dirinj gobe ya bana balminj kerde hitek ma hekeb naninya milinya belenj tukunj hoyande tubul tikeb Isip ninj doyanj al kurunj Fero wirinj belenj kenenj tenj tukunj yende irde mosoy heke kurunj hirinj. ²² Mose go kurunj henjyabe Isip marte saba karkuwanj kurayen kurayen yawaryinj. Irde mereminja metenjinjyabe tarej wor po hirinj.

²³ “Be, Mose gobe kunj damam 40 hirinj. Be, wawunj kurarebe dinunj Israel mar yene yenj kurinj. ²⁴ Kunjbe Isip al kura gore Israel al kura goyen bulunj wor po irde hike kinyinj. Irdeb

Israel al goyen faran ure yenbe wol hen Isip al go mayke kamyin. ²⁵ Be, Mose gobe dufaymindeb, ‘Mata tihim gayen kenenbe Israel mar belen Isip marte haniinde mat dumulgan ten ten al Al Kurun belen basina irtin albe gago yen bebak tahan,’ yen nuryin. Gega gwahade mon.

²⁶ “Be, fay urkeb sopte Israel mar hitte kurin. Kunbe Israel mar iraw kura yingen ulin arde hike yinyin. Irdeb daha mat kura mere yirmekeb awalik hiri yenbe, ‘Irem, dani ditdigiren ulin arde har? Derbe min unken po geb!’ yinyin. ²⁷ Goyenbe al kura kadom mayde bulun wor po iryin al goreb Mose upel urdeb, ‘Ganun belen nende doyan al gerde mere sope ird ird al girun? ²⁸ Gwaha tenbe ki Isip al mayke kamun gwahade goyen po niren taha?’ inyin. ²⁹ Irkeb mere go nurdeb Mose gobe Isip nin al mayke kamyin goke busaharde Midian marte nanare kurin. Irdeb gon albak henbe bere ten urmin irawa minyan hirin.

³⁰ “Be, Midian marte nanare kun dama 40 gon hinhin. Be, dama 40 goyen kamereb Sainai dugu bindere sawsawa po kurun nana bana gon kurin. Kunbe he dirnen kura goyen kak melak hen humga kutin yara ten hinhinde gor Al Kurunyen miyon forok yeke kinyin. ³¹ Be, Mose gob goyen kenenbe dilin fot yeke bindere kun kenkela po kene yen kurin. Irkeb kak melak hinhinde gor mat Doyan Al Kurunyen mere forok yeke nuryin. ³² ‘Nebe Al Kurun, asige yago Abraham, Aisakyabe Yekopya belen dolon nirde hinhan al go goyen,’ inyin. Irkeb Mose go kafura hen ulin

barbar yeke kak melak goyen kentek ma iryinj. ³³ Irkeb Doyan Al Kurun belen, ‘Ge huwarde hare gabe ne hime. Ningeb al mali watek mon, himam wor po. Ningeb kahanbasange go yugu tiya! ³⁴ Nere alya bereya Israel marbe Isip mar belen bulun bulun yirde han gobe yenen hime. Irdeb ulinj misinj bulun wor po katen han goyen nurdeb Isip marte yufukde mat yumulgan tiye yen katehem. Ningeb ga nura. Sopte Isip gumulgan timeke kwayinj,’ inyinj.

³⁵ “Be, Mose gobe han kanya Israel mar belen pel irdeb, ‘Ganun belen nende doyan al gerde mere sope ird ird al girun?’ inke Midian marte nanare busaharyinj al go goyen. Gega Al Kurun belen, ‘Mosebe Israel marte doyan al hiyyen. Irde yende alya bereya Isip marte yufukde mat yumulgan ten yukun asem yago bikken hinhan nanare gor yukuyen,’ yenbe ten kerke Isip mulgan hen kurinj. Kukeb Al Kurunyen miyon kak melak bana forok yen mere iryinj gore faran urde hinhin. ³⁶ Irkeb Israel mar goyen Isip nanare mat doyan yirde yukurinj. Nana go tubul tiyenbe Isip nana bana gonbe mata tinen kurayen kurayen Al Kurun belen po yirtek goyen forok yiryinj. Irde makan kura Makan Bukken inen hanyende gor manan mata tinen kurun kura forok iryinj. Irde sawsawa nana al ma hitek bana gon dama 40 hinhanya goyenter wor gwahade po ten hinhin.

³⁷ “Be, Mose, go ten hinhin al goreb mel Israel mar goyen gaha yinyinj: ‘Kamebe Al Kurun belen den minde ga nin po mere basan almin kura ne yara ten kerke fonjentin yago hitte wayyen,’

yinyiņ. ³⁸ Be, Mose goreb asininiņ yago Isip tubul tiyamiņ mar goyen tumņaņ sawsawa naņa bana goņ gabu yirke gor hinhan. Irkeb Sainai dugure hurkuņ Al Kurunyen miyoņa mere tenbe kateņ asininiņ yago mere yiryiņ. Yeņbe dugure gor heņbe miyoņ gore asininiņ yagoya neņ kamekken gake ten Al Kurunyen mere gwahader hitiņ goyen unyiņ.

³⁹ “Be, Mose beleņ dugure hurkuņ Al Kurunyen mere nureņ yeņbe asininiņ yago gwaha gwaha tinayiņ yinenbe hurkuriņ. Gega goyen ma gama iramiņ. Gwaha titņeņbe meremiņ go pel irde Isip niņ biņ mulgaņ hamiņ. ⁴⁰ Niņgeb Mose go dugure gor po hikeya mel gore itiņ Aron hitte kuņbe, ‘Kolge Isip naņare mat dad wayuņ al gobe Sainai dugure hurkuņ det kura irde mulgaņ ma heņ hi gobe go ma nurde hite. Niņgeb igiņ dinke nindi-geņ det toneņ kura yirde doloņ yirtek. Irkeb gore doyaņ dirke kuņ hitek,’ inamiņ. ⁴¹ Irdeb goya goyen gab gol hora beleņ po bulmakaw foņeņde toneņ iramiņ. Irdeb Al Kurunniņiņ yeņ dapņa gasa yirde yawaņ galak irde det yiņgeņ haniņde iramiņ goke amaņeņ wor po nuramiņ. ⁴² Irkeb Al Kurun beleņ goke igiņ ma wor po nurdeb harhok yunke mel gote dufaymiņde po naņkiņde niņ det naņa, gagasiya dinambeya goyen doloņ yirde hinhan. Be, goke tenbe Al Kurunyen mere basaņ mar beleņ asaņdebe gahade katiņ hi:

‘Deņ Israel mar, dama ⁴⁰ sawsawa naņa bana hinhanya goyenter dapņa gasa yirde galak heņ hinhan kurun gobe ne niņ moņ.

⁴³ Irdeb sel ya irde usi tikula al Molek ineņ hanyen

goyen bana goŋ kerde doloŋ irde tukun hinhan.

Irde kurabe Refan inenŋ hanyen goyen manan gwahade po irde hinhan.

Det gobe Al Kurunŋ niŋ ma nurde hanyen mar beleŋ doloŋ irde hanyen goyen deŋ manan hantiŋde yirde doloŋ yirde hinhan.

Niŋgeb goke teŋbe naŋatiŋde mat dakira timekeb Babilon naŋa gisaw yeŋ nurde haŋ goyen fole irde sorte wor po kuŋ kunayiŋ, yitiŋ hi.

Amos 5:25-27

⁴⁴ “Be, Al Kurunŋ beleŋ, ‘Sel ya kura gahade irayiŋ,’ inenŋ Mose ikala irde tuŋaŋen unyiŋ. Irkeb asininiŋ yagobe Al Kurunŋ beleŋ Mose inyiŋ goyen po gama irde ya go iramiŋ. Irde sawsawa naŋa bana goŋ henya, ‘Al Kurunbe nenya hite,’ yeŋ nurde sel ya goyen tukun hinhan. ⁴⁵ Be, go teŋ hinhan mar gobe tumŋaŋ kamde hubu hekeb diriŋen weŋ kame forok yamiŋ mar gore sel ya go tamiŋ. Goya goyenbe Yosua beleŋ doyaŋ yirde yukuriŋ. Irkeb Al Kurunŋ beleŋ Kenan naŋa miŋ mar goyen yeŋ wa meheŋ heŋ yakira tikeb mel gore kame kuŋbe naŋa go tamiŋ. Be, gor kuŋ henya be Al Kurunŋ doloŋ ird ird sel ya goyen manan teŋ kuŋ hinhan. Be, kame Dewit beleŋ Israel marte doyaŋ al kurunŋ hiriŋ goyenter manan sel ya gobe hinhin po. ⁴⁶ Be, Dewit gobe Al Kurunŋ beleŋ amaŋenŋ wor po nurde unenŋ hinhin. Niŋgeb hakwaniniŋ Yekop beleŋ doloŋ irde hinhin Al Kurunŋ goyen Dewit beleŋ, ‘Ya tareŋ ird unmeke gor hiwoŋ,’ yeŋ nurde gusuŋaŋ iryiŋ. ⁴⁷ Goyenbe ya gobe yeŋ beleŋ ma iryiŋ. Urmiŋ Solomon beleŋ ga iryiŋ. ⁴⁸ Gega det kurunŋ gayen doyaŋ

yirde hi Al Kurun̄ gobe al ya irtin̄ bana goṅ ma hiyen. Niṅgeb goke teṅbe Al Kurun̄ beṅ yirin̄ goyen nurdeb mere basaṅ almin̄ Aisaia beṅ gahade kayyin̄:

49-50 ‘Be, Al Kurun̄ beṅ gaha yirin̄:

Megenya nan̄kin̄ya det kurun̄ gabe nigen̄ yir-mirin̄.

Irdeb nan̄kin̄be nere keperd keperd gasun̄ irde, meṅgeṅbe kahaṅne kerd kerd det irmirin̄.

Niṅgeb ya dahade go goyen irde nunen̄ yeṅ ha?

Ne heṅ heṅ gasun̄be al beṅ epte ma ird nun-nayin̄,’ yirin̄.

Aisaia

66:1-2

51 “Be, merebe gwahade yitin̄ gega, deṅbe ya gake ugun̄ po nurde ya gayen sukal irde hiyen yeṅbe merere gago nerhaṅ? Deṅ gab tonan̄tin̄ tareṅ wor po. Deṅbe Al Kurun̄ nin̄ ma nurde haṅ mar beṅ teṅ haṅ yara. Bitin̄ya kirmin̄tin̄yabe titmin̄ wor po. Al Kurun̄yen mere nurde bebak titek moṅ. Irde asinin̄in̄ yago beṅ mata teṅ hinhan gwahade po deṅ manan̄ Holi Spirit pel irde haṅ. 52 Deṅ gayenbe asinin̄in̄ yago beṅ Al Kurun̄yen mere basaṅ marbe okohom kura yubul teṅ hinhan yeṅ nurde haṅ? Moṅ, hubu wor po geb! Al Huwak wor po kame watek goke tagalde hinhan mar goyen gasa yirke kamde hinhan. Irdeb gayenter al goyen wor forok yeke deṅ beṅ pel irde mayke kamuṅ. 53 Deṅbe Al Kurun̄yen miyoṅ beṅ Yuda marte tikula Mose unyin̄ goyen asinin̄in̄ yago beṅ deṅ gayen ga wor wor dunamin̄. Gega goyen muṅ kura ma gama irde haṅ,” yinyin̄.

Horare Stiwen mayke kamyin

⁵⁴ Be, Stiwenyen mere go nurdeb al merere keperde palna irde hinhan mar goreb mam isen bearar tiyamin. ⁵⁵ Gega Stiwen go Holi Spirit belen hard unkeb kotan kan nankinde nankenenbe Al Kurunyen sanin turnun yan goyen kinyin. Irdeb Yesube Al Kurunyen hani yase belen harde hike kinyin. ⁵⁶ Irdeb, “Ga kenan. Nan kin hol yeke Al Urminbe Al Kurun hani yase belen huwarde hike kenhem,” yinyin. ⁵⁷ Irdeb mere go nurtek ma yirke kwep kwep irde kirmin migisun yurdeb Stiwen hitte kup yen kun tanardebe megen korkor irde tulun ten Yerusalem taun sinare ten kwamin. ⁵⁸ Irdeb Stiwen go maynin yen ulinhormin yugu ten al fonen kura denembe Sol gote kahan minde yeramin. Irde hora yadeb Stiwen mayde hinhan. ⁵⁹ Be, mayde hinhanya goyenbe Stiwen belen huwardeb, “Doyan Al Kurun Yesu, tonnebe hanger kerhem,” inyin. ⁶⁰ Irdeb dokolhon yugulun ten kawan po, “Doyan Al Kurun, mel gare mata bulun tahan gake ma nurayin,” inyin. Be, mere gwahade ten gab bubulkun sul yirin.

8

¹⁻² Goyare goyenbe Sol belen Stiwen kamyin goyen kenenbe igin po kama yen ayan kiryin.

Be, al kura Al Kurun kenkela nurd unen hinhan mar belen al hakwa go tukun mete tenbe dolonde hinhan.

Sol belen yirke Yesuyen alya bereya sios bur yamin

Be, goyenterbe Yesuyen alya bereya sios Yerusalem hinhan go ulinje kanduk kurun wor po forok yeke kenenbe bur yen kurabe Yudia nanare kwamin, munan kurabe Samaria nanare kwamin. Gega aposel buda 12 gobe Yerusalem gor po hinhan. ³ Be, Sol gobe sios goyen gwaha yirmeke gab bada hena yen nurdeb ya kurar mat kurar kun Yesuyen alya bereya bulun bulun yirde yukun koyare yerde hinhin.

Filipbe Samaria nanare kurin

⁴ Be, al bur yen kwamin mar gobe tiyun kurar mat kurar kunbe mere igin Yesu nin yitin goyen tagalde kun hinhan. ⁵ Be, Filip wor Samaria nanare nin taunde kura gor kun Yesube Mesaia yen kawan po tagalde hinhin. ⁶ Irkeb meremin nurde hinhan. Irde Filip beley mata tinen Al Kurun beley po ga yirtek goyen wor forok yirde hike yenenbe mere ten hinhin goyen upsinen nurnin yen wan hinhan. ⁷ Be, Filip beley mata tinen forok yirde hinhin gobe al budam ungura ketal yurtin goyen ungura go yakira tike gisi ten al go yubul ten kat kun hinhan. Irde al ulin simsimamya sisibuga garbam minyan marya kurun goyen wor sope yirke igin hen hinhan. ⁸ Irkeb gor nin marbe amanen wor po nurde hinhan.

Kalga al Saimon

⁹ Be, han karya wor po Filip gor ma kurinyabe al kura denembe Saimon, taun goyenter hinhin. Gor henyabe megen nin tarende mata ten hike Samaria nana bana gon nin mar beley turun yan kenen hinhan. Irkeb, "Nebe al gwahade,"

yeŋ yiŋgeŋ turuŋ turuŋ irde hinhin. ¹⁰ Irkeb taun goyenter niŋ maryabe doyaŋ mar kuruŋ goreb, “Al gabe tareŋmiŋ kuruŋ. Al Kurunyen Tareŋ ineŋ hanyen gobe gago,” yeŋ dufaymiŋ yeŋ ge po irde gama irde hinhan. ¹¹ Taun goyenter niŋ marbe al gore nalu ulyaŋde po megen niŋ matara mata tiŋeŋ forok yirde hike turuŋ yaŋ keneŋ gama irde hinhan. ¹² Gega Filip beleŋ taun goyenter kuŋ Al Kuruŋ beleŋ doyaŋ yird yird mataya mere igiŋ Yesu Kristu niŋ yitiŋ goyen tagalkeb alya bereya mere gobe fudinde yeŋ nurdeb baptais tamiŋ. ¹³ Be, Saimon goyen wor Filipyen mere go fudinde yeŋ nurdeb baptais tiriŋ. Irdeb Filip beleŋ mata tiŋeŋ karkuwaŋ kurayen kurayen forok yirke turuŋ yaŋ keneŋbe Filip go kurar mat kurar kuŋ hikeb gama po irde hinhin.

¹⁴ Be, aposel buda Yerusalem hinhan mar go, “Samaria naŋare niŋ marbe Al Kurunyen mere nurde fudinde yeŋ dufaymiŋ saŋiŋ iran,” yeke mere momoŋ nuramiŋ. Irdeb Pitaya Yonya yad yerke Samaria naŋare niŋ taunde gor kwaryum. ¹⁵⁻¹⁶ Be, irem go kuŋ gor forok yaryum. Goyenbe Yesu niŋ dufaymiŋ tareŋ irde hinhan mar goyen yiŋgeŋbe Doyaŋ Al Kuruŋ Yesuyen al hihit yeŋ fe baptais po tamiŋ gega, al uŋkureŋ muŋ kura Holi Spirit ma tiriŋ goyen nuraryum. Niŋgeb Holi Spirit wor tenayiŋ yeŋ irem gore Al Kuruŋ gusuŋaŋ iraryum. ¹⁷ Goya goyenbe mel gote tonan hende haniŋ yerde Al Kuruŋ gusuŋaŋ irkeb Holi Spirit tamiŋ.

¹⁸ Be, megen niŋ tareŋde mata teŋ hinhin al Saimon go alya bereya Holi Spirit tamiŋ go

yenenbe horaminj tenj wayyinj. ¹⁹ Wanbe, “Irem, hora ga dunenj geb, derte sanjij go nunyi. Irkeb ne wor al kura tonande hanne yemekeb Holi Spirit tenj hinayinj,” yinenj hora go yunenj tiyyinj. ²⁰ Irkeb Pita belenj wol henbe, “Ge gayen Al Kurunj belenj Holi Spirit dulinj dunenj hi goyen hora po damu tiyenj yenj nurde ha? Epte monj geb. Gebe gwahade nurde ha geb, horage goya gigenyabe kak alare po kuriryenj. ²¹ Dufay haha gobe Al Kurunj dilindeb bulunj wor po geb, metenj gabe geya titek epte monj. ²²⁻²³ Dufaygebe bulunj wor po. Beger gobe dufay bulunj gore po makinj girtinj ha. Irde mata bulunj gore po tugu guntinyen genhem. Ninjgeb dufay bulunj haha gobe tubul po tenjbe Al Kurunj ninj bege mulganj hiyyenj. Gogab yenj belenj gab mata bulunje go halde gunyenj,” inyinj. ²⁴ Irkeb Saimon go mere goyen nurde wol henbe, “Ne ninj tenj Al Kurunj gusunjanj ird nunayinj. Irkeb, ‘Gebe dufay bulunj gwahade minyanj geb, mata gwahade ulger forok yiyyenj,’ ninha goyen ulner ma forok yiyyenj,” inyinj.

²⁵ Be, Pitaya Yonya gobe taunde gor ninj mar Yesu ninj tagalde henya yenjbe Doyan Al Kurunj goyen momonj yirdeb yubul tenj kwaryum. Yubul tenj Yerusalem mulganj henj kunj henjyabe tiyunj budam Samaria nanja bana gonj ninj alya bereya goyen Yesu ninj yitinj mere iginj goyen momonj yirdya yirdya kwaryum.

Filip belenj Itiopia nanjare ninj doyanj al kura fe baptais iryinj

²⁶ Be, go tenj hinaryumya goyenbe Doyan Al Kurunjen miyonj kura belenj Filip gaha

inyiņ: “Huwarde naŋa ga tubul teņ belen kura Yerusalem mat Isip kurkutiņ hire gor kwayiņ. Kuņbe belen haniņ Gasa taun belen kutiņ keneņbe goyen gama irde kwayiņ,” inyiņ. (Be, Gasa kuņ kuņ belen gobe gayenterbe go ma kuņ hanjen, tubul tiyamiņ.) ²⁷ Be, miyon gore gwaha inkeb Filip go huwardeb belen go gama irde kuriņ. Kuņbe Itiopia naņare niņ al salanneņ deņem yaņ kura waņ hike kinyiņ. Al gobe Itiopia naņare niņ doyaņ bere kurun Kandasien samun doyaņ yird yird al. Yeņbe Yerusalem kuņ Al Kurun dolon irdeb mulgaņ heņ naņam kuņ hinhin. ²⁸ Yeņbe nima kura hos belen yulun teņ hanjen hende gor keperde kuņ henyabe Al Kurunyen mere basan al Aisaia belen asande mere kayyiņ goyen kapyan heņ hinhin. ²⁹ Be, Holi Spirit belen Filip goyen, “Nima waņ hi goyen bindere kwa,” inyiņ. ³⁰⁻³³ Irkeb Filip gobe kup yeņ nima goyen bindere kuņbe al goyen Al Kurunyen mere basan al Aisaia belen asande kayyiņ goyen kapyan heņ hike nuryiņ. Be, Al Kurunyen mere kapyan heņ hinhin gobe gahade: “Sipsip gasa yirde hanjen gasunde sipsip yukutiņ gwahade goyen, yeņ wor mayniņ yeņ tukamiņ.

Al gobe sipsip dirneņ wuyneņ walde hikeyabe balmiņ po hanjen go gwahade goyen yeņ wor mere mun kura ma tiyyiņ.

Al gobe megen niņ mar belen merere kerde nanyaņ iramiņ.

Irde mere sope ird ird doyaņ marbe mere fudinde goyen ma gama irde bulun mat kwamiņ.

Al gobe megen niñ mar belen mayke kamiñ. Niñgeb al ganuñ belen epte goyenter niñ marte mata buluñ kurun gobe gwahade yeñ tagalyen? Hubu wor po!” yitiñ hi. *Aisaia 53:7-8*

Be, Filip belen mere go nurdeb Itiopia niñ al goyen, “Mere kapyañ haha gob miñbe goke yitiñ yeñ bebak taha?” inen gusuñan iriyiñ. Irkeb al goreb, “Moñ, al gore kura miñ gwahade niñ katiñ ma ninen hiyen. Niñgeb daha mat miñ nuren?” iniyiñ. Gwaha inenbe, “Wañ kepera,” inke Filip gob nima go hende hurkun ketalminde kipiryiñ. ³⁴ Irkeb al goreb Filip iniyiñ: “Mere gabe Al Kurunyen mere basañ al ganuñ niñ wor po yitiñ? Yingen ge ma al hoyañ ge? Ge gab bebakken daw nurde ha? Nurde ha kenem igiñ bebak nirayiñ?” iniyiñ. ³⁵ Irkeb al gore Aisaia belen mere kayyiñ kapyañ heñ hinhin gote miñbe Yesu niñ yeñ hi inenbe Yesu ulin de mata forok yiriñ goyen momon iriyiñ.

³⁶⁻³⁷ Be, irem go kunbe fete kura gor forok yaryum. Irdeb Itiopia al goreb, “Febe ima go hi geb, igiñ gor baptais nirayiñ?” iniyiñ.* ³⁸ Gwaha inenbe al goreb meten marmin goyen, “Gar mun kura heñ ga kutek,” yinkeb usañ hamiñ. Irkeb Filip belen al goyen tukun fe bana baptais iriyiñ. ³⁹ Be, irem go fe tubul ten sinare hurkukeb Doyañ Al Kurunyen Holi Spirit belen bemel po Filip bana

* **8:36-37:** Asañ kurareb gahade katiñ hi: ³⁷ Irkeb Filip belen wol henbe, “Gebe mere gayen bubulkunger mat fudinde wor po yeñ nurha kenenbe igiñ baptais giren,” iniyiñ. Irkeb al gore, “Gwaha, Yesu Kristube Al Kurun Urmin goyen fudinde wor po nurde hime,” iniyiñ.

kerde tenj hoyande kurin. Irkeb Itiopia al gore ma kinyin. Goyenpoga al gobe Yesu nurde unhem yej aman wor po hen nanam kurin. ⁴⁰ Be, Filip gobe Holi Spirit beley bana kerde tukun Asdot taunde irdeb kawan irke forok yirin. Irkeb gor mat Sisaria taunde kwe yej kun henyabe taun kurayan kurayan mere igin Yesu nin yitin goyen tagalde kun kunbe Sisaria taunde forok yirin.

9

Sol beley Yesu nin bin mulgan hirin

¹ Be, Filip beley Samaria nanare kun gwaha tenj hikeyabe Sol gobe alya bereya Yesu nin dufay taren iramin mar goyen gasa yirde bulun bulun yirtek po nurde Al Kurun doloj ird ird mata doyan mar pris buda gote kurunmin hitte kurin. ² Kunbe gaha inyin: “Damaskus taunde nin Yuda marte gabu ya buda gote doyan mar hitte kunbe dufanne momon yiren. Irmeke faran nurkeb Yesu gama irde han mar kura yenenbe fere yirde Yerusalem gar yawayen. Ningeb asan kan nunayin. Irkeb kun gor nin gabu ya doyan mar yikala yirmekeb faran nurnayin,” inyin.

³ Be, Sol gobe kun Damaskus taun binde hekeb bemel po nankinde mat hushi taren kura nana folekken kurun gore yej hitte timiyyin. ⁴ Irkeb deldol wor po irdeb megen takten mayyin. Irkeb goya goyenbe al melak kura, “Sol, Sol, danin mununen bulun bulun nirde ha?” yeke nuryin. ⁵ Irkeb Sol beleybe Doyan Al Kurun goyen, “Ge be ganun?” inen gusunan iryin. Irkeb wol henbe, “Nebe Yesu, mununen bulun bulun nirde ha al

goyen. ⁶ Niŋgeb huwara. Huwardeb Damaskus taunde gor kwa. Irkeb al kura goreb gwaha gwaha tiyayiŋ ginyeŋ,” inyiŋ.

⁷ Be, Solya kuŋ hinhan mar goyen wor mere go nuramiŋ gega, al gore kura mere tiya yeŋ ma kenamiŋ. Irdeb ŋakŋak teŋ mere ma tiyamiŋ. ⁸ Be, Sol gobe takteŋ mayyiŋde gor mat huwardeb naŋkenhem yiriŋ gega, diliŋ kidoma wor po hiriŋ. Irkeb det yentek ma wor po hiriŋ. Irkeb yeŋya kuŋ hinhan mar gore go keneŋbe haniŋde tanarde Damaskus taunde tukamiŋ. ⁹ Tukuke gorbe naŋkahal karwo gayen diliŋ titmiŋ gwahade po hinhin. Irkeb biŋgeya feya kutŋa irde hinhin.

¹⁰ Be, goya goyenbe Yesu niŋ dufaymiŋ saŋiŋ irtiŋ al kura Damaskus taunde gor hinhin. Deŋembe Ananaias. Be, Doyaŋ Al Kuruŋ belen yuwarwarte forok yeŋbe, “Ananaias,” inyiŋ. Irkeb wol heŋbe, “Doyaŋ Al Kuruŋ, dahade?” inyiŋ. ¹¹ Irkeb gaha inyiŋ: “Tarsus taunde niŋ al kura deŋembe Sol goyen Yudasyen yare heŋ Al Kuruŋ mere irde hi. Niŋgeb Belen Huwak inen hanŋen goyen gama irde kuŋbe yamiŋde forok yeŋbe Sol niŋ gusuŋaŋ irayiŋ. ¹² Yeŋbe diliŋ titmiŋ hiyuŋ goyen yuwarwarte al kura deŋembe Ananaias belen kuŋ igiŋ hiwi yeŋ haniŋ tonanŋde kerde Al Kuruŋ gusuŋaŋ irde hike kinuŋ,” inyiŋ. ¹³ Gwaha inkeb Ananaias belenbe gaha inyiŋ: “Doyaŋ Al Kuruŋ Yesu, al budam belen al goke tagalke nurmiŋ. Al gobe ge gama girde haŋ mar Yerusalem haŋ goyen buluŋ wor po yiruŋ. ¹⁴ Irdeb pris buda gote kuruŋmiŋ belen, ‘Kuŋ

Damaskus gor Yesu doloŋ irde haŋ mar fere tiyayin,' inke gar wayuŋ,” inyiŋ. ¹⁵⁻¹⁶ Gwaha inkeb Doyaŋ Al Kuruŋ Yesu belen, “Al gobe meteŋne tiyyeŋ yeŋ hakot basaŋa irmiriŋ. Yeŋ belenbe naŋa kuruŋ gayen kuŋ henyaŋbe al miŋ hoyanya doyaŋ marminiyaŋbe Israel marya hitte kuŋ ne niŋ tagalde tukuyeŋ. Yeŋbe ne niŋ teŋ kame uliŋ misiŋ kuruŋ katyeŋ goyen ikala ireŋ. Niŋgeb kuŋ ginhem gwahade po irayiŋ,” inyiŋ. ¹⁷ Gwaha inkeb Sol hinhin yare gor kuriŋ. Kuŋ keneŋbe haniŋ tonanđe yerdebe, “Kadne, gar waŋ hikeya Doyaŋ Al Kuruŋ Yesu belen forok yeŋ mere giriŋ al gore nad nerke gago wayhem. Niŋgeb delgebe sopte igiŋ hiriryen. Irde Holi Spirit hard gunyeŋ,” inyiŋ. ¹⁸ Irkeb goyare po det kura makaŋ dapŋa kakafok yara diliŋ pet tike kidoma hiriŋ kuruŋ goyen wok yekeŋbe sopte wuk yeke det yinyiŋ. Irkeb Ananias belen tukun fe bana baptais iryiŋ. ¹⁹ Be, baptais tirin kamereb sopte biŋge nekeŋbe uliŋ yul yiriŋ goyen tareŋ hiriŋ.

Sol Damaskus taunde heŋ Yesu niŋ tagalyin

Be, Sol gobe Damaskus taunde gor niŋ mar Yesu niŋ dufaymiŋ tareŋ iramiŋ goya nanƙahal karwo ma sipte gwahade gor hinhin. ²⁰ Irdeb mel goya muŋ kura ulyanđe ma henyaŋbe aran po sabamiŋ miŋ ure yeŋ Yuda marte gabu yayan kuŋbe, “Yesube Al Kuruŋ Urmiŋ,” yeŋ tagalde kuŋ hinhin. ²¹ Irkeb al buda meremiŋ nuramiŋ mar gore goyen keneŋbe hurkuŋkat tenbe, “Al gabe Yerusalem gor Yesu gama irde haŋ mar bulun bulun yirdeb gar niŋ Yesu gama irde haŋ

mar wor yad fere yirde pris buda gote kurunmin hitte yuke yen wayun al goyen gago mon? Ningeb daha ten hibe gago?” yen kadam gusunan gird tiyamin. ²² Gega gise hanka Sol beley saba ten hike sabaminbe tonnen yan hen hinhin. Irde, “Yesube Mesaia,” yen hike Yuda mar Damaskus hinhan mar gob gwaha mat kura mere titek mon hamin.

²³ Be, nalu budam hubu hiri. Goyenbe Yuda mar beley gabu irdeb mayteke kami yen sege iramin. ²⁴ Gega al kura beley mel gote dufay goyen momon irke nuryin. Be, mel gobe koya kurun Damaskus taun milgu irtin gote yame karkuwande kurar mat kura Sol go wan sinare kwen tikeb maytek yen wawunya nankehalya usan minmon yameyan goyan pet ten hinhan. ²⁵ Gega wawun kurarebe Solyen mere nurde gama irde hinhan mar beley hora karkuwan po koya kurun irtin hende hoyan taun go milgu irtin goyen yamende mat Sol goyen tiri kurun bana kerdeb hulyanalde palgir irke megen kurkurin. Irdeb gor mat Damaskus taun go tubul ten kurin.

Solbe Yerusalem mulgan hiri

²⁶ Be, Sol gobe Damaskus tubul ten Yerusalem mulgan hen kurin. Kun forok yenbe Yesu nin dufaymin sanin irtin mar gor hinhan goyen daha mat kura awalik yirmewon yen kurut yen hinhin. Gega mel gobe Sol Yesu nin dufaymin taren iryin goyen fudinde yen ma nurdeb tumnan yen ge kafura hamin. ²⁷ Gega Banabas beley aposel buda hitte tukurin. Tukanbe Sol gob Damaskus kun henya daha mat Doyan Al Kurun kenke mere

iryiņ, irde Damaskus taunde gor Yesu niņ tagal tagal niņ kafura ma heņ tagalde hinhin goyen momoņ yiryiņ.

²⁸ Be, Banabas beleņ aposel buda go gwaha yinke nurdeb awalik iramiņ. Irkeb mel gore Yerusalem bana Al Kurunyen meteņ teņ hinhan goyen Sol niņ sagurayneņ nurdeb yenya gwaha teņ hinhan. Gorbe Yuda mar hitte Yesuyen deņemde Al Kurunyen saba tagal tagal niņ kafura ma heņ tagalde kuņ hinhin. ²⁹ Gwaha teņ henyabe Yuda mar Grik mere teņ hitiņ goya kadom mohonde teņ hinhan. Irkeb daha mat kura mayteke kami yeņ epte ma tiyamiņ. ³⁰ Gega diņuņ Yesu niņ dufaymiņ tareņ irtiņ mar beleņ mere momoņ go nurdeb Sisaria taunde tukurkamiņ. Irdeb gor mat hakwa hende tiyuņmiņ Tarsus taunde teņ kerke kuriņ.

³¹ Be, Yudia naņaya Galili naņaya irde Samaria naņare niņ sios goyen kanduk karkuwaņ forok yeņ hinhan kuruņ goyen hubu hekeb merem moņ heņ kanduk kura ma keneņ hinhan. Irde saņiņ henayiņ yeņ Holi Spirit beleņ faraņ yurkeb Doyaņ Al Kuruņ niņ dufayniniņ tareņ irniņ yeņ al budam yeņ ge biņ mulgaņ heņ hinhan. Irdeb Doyaņ Al Kuruņ palap irde henya mata teņ hinhan.

Pita beleņ Lida taunya Yopa taundeya kuņ Al Kurunyen meteņ tiyyiņ

³² Be, goyenter Pitabe Israel marte naņa bana goņ niņ tiyuņ kurar mat kurar kuņ hinhin. Kuņ henyabe Yesu gama irde hinhan mar Lida taunde niņ wor kuņ yinyiņ. ³³ Be, gorbe al uliņ simsim hitiņ kura kinyiņ. Deņembe Ainias. Yeņbe dama

8 gayen gasunḡe niḡ hiriḡ. Yiḡgeḡ kuḡ waḡ titek epte moḡ. ³⁴ Be, Pita beleḡ keneḡbe, “Ainias, Yesu Kristu beleḡ guram girde sope gira niḡ, huwardeb ferd ferd gasunḡe go gigeḡ sope ira,” inyiḡ. Irkeb goya goyen po huwaryiḡ. ³⁵ Irkeb alya bereya Lida taunde niḡya Saron naḡa bantotore hinhan mar gore Ainias igiḡ hiriḡ goyen keneḡbe Doyaḡ Al Kurunḡ niḡ dufaymiḡ tareḡ iramiḡ.

³⁶ Be, Yopa taundebe Yesu niḡ dufaymiḡ saḡiḡ iryiḡ bere kura hinhin. Deḡembe Tabita. Grik mere matbe Dorkas ineḡ hanyen. Yeḡbe hugiḡeḡ mata igiḡ po teḡ hinhin, irde alya bereya det miḡmoḡ mar faraḡ yurde hinhin. ³⁷ Be, Pita beleḡ Lida taunde hinhin goya goyenbe bere go garbam buluḡ po heḡbe kamyiḡ. Kamkeb bere hakwam goyen he fimiḡ beleḡ sam irde utma tiyamiḡ. Irdeb yamiḡ banabe al heḡ heḡ gasunḡbe irawa kurabe hende kurabe bande geb, tukunḡ gasunḡ hende goyenter keramiḡ. ³⁸ Be, Yopa taunde mat Lida taundebe gisaw moḡ geb, Yesu niḡ dufaymiḡ tareḡ irtiḡ mar Yopa taunde hinhan gore Pita Lida taunde hinhin goyen nurdeb al irawa kura yad yerke keya kuḡbe, “Ge niḡ po nurde wayhar niḡ, wake araḡeḡ po kuniḡ,” inaryum. ³⁹ Irkeb Pita go huwardeb al irawa goya Yopa taunde kwamiḡ. Kuḡ forok yekeb Tabita hakwam hinhinde gor teḡ hurkamiḡ. Hurkukeb beretap goḡ doloḡde hinhan goreb milgu irdeb amil kurayen kurayen Tabita diliḡ heḡya beretap goke yiryiḡ kurunḡ goyen ikala irde heḡya eseḡ hinhan. ⁴⁰ Irkeb Pita beleḡ bere buda

goŋ hinhan goyen tumŋaŋ yakira tike siŋare kurkamiŋ. Kurkukeb dokolhoŋ yuguluŋ tenbe Al Kuruŋ gusuŋaŋ iryiŋ. Irdeb fulgaŋ kaŋbe bere hakwam goyen, “Tabita, huwara,” inyiŋ. Gwaha inkeb nankenen Pita kenenbe huwarde kipiryiŋ. ⁴¹ Irkeb Pita beles haninde tanarde isaŋ hekeb huwaryiŋ. Irkeb Yesu niŋ dufaymiŋ tareŋ irde hinhan marya beretap budaya goyen hoy yirkeb waŋ bere goyen kenamiŋ. ⁴² Be, mata forok yiriŋ gote mere momoŋbe Yopa taunde niŋ mar kuruŋ gobe nurde tukutiŋ ala tiyamiŋ. Irdeb al budam Doyaŋ Al Kuruŋ niŋ dufaymiŋ saŋiŋ iramiŋ. ⁴³ Be, Pita go al kura dapŋa sikken po det yirde hinhin al gote yare nalu ulyande yara po gor hinhin. Al gote denbebe Saimon.

10

Konilius beles Pita hoy iryiŋ

¹ Be, Sisaria taunde gorbe Roma al kura 100 fulenŋa marte doyaŋ al kura hinhin. Denembe Konilius. Fulenŋa mar gobe “Rom niŋ fulenŋa mar” yinenŋ hanjen. ² Koniliusya diriŋmiŋmiŋ yagobe tumŋaŋ Al Kuruŋ palap irde yeŋ ge po nurde doloŋ irdeb merem gama irde al buninenŋ faraŋ yurde Al Kuruŋ mere ird ird niŋ biŋ sir ma yeŋ hinhan. ³ Be, wawuŋbana kura 3 kilok gwahaderbe Al Kuruŋ mere ird ird nalu hekeb mere irde henya yuwarwarte miyoŋmiŋ kura forok yeke kinyiŋ. Irkeb miyoŋ gore, “Konilius,” inyiŋ. ⁴ Irkeb kafura henbe her yeŋ, “Doyaŋ Al Kuruŋ, dahade?” inenŋ gusuŋaŋ iryiŋ. Irkeb miyoŋ gore wol henbe, “Al Kuruŋbe ge beles

mere irde hayen goyen nurde hiyen, irde alya bereya buninjen faran jurde ten hayen goyen wor genej hiyen. Yenbe ge nin bin sir ma yen hiyen geb, nad nerkeb gago mere momonj gire yen wayhem. ⁵ Al kura hulyan yirkeb Yopa taunde kunayin. Kunbe al kura denem Saimon, denem kurabe Pita inen hanjen goyen gor hi geb, tupi tenbe mulgan hen wanayin. ⁶ Yenbe Saimon dapna sikkenj po det yirde hiyen al gote yare hi. Yaminbe makan sinja belen mat hi,” inyin.

⁷ Be, miyonj gore gwaha inenbe kukeb Konilius belen metenj marminj irawayabe fulenja alminj unjkurenj kura goya hoy yirkeb yen hitte wayaminj. Fulenja al gobe Al Kurun palap irde yen ge po nurde hiyen al. Yenbe Koniliusya hen faran urde hiyen. ⁸ Wakeb Al Kurunjen miyonj forok yen mere iryin goyen kenkela po momonj yirdeb hulyan yirkeb Yopa taunde kwaminj.

Al Kurun belen yuwarwarte Pita mere iryin

⁹ Be, mel go kunj tiyunde kura gor feraminj. Irde fay urkeb sopte kunj nanja banjahal hekeb Yopa taunde forok yetek hen hinhan. Be, goyareb Pitabe ya yen hinhin gote armomde* Al Kurun mere ire yen hurkurin. ¹⁰ Hurkun Al Kurun mere irde henyabe binje bulun wor po iryin. Be, binjgebe hako kanj hikeyabe yenbe ya hende gor hinhin. Irkeb Al Kurun belen mata kura ikala iren tike ulin kanduk po hirin. ¹¹ Irkeb yuwarwarte nanjinj gerenj yirin. Irkeb det kura

* **10:9:** Yuda marte ya gote armobe bantotok geb, al belen hiryonde iginj hurkun gor keperde usan hen hanjen.

amil yara goyen muruŋ sipte kurhan kurhan al belen tanartineŋ irde palgir irke nanŋinde mat megen katyiŋ. ¹² Bana goŋbe dapŋa kahaŋ yaŋ megen huwarde kuŋ hitiŋya, buda, kunereyabe nu kurayen kurayen kuruŋ goyen bana goŋ hike yinyiŋ. ¹³ Be, det go yeneŋ heŋyabe al melak kura nuryiŋ. Gorebe, “Pita, huwarde det go gasa yirde nawa,” inyiŋ. ¹⁴ Irkeb wol heŋbe, “Moŋ, Doyaŋ Al Kuruŋ, badne wor po. Dapŋa gabe delger wukken moŋ, buluŋ yeŋ hitiŋ gobe neb kura ma nen himyen,” inyiŋ. ¹⁵ Irkeb al melak gore sopte po, “Det kurayen kurayen Al Kuruŋ belen yirde diliŋde wukken yitiŋ gobe ge belen wukken moŋ yeŋ bada ma hawayiŋ,” inyiŋ. ¹⁶ Be, mere gabe wawuŋ karwo gayen Pita hitte forok yeke nuryiŋ. Be, mere go hubu hekeb goyare po det amil yara dapŋa kurayen kurayen bana goŋ miŋyaŋ goyen tumulgaŋ tike nanŋinde hurkurinŋ.

¹⁷ Be, yuwarwarte det kinyiŋ goyen miŋ niŋ dufay heŋ hinhin goya goyabe al karwo Konilius belen hulyaŋ yirke wayamiŋ goyen Saimonyen ya niŋ nanŋeneŋ waŋbe ya keneŋbe siŋare huwaramiŋ. ¹⁸ Irdeb, “Saimon Pita inen haŋyen al go goyen gar hi we?” yineŋ al ya bana goŋ hinhan goyen gusuŋaŋ yiraminiŋ.

¹⁹ Be, goya goyenbe Pita go yuwarwarte det kinyiŋ gote miŋ niŋ hako po dufay heŋ hikeb Holi Spirit belen, “Saimon, al karwo kura ge niŋ nanŋeneŋ wayhaŋ. ²⁰ Niŋgeb huwarde kurkuŋ yena. Mel gobe ne belen po yinmeke ge niŋ wayhaŋ geb, wake kuniŋ ginke goya yenya kuŋ kuŋ niŋ kama ma hawayiŋ,” inyiŋ. ²¹ Irkeb Pita

go kurkuŋ mel goyen yenenbe, “Al goke nankenen wayhan al gobe ne gago. Niŋgeb dahade nurde ne niŋ nankenen han?” yinen gusunan yiriyin. ²² Irkeb mel goreb, “Nenbe Konilius Roma niŋ 100 fulena marte doyan al beley hulyan dirke wayhet. Yenbe Al Kurun palap irde doloŋ irdeb dilinde huwak igin po hiyen. Irkeb Yuda mar wor tunnan palap irde hanjen. Kibe Al Kurunjen miyon beley forok yenbe Konilius goyen, ‘Al kura hulyan yirke Saimonyen yare Yopa kuŋbe Pita tupi ten wanayin. Irkeb yen beley gab mere girke nurayin,’ inun geb, gago yen beley hulyan dirke ge gupi ten kunin yen wayhet,” inamin. ²³ Irkeb Pita beley yinke yare hurkamin. Irdeb go wawun gobe gor feramin.

Pita beley Konilius hitte kuŋ Yesu niŋ tagalyin

Be, fay urkeb Pita go huwardeb mel goya Sisaria taunde kwamin. Irkeb Yesu niŋ dufaymin taren irtin mar kura Yopa taunde hinhan goyen wor yenya kwamin. ²⁴ Be, sopte fay urkeb kuŋ Sisaria taunde forok yamin. Koniliusbe Yopa kwan mar goyen han ka wan forok yinin tahan yen nurdeb yende minde niŋ alya bereya dinun yende yende goyen hoy yirke wan gabu irdeb mel go po doyan yirde hinhan.

²⁵ Be, Pita go kuŋ yare forok yen ya bana hurken tikeb Konilius beley Pita palap irde yamere Pita kahan minde dokolhon yugulun ten kuku tiyyin. ²⁶ Irkeb Pita beley, “Huwara! Nebe al gigen yara po niŋ, gwaha ma nirayin,” inenbe haniŋde tanarde isan hirin. ²⁷ Irdeb Pita go Koniliusya mere tenya tenya ya bana hurkuŋbe al

buda kurun go yinyin. ²⁸ Irdeb gaha yinyin: “Neñ Yuda mar beley den al hoyande ninya awalik hen gabu hen hen gobe nende matarebe bisam irtin geb, go po gama irde hityen. Gob denbe kenkela nurde han. Gega Yuda mar mon gobe wukken mon bulun ningeb, Al Kurunya awalik hetek epte mon yen himyen goyen bada hawayin yenbe Al Kurun beley yuwarwarte nikala nirun. ²⁹ Goke tenbe ne nin keya hekeb mere ma timin. Mali po huwardeb wamin. Goyenbe Konilius, gebe dahade nurdeb ne nin keya hawan?” inyin.

³⁰ Irkeb Konilius beley huwardeb gaha inyin: “Gote yeren 3 kilok wawunbana gaha nana gayen yaner hen Al Kurun mere irde hinhem. Gwaha ten himekeya al kura ulinhormin faykek wor po melak hen hinhin gore delne mat forok yen huwardebe, ³¹ ‘Konilius, Al Kurunbe mere irde hayen goyen nurde hiyen, irde alya bereya buninjen faran yurde hayen goyen wor bin sir ma yen hiyen. ³² Ningeb al kura yad yerkeb Saimon Pita inen hanjen goke Yopa taunde kunayin. Yenbe al kura Saimon inen hanjen gote yare hi. Al gobe dapna sikken po det yirde hiyen. Yaminbe makan sin beley mat hi,’ ninun. ³³ Be, gwaha ninkeb goya goyen po al yad yermeke ge nin keya kwan geb, gago wayha. Neñbe Doyan Al Kurun beley mere yirayin ginun goyen tumnan momon dirke nurnin yenbe Al Kurun dilin mat gago wan gabu irde doyan girhet. Ningeb igin ten wayha geb, mere goyen momon dira,” inyin.

³⁴ Be, mere go nurdeb Pita beley gaha inyin: “Han kab bebak tihim. Fudinde wor po, Al Ku-

runbe Yuda mar po ma igin yenen hiyen. ³⁵ Al min kurar nin kurar nin merem hoyan hoyan Al Kurun palap irde dilinde mata huwak po ten han mar go gab igin yenen hiyen. ³⁶ Denbe Al Kurun beley Israel mar nin bikken mere kiryin gobe kenkela nurde han. Mere gobe Al Kurun beley megen nin marya awalik hen hen ge ten Yesu Kristu ten kerke katyin goke yitin. Yesu Kristube megen nin mar tumnan gote Doyan Al Kurun. ³⁷ Denbe mata kurun Yudia nana bana gon forok yen hinhin gobe nurde han. Han kanya Yon Baptais beley Galili nana, 'Mata bulun tin yubul ten baptais tenan,' yen alya bereya saba yirde hinhin goyen kamere mata kurun goyen forok yirin. ³⁸ Mata kurun gobe gahade: Al Kurun beley Holi Spirit ten kerke Nasaret nin al Yesu go hitte katyin, irde taremin wor unyin. Irdeb Al Kurunbe yenya hinaryum geb, Yesu gobe Yuda marte nana bana gon tiyun kurar mat kurar kunbe alya bereya faran yurde al Satan beley bulun yirke garbam hinhan goyen tumnan guram yirde sope yirde hinhin. ³⁹ Yesu beley mata kurun Yuda marte nana bana gon ten hinhin goya Yerusalem taunde gor ten hinhin gobe dilninde wor po kenen hinhet. Gega gor nin mar beley ten kuruse hende mayke kamun. ⁴⁰ Goyenpoga kamunde gor mat yerenkek hekeb Al Kurun beley isan henbe kawan irke kenan. ⁴¹ Gega al tumnan ma kenan. Nejen bikken Al Kurun beley basina dirtin mar po gab Yesu kamunde mat huwarkeb kintin. Irdeb yenya dula ten hinhet. ⁴² Yesube al kamtinnya dilin gergen hanya matamin yenen

bulunya iginya pota yirde murungem yunyen yen Al Kurun belen basina iryinj albe gogo yen tagalde tukunayinj dinun. ⁴³ Yesu goke ten bikken Al Kurunyen mere basan mar belen, ‘Al kura kame wayyen goke dufay saninj irkeb Al Kurun belen al goke ten mata bulunmin halde unyen,’ yen tagalde hinhan,” yen Pita belen Koniliusya yaminde gabu iramin mar goyen yinyinj.

Holi Spirit Yuda mar mon hitte katyinj

⁴⁴ Be, Pita belen saba gwahade ten hinhin goya goyab Holi Spirit belen saba go palna irde hinhan mar hitte katyinj. ⁴⁵⁻⁴⁶ Irkeb mere kurayen kurayen ten Al Kurun turun irde tiyamin. Irkeb Yuda mar Yesu nin dufaymin taren irtinj kura Pitaya wayamin gore go yenen hurkunkat tenbe, ‘Al Kurun belenbe Yuda mar mon al min hoyan nende matara ma kutinj gega, yen wor Holi Spirit yuna be!’ yamin. Irkeb Pita belen, ⁴⁷ “Mel gabe nen Holi Spirit titinj gwahade goyen po yen wor Holi Spirit tahan ningeb, al ganun belen fe baptais ten ten nin bisam yiryen?” yirin. ⁴⁸ Irdeb, “Denbe, ‘Yesu Kristuyen al hihit,’ yen Yesu Kristu denemde baptais tenayinj,” yinen baptais yiryinj. Go kamereb baptais tamin mar gore Pita goyen, “Nenya mun kura hen ga kwayinj,” inen basina iramin.

11

Pita Yerusalem mulgan hirinj

¹ Be, al min hoyan Yuda mar mon wor Al Kurunyen mere nurde gama iran mere momon goyen aposel budaya Yesu nin dufaymin taren

irtin mar Yudia naŋa bana go nin beley nuramin.
2 Ningeb Pita mulgan heŋ Yerusalem hurkukeb
Yuda mar Yesu nin dufaymin sanin irtin mar
gore igin ma nurde huwardeb Pita goyen, 3 “Ge
gayenbe daha tihim yen al min hoyan nende guba
mata ma gama irde hanjen marte yare kun dula
tayan?” yen bin ar hende mere iramin.

4 Irkeb Pita beley mata forok yirin goyen
kenkela po momon yire yen min urdeb gaha
yinyin: 5 “Nebe Yopa taunde heŋ Al Kurun
mere irde hinhem. Irkeb Al Kurun beley mata
kura nikala nireŋ tikeb ulne kanduk wor po
hiyun. Irkeb yuwarwarte det kura amil yara
goyen murun sipte kurhan kurhan goyen al beley
utirin ten tanartinen irde naninde mat pangir
irke ne hitte katke kinmin. 6 Kenkela kenenbe
bana gonbe dapna kahan yan megen kun hitinya,
buda, kunereyabe nu kurayen kurayen kurun
goyen bana gon hike yinmin. 7 Irkeb al melak
kura nurmin goreb, ‘Pita, huwarde dapna go gasa
yirde nawa,’ ninun. 8 Irkeb ne beley wol heŋbe,
‘Mon, Doyan Al Kurun, badne wor po. Dapna
gabe delger wukken mon, bulun yen hanjen gobe
mun kura ma nitin. Hubu wor po,’ inmin. 9 Be, al
melak gore sopte po naninde mat, ‘Det Al Kurun
beley yirde dilinde wukken yitin gobe ge beley
wukken mon yen bada ma hawayin,’ ninun.
10 Mere gobe wawun karwo gayen ne hitte forok
yeke nurmin. Be, mere go hubu hekeb goyare po
det amil yara dapna kurayen kurayen bana gon
minyan goyen tumulgan tike naninde hurkun.
11 Irkeb goya goyenbe al karwo Sisaria mat ne

niñ keya kwan mar goyen ya hinhem siñare gor huwaran. ¹² Irkeb Holi Spirit beļenbe, ‘Mel goya kun kun niñ kama heñ bada ma hawayiñ,’ ninuñ. Irkeb mel karwo goya Sisaria taunde kutiñ. Irde kadne 6 Yopa taunde niñ gayen wor gama nirke tumñañ Koniliusyen yare kutiñ. ¹³ Kun forok yetekeb Konilius beļen nenenbe Al Kurunyen miyoñ beļen yamiñde forok yeñ mere iruñ goyen momoñ niruñ. Meremiñbe gahade: ‘Al kura Saimon, Pita inenñ hanñyen al gobe Yopa taunde hi niñgeb, al kura yinke yeñ ge keya kunañ. ¹⁴ Yeñ beļen gab Al Kurunyen mere tawanñ momoñ girkeb geya diriñmiñgeyabe tumñañ mere go nurdeb gama irke Al Kurun beļen dumulgañ tiyyen,’ inuñ. ¹⁵ Be, hañkap ga mere miñ urde hinhem goya goyabe Holi Spirit hañkapyo neñ hitte katun go gwahade goyen yeñ hitte wor katun. ¹⁶ Irke go kenenbe Doyañ Al Kurun Yesu beļen Al Kurun hitte mulgañ hewe yenya, ‘Yonbe fe baptais yirde hinhin gega, deñbe Al Kurun beļen Holi Spiritde baptais diriñ,’ dinuñ goyen goya gab bene bak yiyuñ. ¹⁷ Niñgeb Al Kurun beļen Holi Spirit neñ dunuñ gwahade goyen po al miñ hoyañ Yuda mar moñ goyen Yesu Kristu niñ dufaymiñ tareñ irkeb yeñ wor yunuñ. Niñgeb daha tihim yeñ ne al nebañeñ muñ gare Al Kurunyen meten walen? Neb badne wor po!” yinyiñ. ¹⁸ Be, Yuda mar Yesu niñ dufaymiñ tareñ irde hinhan go Pita mere tiyyiñ go fudinde yeñ nurdeb Al Kurun turuñ irde, “Fudinde go. Al miñ hoyañ neñ Yuda mar moñ wor Al Kurun beļen biñ bak yirke Al Kurunya awalikde hitek yeñbe mata buluñmiñ

yubul ten yen ge bin mulgan hen han,” yaminj.

Antiok nin Yesuyen alya bereya

¹⁹ Be, Yudia nanare nin doyan mar belen Stiwen mayke kamyinj go kamereb Stiwen dinun Yesu nin dufayminj saninj irtinj mar wor gasa yirde bulun bulun yirde hikeb go mar gobe burgagaw keraminj. Irdeb kurabe Fonisia nanare kwaminj. Kurabe Saiprus motmotde kwaminj. Munanj kurabe Antiok taunde kwaminj. Mel go burgagaw kerde kwaminj mar goyenbe kunj mere iginj Yesu nin yitinj goyen Yuda mar po momonj yirde kunj hinhan. ²⁰ Gega Saiprus motmotde nin marya Sairini taunde nin mar Yerusalem mat bur yen kwaminj gore Antiok taunde kunjbe Grik mar gor hinhan goyen wor mere iginj Doyanj Al Kurunj Yesu nin yitinj goyen momonj yirde hinhan. ²¹ Doyanj Al Kurunjen tarenbe mel goya hinhin geb, mere go nurdeb alya bereya budam mata bulunminj yubul tenj Yesu nin dufayminj tarenj iraminj.

²² Be, Yerusalem nin sios gore mere momonj go nurdeb Banabas tenj kerke Antiok kurinj. ²³ Kunj Antiok gor forok yenbe Al Kurunj belen buninjen yirde iginj iginj yirde Holi Spirit yunyinj go yenenbe amanj nin pultik yirinj. Irdeb saninj hen hen ge faranj yure yenbe, “Bitinde mat Doyanj Al Kurunj Yesu gama irde hinayinj. Irde yen nin po nurde hinayinj,” yinenj saba yirde hinhin. ²⁴ Banabasbe al iginj wor po, irde Yesu nin dufayminj tarenj irde hekkej nurde unenj hinhin. Holi Spirit belen hard unenj ketal urtinj hinhin. Ningeb Banabas belen saba yirkeb al budam Yesu nin dufayminj tarenj iraminj.

²⁵ Be, gor matbe Banabas go Sol niñ nan̄kene yeñ Tarsus taunde kuriñ. ²⁶ Kuñ nan̄keneñ keneñbe tupi teñ Antiok wayaryum. Be, go dama goyen Banabasya Solyabe Yesu Kristuyen alya bereya Antiok hinhan goya hen̄be alya bereya budam saba yirde hinaryum. Be, Antiok gorbe Yesu niñ dufaymiñ sañiñ iramiñ mar goyen al siñare niñ mar belej “Kristen” yinamiñ. Dene gob bikken̄be hubu.

²⁷ Be, irem go Antiok hinaryum goya goyenbe Al Kurun̄yen mere basañ mar kura Yerusalem mat Antiok katamiñ. ²⁸ Al kura deñembe Agabus. Yeñ belejbe Holi Spirityen tareñde huwardeb, “Kamebe biñge kamde kamde nalu kurun̄ kura Roma gabman belej nana doyañ ira bana gayen forok yiyyen,” yiriñ. Be, Klodius belej Roma gabmanyen doyañ al hikeya mere tiyyiñ gwahade po forok yiriñ. ²⁹ Irkeb Yerusalem niñ mar farañ yurniñ yeñbe Yesu niñ dufaymiñ tareñ iramiñ mar Antiok hinhan gore hora yirtiñ ala tiyamiñ. Al tumñañ gor hinhan gobe gwahade hite yeñbe goyen po gama irde hora yeramiñ. Horam yañ marbe tolok yeramiñ, munañ al hubu nurdeb bande yeramiñ. ³⁰ Hora gabu iramiñ gobe teñ Banabasya Solya haniñde keramiñ. Irkeb Yerusalem kuñbe tukuñ sios gote doyañ mar yunaryum.

12

Herot belej Yesuyen alya bereya sios bulun̄ bulun̄ yiryiñ

¹ Be, goya goyenbe Yuda marte doyaŋ al kurun kura denem Herot beley Yesuyen alya bereya sios bulun yire yenbe fulenŋa marminŋ yad yerke kun kuraminŋ yawaraminŋ. ² Yawarkeb Herot beley fulenŋa marminŋ yinkeb Yon itinŋ Yemsbe fulenŋare ninŋ bidila po mayke kamyinŋ. ³ Be, Herot beley mata tiyyinŋ goke Yuda mar beley amanŋ heke yenenŋbe Pita wor Yems irminŋ gwahade ire yenbe fulenŋa marminŋ yinke tenŋ fere tiyaminŋ. Goyenbe Yuda marte dula nalu kurun kura beret yis minŋmonŋ nen hanŋyen goyenterbe Pita fere tiyaminŋ. ⁴ Irdeb koyare kerdeb, monŋgo busaharyenŋ yenbe Herot beley fulenŋa marminŋ 16 hulyanŋ yirdeb, “Al sipte beley wa doyaŋ irnayinŋ. Irdeb naluminŋ hubu hekeb al sipte kura beley wor kunŋ gasunŋminŋ tenŋ Pita go doyaŋ irnayinŋ. Gwahade po tenŋ hinayinŋ,” yinyinŋ. Herotbe Pasoba* dula nalu goyen hubu heke gab Pita go sinŋare taktenŋ kawan alya bereya dilinŋde maymeke kamyenŋ yenŋ nuryinŋ. ⁵ Goke tenbe Herot beley fulenŋa marminŋ yinke Pita goyen koyare po kerde doyaŋ irde hinhan. Gega siosbe Al Kurunŋ beley faranŋ uryenŋ yenŋ gusunŋanŋ irtinŋde hinhan.

⁶ Be, gisebe mayteke kamyenŋ yenŋ nuraminŋ

* **12:4:** Bikkenŋ Israel mar Isip nanŋa tubul tenŋ Kenan kuninŋ tiyaminŋyabe Al Kurunŋ beley sipsip al dirinŋ dirnenŋ gasa yirde darim yade yame kantayanŋ sam yirnayinŋ yinyinŋ. Munanŋ al kura gwaha ma tiyaminŋ marbe Al Kurunŋyen miyonŋ beley wanbe mel gote urminŋ matalinŋya dapnaminŋ matalinŋya goyen tumŋanŋ gasa yirke kamaminŋ. Gega mereminŋ gama iraminŋ marbe miyonŋminŋ beley yubul tiyaminŋ goke dufay henŋ henŋ ge dula mata tenŋ hinhan.

goyen wawunbe Pitabe fulenḡa mar irawa kahalte firtiinḡe hinhin. Irde fulenḡa mar irawa hoyanbe yamere huwarde doyanḡ heḡ hinaryum. Pita gobe hinhin gwahade po sen beleḡ haniḡ yase beleḡ feḡ teḡ tukunḡ fulenḡa al kurate haniḡde feḡ titiḡ hinhin. Be, haniḡ tapa wor gwahade po irtiḡ hinhin. ⁷ Irkeb al kura mata gwahade forok yewenḡ tiya yeḡ ma nurde hikeya Al Kurunyen miyonḡ beleḡ al yad fere yird yird ya bana gonḡ forok yiriḡ. Irkeb ya bana gonḡbe fay urde wuk yeḡ tukuriḡ. Irkeb Al Kurunyen miyonḡ goreb Pita gegelhek beleḡ tur irde isanḡ heḡbe, “Aranḡ huwara!” inyiḡ. Gwaha inkeb goya goyen po sen haniḡde fere titiḡ hinhin goyen suk yeḡ kataryum. ⁸ Irkeb Al Kurunyen miyonḡ beleḡbe, “Kahanḡbasanḡgeya uliḡhorge biḡde niḡya yad hor yira,” inyiḡ. Irkeb Pita go gwaha tiyyiḡ. Irkeb sopte po, “Uliḡhorge kurunḡ siḡare niḡ go wor ulger kerde gama nira,” inyiḡ. ⁹ Be, Pita go Al Kurunyen miyonḡ goyen po gama irde siḡare kurkuriḡ. Goyenpoga Al Kurunyen miyonḡ beleḡ mata teḡ hinhin gobe fudinḡde farḡenḡde yeḡ ma nurde hinhin. Yeḡbe yuwarwarte teḡ hime yeḡ nurde hinhin. ¹⁰ Be, Al Kurunyen miyonḡya Pitaya go fulenḡa mar mehenḡde niḡ goyen fole yirde kunḡ kura goyen wor fole yirde kunḡ funanḡbe taun bana hurkunḡ hurkunḡ yame kurunḡ ain beleḡ po irtiḡde gor huwararyum. Irkeb yame go momḡonḡde hol yeke kwaryum. Be, muḡ kura kutḡeḡ teḡbe goyare po Al Kurunyen miyonḡ gobe unḡkel kuriḡ.

¹¹ Irke gab Pita gobe biḡ bak yeke, “Gabe farḡenḡde be! Yuwarwarte moḡ. Yuda marbe

ne niŋ Herot beley mayde gwaha kura ira yeŋ kentek yeŋ nurde haŋ gega, fudinde wor po Al Kurun beley miyonmin hulyaŋ irke waŋ nad siŋa nira,” yiriŋ.

¹² Irde biŋ bak wor po yeke Yon al beley Mak iney hinhan gote miliŋ Mariayen yare kuriŋ. Yare gorbe al budam gabu irde Pita goyen faraŋ uri yeŋ Al Kurun gusaŋaŋ irde hinhan. ¹³ Be, Pita go kuŋbe yame mayyiŋ. Irkeb metey bere kura deŋem Roda beley yame hol ire yeŋ kuriŋ. ¹⁴ Gega Pita beley yame mayde mere tiyyiŋ goyen nurde amaŋ wor po heŋbe yame hol irde miŋmon, kup yeŋ mulgaŋ heŋbe al gabu irde Al Kurun mere irde hinhan mar goyen, “Melya, Pita waŋ yamere hi!” yinyiŋ. ¹⁵ Irkeb mel goreb, “Kukuwa haha?” inamiŋ. Gega, “Mon, fudinde wor po Pita be,” yeŋ parsay po hiriŋ. Irkeb, “Mon, yende miyon wet?” inamiŋ.

¹⁶ Gega Pita go yame mayde ma nurtiŋey po tiyyiŋ. Irkeb yame hol irdeb Pita keneŋbe tulfut yamiŋ. ¹⁷ Irkeb haniŋ po tuŋaŋ teŋ, “Mere ma,” yineŋbe Al Kurun beley teŋ siŋa iryiŋ goyen momoŋ yiryiŋ. Irdeb, “Yemsa dininiŋ Yesu gama irde hitiŋ mar hoyay wor ne hitte mata forok yihi gake bebak yirnayiŋ,” yineŋbe tiyuŋ hoyande kuriŋ. Be, Yems gobe Yesu kuliŋ irde Yerusalem niŋ sios gote doyaŋ al hinhin.

¹⁸ Be, fulena mar Pita doyaŋ irde hinhan mar gobe wampot huwardeb bana goŋ yeŋ ge naŋkeneŋ tukamiŋ. Gega bepyaŋ miŋmon, hubu wor po. Niŋgeb gwaha kura tiya yeŋ ma nurde ŋakŋak teŋ kandukŋey nuramiŋ. ¹⁹ Be,

Herot belej mere momon go nurdeb fuleja marmij yinke Pita keramij ya bana kurun goyen nankenen tukamij. Gega go ma po kenkeb Herot belej Pita doyan iramij mar goyen, “Wawunbe daha tahan?” yinen gusunen yirdeb bin ar yeke Pita doyan iramij mar goyen gasa yirke kamamij.

Herot kamij

Be, go kamereb Herot go Yudia nanjare matbe Sisaria taunde kurun gor mun kura hinhin. ²⁰ Be, goyenterbe Tairya Saidonya taunde nin mar belej Herot daha wet kura iramij. Irkeb Herot gobe bin ar yeke igin ma nurde yunen hinhin. Be, taunde gor nin marbe Herot belej doyan irde hinhin nanjare mat binje yade hinhan geb, Herot bin ar yen hinhin goke kanduknen nuramij. Ningeb Herotya awalik hen hen belej nin nankenenbe taunde gor nin mar kura belej Herotyen meten doyan al kura Blastus hitte kwamij. Kunbe mel goya Herotya kanduk minyan hinhan goyen sope irde awalik hini yen Blastus inke igin nuryin. Irdeb yen belej kun Herot inke yen wor igin nuryin.

²¹ Be, Herot belej Tairya Saidonya taunde nin mar mere yire yen nalu kiryinde goyenter hekeb doyan mar karkuwande umja tenbe gote keperd keperd gasunde keperde alya bereya mere yiryin.

²² Irkeb taunde gor nin mar belej turun irde hekhok ten epte ma tenbe, “Gab al belej ma mere tiya! Al Kurun belej mere tiya!” yen kinjabon tiyamij. ²³ Be, Herot gob alya bereya belej gwaha inke aman henbe Al Kurun ma kasor iryin.

Irkeb goke tenbe goya goyen po Al Kurunyen miyon beley wan mayke katiyij. Irkeb goyare po kundu beley diliy gergen hikeya nen natorok irke kamiyij.

²⁴ Be, Herot beley sios buluy irde hinhin gega, Al Kurunyen merebe kuruy hej tukuriyij.

²⁵ Be, Banabasya Solya Yerusalem kwaryum goyen metenminj pasi irdeb Antiok mulgan haryum. Mulgan hej henyabe Yon, Mak iney hanyen goya tumnanj Antiok kwaminj.

13

Holi Spirit beley Banabasya Solya basiña yiryij

¹ Be, Antiok taunde gor niy Yesuyen alya bereya sios bana gonbe Al Kurunyen mere basanj maryabe saba mar kura hinhan. Go mar gote denembe Banabas, Saimon al beley Niger iney hinhan, irde Sairini taunde niy al Lusiusya, Manainyabe Solya. Manain gobe Galili nanja gote doyan al kuruy Herotya tumnanje paka yirke karkuwanj haryum. ² Be, kurarebe go mar goyen binje kutna irde Doyan Al Kuruy dolonj irde hike Holi Spirit belenjebe, “Banabasya Solyabe metenje ten hiriryen yey basiña yirmirij. Ningeb yapat yirkeb yenbe hoyan munj po metenj tiyiryen,” yinyij.

³ Irkeb mel go kutnare hej Al Kuruy mere irde hinhan goyen kamereb irem go hende hanij yerde Al Kuruy gusunanj irdeb yubul tike Antiok taun go tubul tenj kwaryum.

Banabasya Polyabe Saiprus motmotde kwaryum

⁴ Be, irem go Holi Spirit belej bul yirke Selusia taunde kurkaryum. Irdeb gor mat hakwa tenbe Saiprus motmotde kwaryum. ⁵ Kunj Saiprus motmotde forok yenbe Salamis taunde kwaryum. Gorbe Yuda marte gabu yayan kunjbe Al Kurunyen mere tagalde hinaryum. Irkeb Yon, Mak inen hanjen gobe irem go faranj yurde hinhin.

⁶ Go kamereb Salamis taunde matbe Saiprus motmot muruj kurhan Pafos taunde kunj forok yaryum. Gorbe Yuda mar al kura kalga mataya soya mataya ten hitin al goyenbe Al Kurunyen mere basan hen tagalde hime yen al usi yirde hinhin. Denembe Ba-Yesu. ⁷ Al gobe gor nin gabman doyan al Sergius Paulus goyen meten faranj urde hinhin. Sergius Paulus gobe dufaymin wuk yitin ningeb, Al Kurunyen mere nure yenbe Banabasya Solya nin keya hirin. ⁸ Gega Ba-Yesu, Grik mere mat Elimas inen hanjen gore irem goke igin ma nurde asogo yirdeb Sergius Paulus goyen daha Yesu nin dufaymin sanin iryenkek yenbe petpet irde hinhin. ⁹ Irkeb Holi Spirit belej Sol, Pol inen hanjen goyen hard unke Elimas kimin mat, ¹⁰ “Gebe mata igin kuruj gayen asogo irde al mata igin gama irnin tike usi yirde pet pet yirde ha. Irde Doyan Al Kurunyen mata fudinde goyen buluj irde ha goyen tubul ma ten ha. Ningeb gebe Satanyen mata po ten ha. ¹¹ Goke tenbe hanja gabe Al Kuruj belej mata bulunge gote damum gunen tiya. Ningeb delge titmin hiyyen. Irkeb sobamde yara po det kura epte ma yenayin,” inyin. Irkeb goya goyen po gagap yara kidomak kura gore wan dilin pet tiyyin. Irkeb dilin titmin

hekeb ganuñ belen hanner nade belen nikala niryen yen sapsap tiyyin. ¹² Irkeb Sergius Paulus gobe mata forok yirin goyen kinyin. Irde Doyan Al Kurunñ nin saba tagalde hinaryum go nurdeb dinonñ kok yirin. Irdeb Yesu nin dufayminñ taren iryin.

Banabasya Polya Pisidia nanare nin taun kura Antiok kwaryum

¹³ Be, Polya dinuñ waranya go Pafos taunde mat hakwa tenbe Saiprus motmot go tubul ten Pamfilia nana bana nin taun Perga kwaminñ. Gega Yon, Mak inenñ hanjen gobe gor mat irem go yubul ten Yerusalem mulganñ hen kurinñ. ¹⁴ Be, Polya Banabasya gobe Perga taunde matbe taun kura Pisidia nana bana gonñ nin taun Antiok inenñ hanjende gor kwaryum. Irdeb Yuda marte usan nalu Sabat goyenter gabu yaminñde gor hurkunñ keperaryum. ¹⁵ Be, Yuda marte tikulaya Al Kurunñyen mere basanñ mar belenñ asanñde katinñ goyen kura kapyanñ henbe gabu iraminñ gote doyanñ mar belenñ irem goyen yenenñbe, “Irem, derbe alya bereya gar nin tarenñ hinayinñ yen faranñ yurtek saba kura hi kenem iginñ saba yiriryenñ?” yenbe al kura hulyanñ irke kunñ momonñ yiryinñ.

¹⁶ Irkeb Pol belenñ huwarde merene nurnanñ yenbe haninñ po tunanñ tiyyinñ. Irdeb gaha yinyinñ: “Denñ Yuda marya Yuda mar monñ gega, Al Kurunñ dolonñ irde hanñ mar, ga nurnanñ ko. ¹⁷ Yuda marte Al Kurunñ belenñbe asinininñ yago goyen basinñ yirdeb yende alya bereya yiryinñ. Irdeb bikkenñ nanam tubul tenñ kunñ Isip marte nanare hikeb yinñenñ faranñ yurde saninñ yirkebal melminñ

kurun forok yirin. Kamebe nanamde yumulgan tiye yenbe Al Kurun belen yingen de tarende po yirkebe Isip tubul tiyamin. ¹⁸ Belen kun henya al ma hitek nana bana dama 40 gayen mata bulun bulun kurun ten hikebe Al Kurunbe bin misin bulun wor po katen hinhin gega, mel go yubul ma ten hinhin. ¹⁹ Irdeb Israel mar go Kenan nana bana hurkukebe Al Kurun belen megen goyenter hinhan mar almelmin 7 gayen gasa yirde bulun bulun yiryin. Irdeb megenminbe huginen ge yende alya bereya nin tubul ten yunyin. ²⁰ Be, hakwaninin yago Isip kwaminde mat kun kun mulgan hen Kenan megen de sopte wayamin gobe dama 450 bana gayen mata kurun goyen forok yamin.

“Be, Yuda mar go kun megen yade keperke yenenbe Al Kurun belen alya bereya doyan yirde hinayin yen doyan mar yade forok yiryin. Kun kunbe Al Kurunyen mere basan al Samuel forok yen doyan yirde hinhin. ²¹ Irkeb goyabe Israel mar belen doyan al kurun hoyan nin gusunan iramin. Irkeb Al Kurun belen Benyaminyen minde nin al kura denem Kis gote urmin Sol yunke yen belen Israel marte doyan al kurun hen dama 40 gayen doyan yirde hinhin. ²² Be, Al Kurun belen Sol go bulun tike takira tenbe Dewit ten gasun wol kiryin. Yen gebe Al Kurun belen gaha yirin: ‘Yesi urmin Dewitbe bubulkunne wor po. Amanen nurde unen hime. Dufayne kurun kerde hime gayen yen belen gab gama irde pasi iryen,’ yirin. ²³ Nin geb Al Kurun belen bin ten mere tiyyin goyen po gama irdeb gogo Dewityen

minde mat alya bereya Al Kurun hitte Yumulgan ten ten Al Yesu Israel mar hitte ten kerke wayyin. ²⁴ Yesu go forok yen metenmin ma min uryinyabe Yon Baptais belen wa mehen hen alya bereya mata bulunmin yubul ten Al Kurun nin bin mulgan hen baptais tenayin yen Israel mar tumnan saba yirde hinhin. ²⁵ Yon go metenmin kun pasi irtek binde hen hikeb gaha yirin: 'Nebe ganun yen nurde nunen han? Dumulgan ten ten Al wake kenteke yen doyan irde han yen al gobe ne gago mon. Yenbe ne kamere wayyen. Ne al gahade mun gare epte ma kahan basanminde nin kan yugu tiyen,' yirin.

²⁶ "Ningeb, kadne yago, Abrahamyen minde nin marya den minin hoyan Al Kurun kafura irde yende mere po nurde han mar, ga nurnan ko. Dumulgan ten ten mere gobe nen tumnan gake ten kerke wayyin. ²⁷ Gega Yerusalem marya doyan marminya belen Yesu goyen keneb bebak ma tiyamin. Mel gobe Sabatmin Sabatminbe Al Kurunyen mere basan mar belen mere asande katin goyen kapyan hen hinhan gega, mere gote min bebak ma ten hinhan. Irdeb Yesube bulun usi ten mayteke kami yen mere mayamin. Mata tiyamin gobe Al Kurunyen mere basan mar belen kame mata gwahade forok yiyen yitin goyen po forok yirin gogo. ²⁸ Yesube titminen wor po, min minmon maynin yen Pailat gusunan iramin. ²⁹ Be, he hende mayke kamkeb faran tenbe tukun mete tiyamin. Be, mata tiyamin kurun gobe Yesu nin ten Al Kurunyen mere asande katin goyen gwahade po forok yirin. ³⁰ Goyenpoga bida ma

hiriñ. Al Kurun beleş isañ heke huwaryiñ. ³¹ Go kamereb yenya Galili naña bana mat Yerusalem kun mulgañ heñ hinhan mar goyen hitte wawun budamde forok yeke kenamiñ. Niñgeb gayenterbe mel goreb Yesu niñ Yuda mar saba yirde hañ. ³² Niñgeb deyya beleş mere igiñ Yesu niñ yitiñ goyen momoñ dirde har gago. Be, bikken Al Kurun beleş asininiñ yagot diliñde biña tiyyiñ. ³³ Irdeb gote iginenbe neñ dirneñ weñ hitte forok ire yeñ Yesu kamtiñde mat isañ hiriñ. Yesu goke Al Kurun beleş mere tiyyiñbe Tikiñ Asañde gahade katiñ hi:

‘Nebe nanake. Niñgeb urne ge niñ amañeñ nurd guneñ hime,’ yitiñ. *Tikiñ 2:7*

³⁴ Be, Al Kurun beleş Yesube bida ma hiyyeñ yeñ isañ heke huwaryiñ gobe Al Kurunyen mere basañ al Aisaia beleş asañde gahade kayyiñ:

‘Ne beleş Dewit hitte biña timiriñ goyen fudinde wor po gama irde guram girde tareñ gireñ. Guram gireñ gabe megen niñ al kura beleş epte ma gwaha girtek,’ yitiñ hi. *Aisaia 55:3*

³⁵ Irde Tikiñ Asañdebe Dewit beleş Yesu bida ma hetek goke,

‘Meteñ alge gigeñ tapat irde basaña irtiñ gobe epte ma bida hiyyeñ,’ yiriñ. *Tikiñ 16:10*

³⁶ Al Kurun gwahade mere iryiñ al Dewit gobe Al Kurunyen dufay kurun goyen pasi irdeb kamiñ. Irkeb tukun asem yagot dumunde kerkeb bida hiriñ. ³⁷ Gega Al Kurun beleş isañ hiriñ yeñ hite al Yesu gobe bida ma hiriñ. Hubu wor po. ³⁸ Niñgeb al kura yeñ ge dufaymiñ sañiñ iryenbe Al Kurun beleş mata bulunmiñ

halde unyen. Gote sabaminbe gago tagalde har.
³⁹ Niṅgeb, kadne yago, deṅbe Mose beṅen tikula
 kayyin goyen gama irteke gab Al Kurun beṅen
 mata bulun minmon al huwak dinyen yen nurde
 han? Mon, epte mon! Goyenpoga al kura
 Yesu nin po dufaymin taren iryen gobe Al Kurun
 beṅen mata bulun minmon, al huwak yen kinyen.
⁴⁰⁻⁴¹ Be, Al Kurunyen mere basan mar beṅen
 asande gahade katin hi:

‘Deṅ sukal ten hanyen mar, nurde ga hinar ko.

Deṅ gayenter nin mar hitte det kura forok
 iren.

Irde mata gob al beṅen kenen momon dirnayan
 gega, usi yen nurnayan.

Niṅgeb deṅbe kame gab kenen diltin fot yemanbe
 kamnayan,’ yen kayamin. *Habakuk 1:5*

Niṅgeb mere gate iginen deṅ ultinde forok yentak
 geb, kenkela hen hinayan,” yinyin.

⁴² Be, Polya Banabasya Yuda marte gabu ya
 goyen tubul ten kat sinare kuren tikeb gor nin
 mar beṅen, “Sabat nalu kura imoyenterbe wan
 saba dirhar gayen teban saba dirke nurtek,” yi-
 namin. ⁴³ Irde gabure gor mat sinare kunbe Yuda
 marya al min hoyande nin Yuda mar mon gega,
 Yuda marte mata gama irde hanyen mar goreb
 Polya Banabasya gama yirde kwamin. Irkeb irem
 goreb mel go mere yirde taren yirye yenbe, “Al
 Kurun beṅen buninen nurde dunen faran durde
 hi geb, huginen yen ge po nurde gama irde
 hinayan,” yinaryum.

⁴⁴ Be, kun sopte Sabat nalu hekeb taun bana
 gor nin mar gobe Al Kurunyen mere nurnin yen

al budam wor po waŋ Yuda marte gabu yare gor gabu iramiŋ. ⁴⁵ Irkeb Yuda mar Pol niŋ igiŋ ma nuramiŋ gore al budam gabu iramiŋ goyen yeneŋbe daniŋ neŋbe gwahade moŋ yeŋ biŋ ar yamiŋ. Irdeb Pol beleŋ mere teŋ hinhin gobe usi teŋ hi yeŋ sukal iramiŋ. ⁴⁶ Gega Polya Banabasya gobe kafura ma heŋbe, “Al Kurunyen merebe deŋ Yuda mar wa nurnayiŋ yeŋ gogo momoŋ diraruŋ. Gega harhoktiŋ uneneŋbe epte ma Al Kurunya hugineŋ hitek yahaŋ geb, gayenterbe epte ma deŋ momoŋ diryeŋ. Gwaha titneŋbe al miŋ hoyoŋ Yuda mar moŋ po gab kuŋ momoŋ yirde hireŋ tahar geb. ⁴⁷ Al Kurunyen mere tukuŋ Yuda mar moŋ hitte kuŋ tagaliryen dineŋ Doyaŋ Al Kuruŋ beleŋ meremiŋ asaŋde hi goyen dunyiŋ. Merembe gahade:

‘Gebe hulsi yara heŋ al miŋ hoyoŋ Yuda mar moŋ hike kwa kuruŋ gayen ne beleŋ yumulgaŋ tiyeŋ mere goyen momoŋ yirde tukayiŋ.

Irkeb biŋ bak yekeb ne beleŋ yumulgaŋ tiyeŋ,’
yitiŋ hi,” yaryum. *Aisaia 49:6*

⁴⁸ Be, al miŋ hoyoŋ Yuda mar moŋ beleŋ irem go mere tiyaryum goyen nurdeb amaŋ heŋbe Al Kurunyen mere palap iramiŋ. Irdeb alya bereya Al Kuruŋ beleŋ yingeny a hugineŋ hitek yeŋ basiŋa yirtiŋ marbe tumŋaŋ Yesu niŋ du-faymiŋ saŋiŋ iramiŋ.

⁴⁹ Be, Al Kurunyen merebe naŋa bana kuruŋ go tagal tukuke nurtiŋ ala tiyamiŋ. ⁵⁰ Gega Yuda mar beleŋ taunde gor niŋ doyaŋ marya bere samuŋ miŋyaŋ Yuda marte tikula gama irde hinhan goyen biŋ yakamamiŋ. Irkeb mel goreb

taunde gor niŋ mar kura yinkeb Polya Banabasya gasa yirniŋ yeŋ buluŋ buluŋ yirdeb, “Taun gayenter ga heŋ ma!” yineŋ yakira tiyamiŋ. ⁵¹ Irkeb gor niŋ mar goyen mata buluŋ tihit yeŋ biŋ bak yenaŋ yeŋbe yende matare kahaŋde tupi busaŋ heŋbe Antiok taun go tubul teŋbe Aikoniam taunde kwaryum. ⁵² Be, Antiok niŋ mar Yesu niŋ dufaymiŋ tareŋ iramiŋ gobe Holi Spirit beŋ ketal yurke aman heŋ hinhan.

14

Polya Banabasya Aikoniam taunde kwaryum

¹ Be, Polya Banabasya gobe teŋ hinaryum gwahade po Aikoniam taunde gor manaŋ Yuda marte gabu yare kuŋ saba keŋkela po tagalke Yuda marya al miŋ hoyanya goyen budam wor po Yesu niŋ dufaymiŋ tareŋ iramiŋ. ² Gega Yuda mar kura mere go igiŋ ma nuramiŋ mar goreb al miŋ hoyan Yuda mar moŋ biŋ yakamkeb Yesu niŋ dufaymiŋ saŋiŋ iramiŋ mar goyen asogo yiramiŋ. ³ Niŋgeb asogo yirde hinhan goyen fole yirtek yeŋbe Polya Banabasya go nalu budam po gor heŋbe kafura ma heŋya Doyaŋ Al Kurun beŋ alya bereya bunineŋ nurde faraŋ yurde yawarde hinhin goke tagalde hinaryum. Irkeb gor niŋ mar gore fudinde yenaŋ yeŋbe irem gobe Doyaŋ Al Kurun beŋ tareŋ yirke mata tiŋeŋ kurayen kurayen forok yirde hinaryum. ⁴ Irkeb taun goyenter niŋ mar kurabe irem goke hamiŋ. Munan kurabe Yuda mar niŋ hamiŋ. ⁵ Irkeb Yuda marya al miŋ hoyanya goyen doyaŋ marmiŋya

gabu irde irem go hora po gasa yirteke kamiryen yenj mere sege iraminj.

Polya Banabasya Listra taunde kwaryum

⁶ Gega irem gobe mere go nurdeb busaharde Likonia nanare ninj taun irawa kura Listraya Derbiya gor kwaryum. Irdeb nanja bana go ninj taun binjanj wor kwaryum. ⁷ Kunj gonbe mere iginj Yesu ninj yitinj goyen tagalde tukunj hinaryum.

⁸ Be, Listrabe al kura kahanj simsimam goyen gor hinhin. Yenbe kawanj hirinde mat po munj kura ma huwarde kunj hitinj. ⁹ Al goyen keperdeb Pol mere tej hinhin goyen kenkela palnja irde hinhin. Irde al gore Polyen mere go fudinde yenj nurde binj hek irke kenenbe Al Kurunj belej amanenj nurde sope iryenj yenj nurdeb Pol belej dilinj bilminde po kenkela irdeb, ¹⁰ “Huwara!” inyinj. Irkeb bemel po huwarde kunj wanj tiyyinj. ¹¹ Be, al buda kurunj gore Pol mata tiyyinj go kenenbe yende mere mat po, “Baranj marnininj al faknunde henj katahar!” yenj wenjwonj tiyaminj. ¹² Irdeb Banabasbe Sus inaminj. Munanj Polbe tonanj al henj mere tej hinhin goke tenbe Hermes inaminj.

¹³ Be, Sus doloj ird ird yabe taun sinjare hinhin geb, Sus doloj ird ird mata doyanj alya taun goyenter ninj marya belej Banabas goyen Sus usi tenbe bulmakaw al dirinj yade umnja gitik tenj yukunj kumga tenj irem go doloj yirninj yenj taun yame kurunde gor yawayaminj. ¹⁴ Irkeb Yesuyen mere basanj mar Banabasya Polya gobe gwaha tininj tahanj yeke nurdeb daninj goya gwaha tininj tahanj yenj buninjenj wor po nurdeb ulinjhorminj

erek yirde kup yeŋ kuŋ al buda goyen kahal bana heŋbe, ¹⁵ “Danin gwaha teŋ haŋ? Deyyabe al deŋ yara po geb! Deyyabe Al Kurun gwahader hitin nanŋin, megen, makanya det kurun gayen yirin al gote mere igin gayen momon dirye yeŋ wayaruŋ. Irkeb mata kukuwamnen min minmon teŋ haŋ gahade gayenbe yubul teŋ Al Kurun hitte mulgan henayin. ¹⁶ Bikkenbe Al Kurun beŋ megen nin al tumnan gayen go ma nurde unen hikeb okohom po yubul tike dufayminde po kuŋ hinhan. ¹⁷ Gega Al Kurunbe buninen minyan geb, huginen po ma yubul tiyin. ‘Gwaha yirmeke Al Kurunbe fudinde hi yeŋ bin bak yenayin,’ yeŋbe det igin igin yunen hiyen. Nanŋinde mat kigarin yunen hiyen. Irde binŋebe naluminde yunen hiyen. Irde binŋe budam yunenbe binde wor aman po makin yirde hiyen. Irde deŋ manan gwahade po dirde hiyen gega, Al Kurun nin ma nurde haŋ,” yinen kwep kwep tiyaryum. ¹⁸ Be, irem gore gwaha yaryum gega, al buda gobe bebak ma teŋ dapna gasa yirde irem go galak yirde dolon yirin yeŋ kimnen po hamin.

¹⁹ Be, Yuda mar kura Pisidia nanare nin taun kura Antiokya Aikoniamya mat Listra taunde wanbe al buda kurun gor nin goyen wor bin yakamamin. Irkeb Pol goyen hora po mayamin. Irde kama yeŋbe tulun teŋ taun sinare tukun tubul tiyamin. ²⁰ Gega kamere Yesu nin dufaymin taren irde hinhan mar beŋ wan gabu irde kalyan kerde hikeb geren heŋ huwarde sopte taun bana gon hurkurin. Be, fay urkeb yenya Banabasya Derbi taunde kwaryum.

*Polya Banabasya Siria nanjare ninj taun kura
Antiok mulganj haryum*

²¹ Be, Polya Banabasya gobe Derbi taunde kunjbe Yesu ninj mere iginj goyen tagalke alya bereya karim ma Yesu ninj dufayminj saninj iraminj. Be, go kamereb irem go mulganj henj Litra taunde kwaryum. Gor matbe Aikoniam taunde kwaryum. Irdeb Aikoniam matbe Pisidia nanjare ninj taun Antiok taunde kwaryum.

²² Taunyanj goyen kunj henjyabe alya bereya Yesu ninj dufayminj tarej irtinj mar goyen, “Kame Al Kurunj hitte kuninj yenjbe okohom ma kutek. Kanduk kurayen kurayen yenenj gab kutek. Ningeb tarej po henj Doyanj Al Kurunj ninj dufaytinj saninj iranj goyen tubul ma tinayinj,” yinenj saba yirdya yirdya kunj hinaryum. ²³ Kunj henjyabe taun kurar ninj kurar ninj al kura Yesuyen alya bereya sios gote doyanj mar yirde kunj hinaryum. Irde binje kutja irde Al Kurunj mere irde henjyabe doyanj mar Al Kurunj ninj dufayminj hek irde hinhan mar goyen Al Kurunj belenj doyanj yirde hiyenj yenj Al Kurunj hanijde yerde hinaryum.

²⁴ Be, irem go Pisidia nanja bana gonj metenj tenj kunj kunjbe Pamfilia nanjare forok yaryum.

²⁵ Irdeb kunj Perga taunde Al Kurunjen mere tagalde Atalia taunde kurkaryum. ²⁶ Irde Atalia taunde matbe hakwa tenj mulganj henj Siria nanjare ninj taun Antiok kwaryum. Taun goyenterbe hanjapya Yesu ninj dufayminj tarej irde hinhan mar belenj metenj goyen tiyiryenj yinenj Al Kurunj belenj buninjenj yirde faranj yurde hiyenj yenj Al Kurunj hanijde yeraminj. Ningeb metenj go

pasi irdeb mulgañ heñ gor po kwaryum.

²⁷ Be, irem go mulgañ heñ kuñ Antiok forok yenbe gor niñ sios tumñañ gabu yirdeb meten tej kuñ hinaryum goyen momoñ yiraryum. Al Kurun beñ taren yirde farañ yurke daha mat al miñ hoyañ yad yad miñ uraryum goyen goke kenkela momoñ yiraryum. ²⁸ Irdeb Antiok gorbe nalu ulyañde po Yesu niñ dufaymiñ sañiñ irde hinhan marya hinaryum.

15

Polya Banabasya Yerusalem kwaryum

¹ Be, Yesu niñ dufaymiñ taren irde hinhan mar kura Yudia nañare mat Siria nañare niñ taun Antiok kwamiñ. Gor kuñbe Yesu niñ dufaymiñ taren irtiñ mar gor niñ goyen, “Al kura Yesu niñ dufaymiñ sañiñ irtiñ gega, Yuda marte tikula Mose beñ kayyiñ goyen ma gama irde guba ma yenayiñ gobe Al Kurun beñ epte ma yumulgañ tiyyen,” yen saba yirde hinhan. ² Irkeb Polya Banabasya beñ sabamiñ goyen igiñ ma nurdeb mere go sopte huwa irye yen mel goya kadom mohonde tiyamiñ. Gwaha tike yenenbe Antiok niñ Yesuyen alya bereya beñ, “Yerusalem kuñ aposel budaya gor niñ sios gote doyañ maryat mohonde wor po mere gate miñ kenkela nurde ga wayyi,” yen hulyañ yiramiñ. Irkeb Yesu niñ dufaymiñ taren irtiñ mar kuraya kwamiñ.

³ Beñmiñbe Fonisia nañaya Samaria nañayan kuñbe Yesu niñ dufaymiñ taren irtiñ goyañ niñ mar goyen al miñ hoyañ Yuda mar moñbe daha mat Al Kurun hitte biñ mulgañ hamiñ goyen

momon yiraminj. Irkeb mere go nurdeb amanj wor po haminj. ⁴ Be, kunj Yerusalem forok yaminj. Irkeb gor ninj siosya gote doyanj maryabe aposel budaya belenj amanenj nurde yunenj gargar yiraminj. Irkeb Al Kurunj belenj mel go faranj yurde sanj yirke metenj tenj hinhan kurunj goyen tumnanjde po momon yiraminj. ⁵ Irkeb Yesu ninj dufayminj tarenj irde hinhan goyen kurabe Farisi mar ningeb, mel gore nurde huwardeb, “Al kura Yuda mar monj al minj hoyanjde ninj gore Al Kurunj gama irninj yenbe nende tikula gama irde guba yenayinj,” yaminj.

⁶ Irkeb aposel budaya sios gote doyanj marya gore, “Mere gabe kanduknenj nurhet ninj, sope irninj,” yenj gabu iraminj. ⁷ Irdeb mere sege irke kunj kunj sobamde po hekeb Pita belenj huwarde gaha yinyinj: “Kadne yago, nende al monj al minj hoyanj goyen mere iginj Yesu ninj yitinj goyen nurde yenj ge dufayminj tarenj irnayinj yenj bikkenj Al Kurunj belenj ne Yuda mar al gayen basinja nirde hulyanj nirke kunj Yesu ninj momonj yirmirinj gobe nurde hanj gogo. ⁸ Al Kurunj, alya bereyat dufay kenkela wor po nurd yunenj hi Al gore nenj Yuda mar wa Holi Spirit dunyinj gwahade goyen po al minj hoyanj wor yuninj. Irkeb Al Kurunj belenj Yuda mar monj wor iginj nurde yunenj hi goyen bebak titirinj. ⁹ Al Kurunjbe gwahade goyen po nenya yenya tunjanđe denenj hi. Ningeb nende al ma yende al kura Yesu ninj dufayminj sanj iryenbe Al Kurunj belenj iginj ala po mata bulunminj halde pasi iryenj. ¹⁰ Nenj Yuda marte tikula gobe nenya asininj yagoya

belen gama ird ird nin meteney wor po nurde hityen. Ningeb epte ma elan urtek gayen daniñbe al miñ hoyañ gega Yesu nin dufaymin taren irtin gayen kanduk kurun supahakde ugohol tiniñ ten hañ? Deñ gayen Al Kurun tunañ urniñ ten hañ? ¹¹ Gwaha ma tinayin. Doyañ Al Kurun Yesu belen neñ dawaryin gwahade goyen po yen wor bunineñ nurde yunenbe farañ yurde yawaryin geb,” yinyin.

¹² Be, Pita go merem pasi irkeb Banabasya Polya belen wor mere tikeb dindeñ irde palña iramin. Irkeb irem go Yuda mar moñ gote nanayan kun meten ten hikeya Al Kurun belen mata tiñen kurayen kurayen forok yirde hin-hin goyen momoñ yiraryum. ¹³ Meremin pasi irkeb Yerusalem nin sios gote doyañ al kura Yems Yesu kulin belen huwardebe gaha yinyin: “Kadne yago, ga nurnañ. ¹⁴ Saimon Pita belen daha mat Al Kurun belen hanƙapya alya bereya kura Yuda mar moñ goyen yawarde dirneñ wen yiryin goyen momoñ dirke nurhet gogo. ¹⁵ Pita belen momoñ dira gobe bikkeñ Al Kurunyen mere basañ mar belen asañde mere katiñ gote miñ goyen po momoñ dira. Merebe gahade:

¹⁶ ‘Ne Doyañ Al Kurun gare yen hime.

Kamebe Dewityen miñ bulun hitin goyen ne belen mulgañ heñ wanbe sope ireñ.

Sope irde gabu irmeke tebañ taren hiyyen.

¹⁷ Gwaha irmekeb al hoyañ belen ne nin nanƙennayin.

Yuda mar moñ al miñ hoyañ tumñañ nenenbe biñ mulgañ hekeb nere alya

bereya henayin.

¹⁸ Al Kurun gwaha tiyen yen bin tiyyin mere kurun goyenbe al belen hakot nurde hinhan geb,

wan wan gayenter manan nurde hite,' yitin hi.

Amos 9:11-12

¹⁹ Ningeb Yuda mar mon Al Kurun hitte bin mulgan hen han mar goyen ingogaha ma yirtek.

²⁰⁻²¹ Gega Yuda marte tikulabe hakot taunyan taunyan tagalde hinhan. Gayenter wor nen Yuda marte gabu yanininyan Sabatmin Sabatmin huginen gwahade po tagalde hanen geb, mel go hitte asan po kan yunenbe, 'Ungura binke kan yuntin goyen go ma nene hinayin, lelep mata ma ten hinayin, dapna kura bininde fen tike kamtin ma haninde yaka tike kamtin gobe go ma nene hinayin, irde dapna dari wor go ma nene hinayin,' yinen mata gayen po gab utan yirtek," yinyin. Irkeb Yerusalem nin siosyen doyan mar belen Yuda mar mon Yesu nin dufaymin sanin irtin mar hitte asan kayamin.

Yerusalem nin sios belen Yuda mar mon hitte asan kayamin.

²² Irkeb aposel budaya Yerusalem nin Yesuyen alya bereya sios tumnan goyabe mel gote doyan mar belen, "Nende al kura basina irde hulyan yirke Polya Banabasya irde Antiok kunayin," yen mere mayamin. Irdeb Yudas denem kurabe Basabas goya Sailasya yade yapat yiramin. Al irawa gobe Yesu nin dufaymin taren irde hitin mar gote doyan mar. ²³ Irdeb Yerusalem hinhan

mar gore asañ katiñ gobe Antiok kutek mar go yunamiñ. Asañdeb gahade kayamiñ:

“Neñbe aposel budaya Yerusalem niñ sios gote doyañ mar gare asañ gago kañ dunhet.

Deñbe Antiok taunya Siria nañaya Silisia naña bana goñ niñ al Yuda mar moñ al miñ hoyañ gega, Yesu niñ dufaytiñ tareñ irde hañ. Niñgeb neñbe kadtin yago.

²⁴ Be, dende mere momoñ nurtinbe al kura gar hanjen gore gor kuñbe deñ goyen mere kukuwam mat dirke kandukneñ wor po nurañ. Go mar gobe neñ beleñ ma hulyañ yirteke kwan. Yinñeñ dufayminde kuñ mere gogo dirañ. ²⁵ Niñgeb goke teñbe neñ beleñ neñya hite mar kura yade kadniniñ warañ wor po Banabasya Polya irde deñ hitte kunayin yeñ goke mere maytin. ²⁶ Irem gobe Yesu Kristu niñ meten teñ hike gasa yirde bulun bulun yirke soñ kamde haryen. Gega goke kafura ma heñ metenmin goyen bada ma heñ haryen. ²⁷ Be, nende al yad yerteke kuriryen mar gobe Yudasya Sailasya. Irem gore deñ hitte kuñ gabe asañ bana gañ mere kañ hite gayen mohoñde wor po momoñ diriryen. ²⁸ Nende dufaybe Holi Spirityen dufayya tunande geb, neñ beleñ Yuda marte tikula goyen teñbe supahaktinde ma ughol titek. Gobe kanduk kurun wor po. ²⁹ Goyenpoga unğura binçe kañ yuntin gobe go ma nene hinayin, dapña darim ma nene hinayin, dapña kura bininde kañ giti irke kamtin ma haniñde yaka tike kamtin gobe go ma nene hinayin, irde leplep mata ma teñ hi-

nayin. Mata bulun gwahade ma ten hinayinbe igin po hinayin geb. Mereninibe gago po,” yamin.

³⁰ Be, mel go asan go tukan Antiok taunde forok yamin. Forok yenbe gor nin Yesuyen alya bereya gabu yirdeb asan go yunamin. ³¹ Yunkeb asan go kapyan hamin. Irde mere asande hi gore dufaymin sanin irke aman wor po hamin. ³² Irdeb Yudasya Sailasya wor Al Kurunyen mere basan mar geb, Antiok nin alya bereya Al Kurun nin dufaymin taren irde hitin goyen sanin hen hen ge faran yurye yenbe nalu ulyande po gor hen saba yirde hinaryum. ³³⁻³⁴ Be, irem gobe gor hen henbe Yerusalem kuren tikeb Antiok nin sios belen gabu irde aman hende yad yerke mulgan hen kwaryum.* ³⁵ Gega Polya Banabasyabe Antiok taunde gor hen Doyan Al Kurun nin taun goyenter nin mar goyen saba yirde hinhan. Irem gobe saba mar kadam budam goya gwaha ten hinhan.

Polya Banabasya bur yaryum

³⁶ Be, Antiok taunde gor hen meten ten tenbe nalu kurareb Pol belen Banabas kenenbe, “Hakot taunya kun Doyan Al Kurun nin saba yirde hinaryum goyen mulgan hen kunbe kaddere yago Yesu nin dufaymin taren irde hitin mar goyen dahade han goyen kun yenye,” inyin.

³⁷ Goyareb Banabasbe, “Yon Mak inen hanen goyen ten kure,” inyin. ³⁸ Gega Yonbe Pamfilia nanare gor irem go yubul ten busaharyin, irde

* **15:33-34:** Asan hoyandebe gahade hi: ³⁴ Gega Sailas gobe gor hen yen nuryin.

meten untiñ goyen go ma pasi iryiñ geb, Pol belen yenya kuñ kuñ goke igiñ ma nuryiñ. ³⁹ Irkeb gor matbe irem go kadam mohonđe tenbe bur yaryum. Irde Banabasbe Mak ten hakwa hende Saiprus motmotde kwaryum. ⁴⁰ Munañ Polbe Sailas ten kwen tikeb diñuñ Yesu niñ dufaymiñ sañiñ irtiñ Antiok hinhan mar gore, “Iginge kuri,” yinen Al Kuruñ belen doyañ yirde hiyen yeñ Al Kuruñ gusuñan iramiñ. Gwaha yirde yubul tikeb kwaryum. ⁴¹ Be, Polya Sailasya gobe Antiok taun tubul ten Siriaya Silisiaya nanare kuñbe Pol belen gor niñ sios goyen tareñ yirde hinhin.

16

Pol belen Timoti ten kuriñ

¹ Be, gwaha yirdeb kuñ Derbi taunde forok yaryum. Gor matbe Listra taunde kwaryum. Gorbe Yesu niñ dufaymiñ tareñ irde hitiñ al kura deñembe Timoti hinhin. Milinbe Yuda mar bere, irde yeñ wor Yesu niñ dufaymiñ sañiñ irde hinhin. Gega naniñbe Grik al.

² Be, Yesu niñ dufaymiñ tareñ irtiñ mar Listraya Aikoniamya taunde hinhan goreb Timoti al igiñ inen turuñ irde hinhan. ³ Irkeb Pol belen Timotiyen mere momoñ goyen igiñ nurdeb al go ten kwe yeñ nuryiñ. Gega Timoti naniñbe Yuda mar al moñ geb, guba ma yitiñ goyen gor niñ Yuda marbe nurde hinhan. Ningeb Yuda mar goñ hinhan mar gore Timoti keneñbe yeñ ge igiñ ma nurd unnayiñ yeñbe Pol belen guba yeñ unyiñ. ⁴ Go kamereb Listra taun tubul ten taun hoyañyan wor kwamiñ. Kuñ henyabe bikkeñ Yerusalem

gor aposel budaya siosyen doyanj marya gore Yuda mar moŋ gega Yesu niŋ dufaymiŋ tareŋ irde hinhan mar goke mere mayde asaŋ kaŋ Antiok niŋ sios yunamiŋ goyen goke momoŋ yirde kuŋ hinhan. ⁵ Irkeb mere go nurdeb goŋ niŋ sios goyen dufaymiŋ saŋiŋ hamiŋ. Irde al hoyan tiŋeŋ manan Yesu niŋ momoŋ yirke gise haŋka al budam yeŋ ge dufaymiŋ tareŋ irde hinhan.

Pol beleŋ yuwarwarte Masedonia al kura kinyiŋ

⁶ Gwaha teŋbe mel karwo, Polya Sailasyabe Timotiya go, “Eŋia naŋare kuŋ mere igiŋ Yesu niŋ yitiŋ goyen saba yirniŋ,” yamiŋ. Gega beleŋmiŋ goyen Holi Spirit beleŋ pet tike Frigiaya Galesiaya naŋare kwamiŋ. ⁷ Gor matbe Misia naŋaya Bitinia naŋaya gote biptire kwamiŋ. Irdeb Bitinia naŋare kuniŋ yekeb goyen manan Holi Spirit beleŋ pet tiyyiŋ. ⁸ Niŋgeb Misia naŋa bana gor kuŋ kuŋbe Troas taunde forok yamiŋ. ⁹ Kuŋ gor henyaŋ wawuŋ kura Pol beleŋ yuwarwarte Masedonia niŋ al kura kenke huwardeb esen mere irdeb, “Masedonia beleŋ gaŋ waŋ faran durayiŋ,” inyiŋ. ¹⁰ Be, Pol beleŋ go tagalke nurdeb, “Al Kuruŋ beleŋ Masedonia niŋ marbe mere igiŋ Yesu niŋ yitiŋ goyen momoŋ yirniŋ yeŋ dikala dira,” yeŋ goyare po gitik teŋ kuniŋ titiriŋ.

Lidia Yesu niŋ biŋ mulgan hiriŋ

¹¹ Be, hakwa kura Troas taunde mat teŋbe Samotres motmotde po kutiriŋ. Irdeb fay urkeb gor mat sopte hakwa go hende po Neapolis taunde kutiriŋ. ¹² Gor matbe kahaŋniniŋde kuŋ

kuŋ Filipai taunde forok yitirin. Taun gobe Masedonia gote taun kurunmin. Roma gabmanyen meten marbe gor heŋ naŋa go doyan irde hinhan. Neŋbe naŋkahal budam yara gor hinhet.

¹³ Be, Sabat nalu kurarebe Yuda mar belen gabu irde Al Kurun mere irde hinhan gasun nin naŋkinnin yen taun gote yame kurunde mat kat kunbe fete kura gor kutirin. Irde fe sinakde gorbe bere buda kura gor gabu iramin go yeneŋbe yenya keperde mere ten hinhet. ¹⁴ Gorbe Taiaaira taunde nin bere kura denem Lidia wor bana gon heŋ mereninin nurde hinhin. Yende metenbe amil umŋam bukkenya digulakya suluk yirke bukken yara hitin* goyen yirde hike damu ten hinhan. Yenbe Al Kurun dolon irde hinhin geb, Polyen saba go nurde hikeyabe Al Kurun belen dufaymin fegelkeb saba gote min bin bak yirin. ¹⁵ Niŋgeb yenya dirinminminya saba goyen fudinde yen nurdeb baptais tamin. Go kamereb yaminde duke yenbe, “Fudinde Doyan Al Kurun nin dufaymin taren ira yen nurd nunhan kenem wake yaner kunin,” dinyin. Irde dinen teban po dirkeb bada heŋ kuŋ yenya hinhet.

Polya Sailasya koyare yeramin

¹⁶ Be, kurarebe Yuda mar belen Al Kurun mere irde hinhan gasunde kutirin. Gor kuŋ henya belenbe bere fonen kura kintirin. Yenbe al kurate meten bere, irde damum mon meten ten yunen hinhin. Yenbe unŋura belen ketal urtin gore dufay unke al hitte kame da mata forok yenayin

* **16:14:** Amil bukken yara gobe doyan marte amil umŋa yirde hanjen.

goyen goke tagalde hiyen. Niñgeb al beley hora unenbe, “Kame ne hitte da mata forok yiyyen?” yen gusunaj irde hanjen. Be, yenbe doyan irde hinhan mar gwaha mat hora budam yade yunen hiyen. ¹⁷ Be, bere gore Polya nenya gama dirdeb, “Mel gabe Al Kurun tonnen yan wor po Al gote meten mar. Mel gabe daha mat Al Kurun beley alya bereya yumulgan tiyyen goke momon dirde han,” yen kuware mere ten hinhin.

¹⁸ Be, bere gore huginen wawun budamde gwaha po dirde hinhin. Irkeb wawun kurare kurab Pol go bin ar yeke tigiri tenbe unura bere go ketal urtin hinhin goyen, “Yesu Kristuyen denemde ginhem. Bere ga tubul ten kat kwa!” inyin. Irkeb goyare po bere go tubul ten kat kurin.

¹⁹ Irkeb bere go doyan irde hinhan mar gore hora ten ten belemi pet tike kenenbe bin ar yamin. Irkeb Polya Sailasya go yanarde yulun ten merere yirni yen taun gote gabu gasun doyan marmin hinhande gor yukamin. ²⁰ Bere doyan irde hinhan mar beley Filipai taun gote doyan mar Roma gabman al hitte yukunbe, “Al iraw gabe Yuda mar al. Irem garebe nen taun gayen bana nin al bulun dirde har. ²¹ Yenbe mata hoyan wor po nen Roma mar gahade gare epte ma titek goyen tagalde har,” yen tagal yunamin.

²² Be, al buda kurun gor gabu iramin go tunnande asogo yirde gasa yirtek yamin. Irkeb doyan mar beley fulen marmin yinkeb ulinhormin erek yirde yuguya ten yunenbe sikken ulinde yusulak tiyamin. ²³ Yusulak ten bulun

wor po yirdeb yad koya bana yeramiñ. Irdeb koya doyañ al goyen, “Keñkela doyañ yira ko. Monjo, busahariryen geb,” inen hayhay iramiñ. ²⁴ Gwaha inke nurdeb irem go yukuñ koya bana goñ kahalte wor po gwaha mat kura busahartek miñmoñ bana yiryiñ. Irdeb he hakwa al fere yird yird niñ yukuñ yirtiñ hinhande gor kahañ gor yerde sen po giti yiryiñ.

²⁵ Be, wawuñ binde wor pobe irem gore Al Kurun mere irde kasor irde tikiñ heñ hikeb koyare hinhan mar hoyañ beleñ nurde hinhan. ²⁶ Irem go gwaha ten hikeyabe bemel po niniña kurun tikeb koya gote miñ aṅsok irde tubul tike yame gor niñ tumñañ siksuk iramiñ. Irde sen koyare hinhan mar giti yiramiñ goyen wor yinḡen suk yeñ pasi hamiñ. ²⁷ Irkeb koya doyañ al gore huwarde kuñbe yame tumñañ hol yitiñ yeneñbe al koyare hinhan marbe busaharhañ yeñ nurdeb fuleñare niñ bidilamiñ ten yinḡen mayeñ tiyyiñ. ²⁸ Gega Pol beleñ arañ po keneñbe kwep iryiñ. “Gigeñ mayde ma! Neñbe tumñañ po hite geb!” inyiñ.

²⁹ Goyarebe kidoma bana mere irde hinhin geb, koya doyañ al gore hulsi niñ hoy yiriñ. Irkeb hulsi tawañ unkeb kup yeñ hurkuñ irem go diliñde kafura hende uliñ barbar yeñ kuñ kuku kayyiñ. ³⁰ Gwaha tenbe siñare yade katyiñ. Irdeb, “Irem, daha timeke gab Al Kurun beleñ nawaryeñ?” yineñ gusuñañ yiryiñ. ³¹ Irkeb, “Dufayge Yesu Kristu niñ po sañiñ irayiñ gab Al Kurun beleñ gumulgañ tiyyeñ. Irde ge niñ ten diriñmiñge tumñañ gwaha tinayiñbe yeñ wor yumulgañ

tiyyen,” inaryum. ³² Irkeb al gore dirinminmin hoy yirke wakeb Polya Sailasya belen tumnande Doyan Al Kurun nin saba yirde momon yiraryum. ³³ Be, go wawun goyen po koya doyan al gore irem go ulinde dariya usuya goyen halde yuntek gasunde yukun halde yunenbe mala tiyyin. Gwaha yirkeb goyare po irem gore mel goyen tumnan baptais yiraryum. ³⁴ Go kamereb irem go yaminde yukun binje yunke naryum. Be, al goya dirinminmin yagobe Al Kurun nin dufaymin taren iramin goke aman wor po hamin.

³⁵ Be, fay urke wampotbe taun gote doyan mar belen, “Koya doyan al go inke al irawa yad fere tiyun goyen yubul tike kuri,” yen fulen marmin hulyan yirke kun inamin. ³⁶ Irke koya doyan al gore Pol goyen, “Taun doyan mar belen yubul tike kuri ninhan ningeb, iginje bitirin kamke kuri,” inyin. ³⁷ Gega Pol belen hardeb fulen mar goyen yinyin: “Mon, deyyabe Roma mar al gega, kibe dulin wor po min minmon al dilinde dusulak dirde koyare deran. Munan han kabe balmin kuri dinhan? Mon, deyyabe epte ma gwaha tiyen. Yinke wan yingen dade sinare dukunayin,” yinyin. ³⁸ Irkeb kun taun doyan mar hitte mulgan henbe, “Irem gobe Roma mar al nen belen mali gasa yirtek mon gega, bulun yirtin,” yinkeb kafura hamin. ³⁹ Irde wan irem go pohogay yirdeb koyare mat yukun sin a yirdeb, “Dubul ten hoyande kuri,” yinamin. ⁴⁰ Gwaha yirkeb katen sinare henbe Lidiayen yare kwaryum. Kun gorbe Yesu nin dufaymin taren irde hinhan mar yenenbe saba yirde sanin hen hen ge faran yur-

deb yubul tiyaryum.

17

Polya dinuŋ waraŋyabe Tesalonaika taunde kwamiŋ

¹ Be, Polya dinuŋ waraŋyabe Amfipolis taunya Apolonia taundeya kuŋ gor matbe Tesalonaika taunde forok yamiŋ. Gorbe Yuda marte gabu ya kura hinhin. ²⁻³ Be, Polbe teŋ hinhin gwahade po Tesalonaika taunde gor manaŋ Yuda marte gabu yare kuriŋ. Irdeb Sabat nalu karwo gayen gor kuŋbe al waŋ gabu irde hinhan mar goyen Al Kurunyen asaŋde Mesaia kame wayyeŋ yitiŋ al goke momoŋ yirde hinhin. Mesaia gobe uliŋ misiŋ kurun kateŋ kamdebe huwaryeŋ yitiŋ goyen Al Kurunyen asaŋde mat miŋ pitik irde momoŋ yirde hinhin. Irdeb, “Ne belej Mesaia niŋ dineŋ hime al gobe Yesu,” yinyiŋ. ⁴ Gwaha yinke nurdeb Yuda mar kurabe Polyen saba go fudinde yeŋ nurde Polya Sailasyat mere gama iramiŋ. Goyenbe mel go po moŋ. Grik mar gega Al Kurun kafura irde hinhan goya taun goyenter niŋ doyaŋ marte berem weŋ manaŋ budam po gwaha tiyamiŋ.

⁵ Gega Yuda mar kurabe al budam belej irem gote saba po gama irkeb goke biŋ ar yamiŋ. Irdeb taun bana goŋ al budam gabu irde hinhan gasuŋde gor kuŋ al dufaymiŋ buluŋ goyen gabu yirde fuleŋa tinaŋ yeŋ biŋ yakamamiŋ. Gabu irke al budam wor po hekeb taun binde gor kwep kwep teŋ det gwamuŋ teŋya teŋya kwamiŋ. Irdeb irem go yade yukuŋ kawan alya bereya diliŋde

yirniñ yeñbe yeñ ge teñ Yesonyen yare kwamiñ. ⁶ Gega irem go gor ma yeneñbe Yesonya diñuñ yago Yesu niñ dufaymiñ sañiñ irde hinhan mar kura yade yuluñ teñ taun doyañ irde hinhan mar hitte yukamiñ. Irde mel goreb, “Polya diñuñ yagoya gayenbe naña kurun goyen kuñ heñbe kanduk karkuwañ forok yirde kuñ hanñen gore gar wayañ. ⁷ Irkeb Yeson beleñ yamiñde yerde hiyen. Yesonyen yare gabu irde hañ mar gobe Roma gabmanyen doyañ al kurun Sisaryen mere ma gama irde hañ. Irde, ‘Doyañ al kurun hoyañbe al kura Yesu inen hanñen go po ga hi,’ yeñ hañ,” yeñ taun doyañ mar diliñde misineñ yañ po tagalamiñ.

⁸ Irkeb taun doyañ marya al gor gabu iramiñ mar gobe biñ ar yamiñ. ⁹ Irde Yesonya kadom yagoya goyen, “Mata bulunñiñ goke murunñem kernañ,” yinke gwaha tiyamiñ. Irkeb, “Kamebe sopte gwaha ma tinayiñ,” yinen yubul tike mulgañ heñ kwamiñ.

Polya Sailasya Beria kwaryum

¹⁰ Be, gwaha tiyamiñ goyen wawuñ hekeb Tesalonaika niñ mar Yesu niñ dufaymiñ tareñ irtin mar beleñ Polya Sailasya goyen yad yerke Beria taunde kwaryum. Kuñ gor forok yeñbe Yuda marte gabu yare kwaryum. ¹¹ Beria taunde niñ Yuda marbe Tesalonaika niñ yara moñ. Yeñbe irem gore Yesu niñ mere tagalde hike aw aw ma yurde palña yirde hinhan. Irdeb irem gote mere gob fudinde ma usi goyen bebak tiniñ yeñ Al Kurunñen mere asañde hakot katiñ goyen gise hanñka kapyañ heñ gor niñ mere keneñ bebak teñ

hinhan. ¹² Irde gor niñ Yuda mar budam Yesu niñ dufaymiñ tareñ iramiñ. Goyenbe mel go po moñ. Al miñ hoyañ Grik alyabe bere denem yanja goyen wor Yesu niñ dufaymiñ sañiñ iramiñ.

¹³ Be, Pol beleñ Al Kurunyen mere Beria taunde gor tagalde hinhin gote mere momoñ gobe Tesalonaika niñ Yuda mar beleñ nurdeb gor wor kwamiñ. Irdeb gor niñ mar goyen biñ yakamde dufaymiñ haga yiramiñ. ¹⁴ Gwaha tike yenenbe goyare po Beria niñ mar Yesu niñ dufaymiñ tareñ irde hinhan gore Pol go teñ kerke makañde kurkuriñ. Munañ Timotiya Sailasyabe gor po hinaryum. ¹⁵ Be, Pol go al kura beleñ maynak yenbe yenya kwamiñ mar gore tukun Athens taunde tubul tiyamiñ. Irdeb mulgañ hiniñ tikeb Pol beleñ mel goyen, “Timotiya Sailasya yinke arañeñ po wañ gar nupi tiyiryen,” yinyiñ.

Polbe Athens taunde kuriñ

¹⁶ Be, Pol go Athens taunde heñ irem goyen doyañ yirde henyaabe taun binde gor Al Kuruniniñ usi teñ det toneñ yirtiñ goyen budam wor po yeneñ dufaymiñ kandukneñ wor po hiriñ.

¹⁷ Irkeb Yuda marte gabu yareb nalumde kun Yuda marya Grik marya Al Kurun kafura irde hinhan goya mere teñ saba yirde hinhin. Irde gise hanca hugineñ taun binde al budam kun wañ teñ hinhande gor kun al gor hinhan goyen Al Kurunyen mere saba yirde hinhin.

¹⁸ Mere igiñ Yesu niñ yitiñ goyen tagalde henyaabe Yesu mayke kamde huwaryiñ goyen goke saba yirde hinhin. Goyen saba yirde hikeyabe al kura Epikuriayen dufay gama irde

saba ten hanjen marya dufay hoyan kura Stoik yen hanjen gote saba ten hanjen marya gore Polyen saba goyen nurdeb yenza kadom monde tiyamin. Irdeb go mar goyen kura belen, “Al gabe dani malikan lawlaw yen hi?” yamin. Irkeb al hoyan kura belen, “Al gabe tikula hoyan nin dinen hi,” yamin. ¹⁹ Gwaha yenbe Atens taunde gor nin doyan mar belen gabu irde hanjen gasun Areopagus inen hanjende gor kun ga mere titek inenbe Polya tumnan kwamin. Irde gor kunbe, “Saba gergen tagalde ha goyen kenkela minde mat momon dira. ²⁰ Ge belen dufay gergen kura nen ma nurde hityen goyen tagalde ha gote min nurtek ningeb, momon dira ko,” inamin. ²¹ (Be, Atens taun gote min marya al hoyande nin wan gor hanjen maryabe dulin po hen dufay gergen po nurtek yirde hinhin. Irde dufay gergen goke po tagalke kun kun wawun yurde hinhin. Huginen gwahade po ten hinhan.)

²²⁻²³ Be, mel gore gwaha inke Pol belen gabu gasun Areopagus inen hanjende gor huwardeb gaha yinyin: “Den Atens nin mar! Tauntin bana gayen kun wan ten henyabe den belen dolon yirnin yen det tonen kurayen kurayen rindam yan yirtin goyen budam wor po yinmin. Gega rinda kurabe det tonen minmon hike kinmin. Irdeb bindere kun gorbe, ‘Rinda gabe Al Kurun kura go ma nurd unen hite gote gasun,’ gwahade katin hi goyen kinmin. Goke ten denbe Al Kurun fudinde dolon irtek nurde han yen denen hime. Ningeb den belen kenkela ma nurde unen han Al Kurun fudinde wor po goyen goke momon

direnj tihim. ²⁴ Al Kurunj gobe megenya nanjinya irde det kurunj gayen yiryinj. Yenbe megenya nanjinya gote Doyan Al Kurunj. Ningeb yenbe al belenj dolonj irninj yenj ya irde unhet yenj hanjen bana gonj ma hiyen. ²⁵ Yenbe tonnininj dunyinj geb, gago dilnininj gergenj hite. Irde det buda kurunj gayen wor yenj belenj dunyinj. Yenbe det buda kurunj gote minj al geb, det kuranj ma amu henj hi. Ningeb det kura hannininj irde untek epte monj. Hubu wor po! ²⁶ Hanjapya wor pobe yingenj al unjkurenj iryinde gor mat po al minj hoyanj kurayen kurayen gogo forok yaminj. Irde megenj ga tenj keperde tukaminj. Al Kurunjbe dufayminj epte. Ningeb nenj ma forok yitirinja gwaha nanja forok yenayinj, irde damde hinayinj goyen yingenj dufayminj nurde hinhin. ²⁷ Be, Al Kurunj gisaw ma hi al gore, 'Det kurunj yirmirinj gayen al belenj yenenbe ganunj belenj yiryinj yenj ne ninj sar kernayinj. Irdeb nenenbe fudinde yenj nurdeb ne hitte wanayinj,' yenj mata kurunj gogo tiyyinj. ²⁸ Be, Al Kurunjbe gisaw ma hi goke tenjbe al kura belenj, 'Nenbe Al Kurunjen tarende tonnininj yanj henj kunj wanj tenj binininj fut irde hite gago,' yirinj. Yirinj gwahade goyen po dende al kura belenj, 'Nenbe Al Kurunjen dirnenj wenj,' yenj tikiinj bilminj kayyinj. ²⁹ Fudinde nenjbe Al Kurunjen dirnenj wenj ningeb, Al Kurunjbe al dufayde det tonej kura gol, silwaya hora belenj yirtinj gwahade yenj ma nurtek. ³⁰⁻³¹ Bikkenjbe Al Kurunjbe gwahade yenj ma nurde unenj hinhet gega, goke dinenj ma tenj hinhin. Gega yenj belenj nalu goyenter yirinde gorbe megen

niņ alya bereya tumņañ igiņya buluņya goyen pota yiryen. Niņgeb gayenterbe, ‘Megen niņ al tumņañ mata buluņmiņ yubul teņ Al Kuruņ niņ biņ mulgaņ henayiņ,’ yineņ hi. Be, nalu goyenterbe Al Kuruņ beleņ basiņa irde meten untiņ al gore keņkela po megen niņ al tumņañ pota yiryen. Be, mata gwahade forok yiyyen goyen al tumņañ fudinde yeņ nurnayiņ yeņ Al Kuruņ beleņ al go kamyiņde mat isañ heke huwaryiņ,” yinyiņ.

³² Be, Pol beleņ Yesu kamde ga huwaryiņ goke yeke nurdeb, “Al ga usi wet kura dirde hi be,” yeņ hinmaņ iramiņ. Munaņ kura marbe, “Kame ga mere go sopte momoņ dirayiņ,” inamiņ. ³³ Be, Pol go gabu gasuņ goyen tubul teņ kuriņ. ³⁴ Be, gorbe al budam moņ, yuņkureņeņ kura gore Polyen saba gobe fudinde yeņ nurdeb gama irde Yesu niņ dufaymiņ saņiņ iramiņ. Goyen mar goyen kurabe doyaņ marte gabu gasuņ Areopagus ineņ haņyende gor kuņ hiyen al kura Dionisius. Munaņ kurabe bere kura deņem Damarisyabe al hoyañ kura goya.

18

Polbe Korin taunde kuriņ

¹ Be, Pol go Atens taun tubul teņbe Korin taunde kuriņ. ² Gorbe Yuda mar al kura deņembe Akwilaya berem Prisilaya hike yinyiņ. Be, al gobe Pontus naņare kawaņ hiriņ, irdeb kuņ Itali naņare hinhin. Gega Roma gabmanyen doyaņ al kuruņ Klodius beleņ, “Yuda marbe Itali naņare

niņ taun kurun Rom ga tubul ten hoyande kunayin,” yirin. Irkeb ire unya gobe Itali nana go tubul ten Korin taunde wayaryum. Irde gor sobamde ma hikeya Pol wake kenaryum gogo. ³ Be, Akwilabe dapna sikken po sel haran hen hen al. Irde Pol manan meten goyen po ten hora ten hiyen geb, ire unya goya hen tumnan meten go ten hinhan. ⁴ Irdeb, ‘Daha mat kura Yuda marya Grik marya gayen saba yirmeke Yesu niņ dufaymin taren yirnan,’ yen Sabat nalumin nalumin huginen Yuda marte gabu yare kun saba yirde hinhin.

⁵ Be, gor hen gwaha ten hikeyabe Sailasya Timotiya gobe Masedonia nanare mat wayaryum. Wakeb sel ya yird yird meten go tubul ten Al Kurunyen mere goyen po tagalde, “Fudinde Yesube Mesaia,” yinen saba yirde hinhin. ⁶ Gega Yuda mar gobe Pol beken saba yiryn go ma nurtek yirke sukal irde hinhan. Irkeb Pol beken mel goyen, “Al Kurunyen mere saba dirde hime gayen ma nurhan geb, kame kanduk kura forok yiyyen gobe dende samun. Neya neya mon. Nebe dubul ten Al Kurunyen mere tukun al min hoyan po ga momon yirde hen geb,” yinenbe mel goyen nindiken bulun tihit yen kenen bebak tinayin yen nurdeb Yuda marte matare ulinhormin busan hirin. ⁷ Irde yubul ten Titius Yastusyen yare kurin. Yamin gobe Yuda marte gabu ya sinakde gor hinhin. Yenbe Yuda mar al mon gega, Al Kurun dolon irde hiyen. ⁸ Be, gabu yare gor gabu irde hinhan mar gote doyan al Krispusya dirinmin tumnan Polyen saba nurde Doyan

Al Kurunj niŋ dufaymiŋ tareŋ iramiŋ. Al hoyan Korin taunde niŋ manaŋ budam Yesu niŋ dufaymiŋ saŋiŋ irde baptais tamiŋ.

⁹⁻¹⁰ Be, gor henyaŋe wawuŋ kura yuwarwarte Doyaŋ Al Kurunj forok yeŋbe, “Nere al budam taun gayenter haŋ geb, al kura beleŋ epte ma muguneŋ buluŋ buluŋ giryeŋ. Irde nebe geya har geb, al saba yird yird niŋ kafura heŋ bada ma hawayiŋ. Hugiŋeŋ tagalde po hayiŋ,” inke Pol go kinyiŋ. ¹¹ Be, Polbe dama uŋkureŋ irde gagasi 6 gayen gor heŋ Al Kurunyen mere saba yirde hinhin.

Yuda mar beleŋ Pol merere keramiŋ

¹² Be, Roma al Galio beleŋ Akaia naŋa doyaŋ irde hikeya gor niŋ Yuda mar beleŋ gabu irde Polbe Akaia naŋa gote taun Korin hinhin goyen fere teŋ merere keramiŋ. ¹³ Merere tukuŋbe doyaŋ al Galio diliŋde gaha inamiŋ: “Al garebe mata hoyan mat Al Kurunj dolon irde hinayiŋ yeŋ al saba yirde Yuda marte tikula ma gama irnayiŋ yineŋ hi,” inamiŋ. ¹⁴ Irkeb Pol beleŋ hako ga mere goyen wol heweŋ tikeyabe Galio beleŋ Yuda mar go, “Al gare al kura mayke kamuŋ ma mata buluŋ kura tiyuŋ manhan dende mere ga nurme-woŋ. ¹⁵ Gega mere yahaŋ gabe deŋ Yuda marte deŋeya mereya niŋ po kadom mohonde teŋ haŋ. Irde tikulatiŋ ge po ŋagak yahaŋ gobe dindiken po mere go sope irnayiŋ. Nebe meretiŋ gayen go ma nureŋ,” yinyiŋ. ¹⁶ Irdeb merere mat yakira teŋbe, “Siŋare kunaŋ!” yinyiŋ. ¹⁷ Irkeb Yuda mar go biŋ ar yeke tigiri teŋ yende gabu yare gabu irde haŋyen mar gote doyaŋ al Sostenes goyen

mere gasunđe go po mayde mayde keramiņ. Gega Galiobe yeneņ wasak tiyyiņ.

Pol mulgaņ heņ Siria naņare niņ taun Antiok kuriņ

¹⁸ Be, Pol gobe Korin sobamde heņbe Siria naņare mulgaņ hewe yeņ Prisilaya uņ Akwilaya yade gor niņ mar Yesu niņ dufaymiņ tareņ irtiņ mar go yubul teņ makaņ siņare niņ taun Senkria kuriņ. Irde gor kwe yeņyabe bikkeņ Al Kuruņ hitte biņa tiyyiņ goke teņbe Yuda marte matare tonaņ walde gabe hakwa teņ kuriņ.

¹⁹⁻²¹ Be, taun go tubul teņ kuņbe Efesus taunde forok yamiņ. Irdeb Pol go Yuda marte gabu yare kuņ mel gor niņ mar goyen, ‘Daha mat kura Yesu niņ nurwoņ,’ yeņ keņkela po mere yirde hinhin. Gwaha yirde hikeyabe mel gore, “Ulyanđe heņ saba dirde hayiņ,” ineņ basiņa iramiņ. Gega bada yiryiņ. Irdeb kwe yeņya, “Kame Al Kuruņ beleņ sopte kwa ninke gab wayeņ,” yinyiņ. Irdeb hakwa teņ kuriņ. Be, Efesus taunde gorbe Prisilaya uņ Akwilaya goyen yubul tiyyiņ. ²² Irdeb kuņ Sisaria taunde forok yiriņ. Gor matbe kahaņde kuņ Yerusalem forok yeņ Yesuyen alya bereya sios gor niņ yeneņ mere yirdeb go kamereb Siria naņare niņ taun Antiok kuriņ. ²³ Be, Antiok taunde hitneņ teņbe sopte Galesia naņaya Frigia naņaya bana goņ kuņ waņ teņbe Yesu niņ dufaymiņ tareņ irde hinhan mar goyen yeneņ saba yirde saņiņ yirde kuņ hinhin.

Apolos beleņ al saba yirde hinhin

²⁴ Be, Pol go gwaha teņ kuņ hikeyabe Yuda mar al kura deņem Apolosbe Aleksandria taunde

kawan hirin al goyen Efesus taunde wayyin. Yenbe Al Kurunyen mere ep hitin, irde merem nurdminbe pantalkek wor po. ²⁵ Yenbe bikken al kura belen Doyan Al Kurun nin saba irke nuryin. Irdeb Yesu nin al saba yird yird nin amanen wor po nurde kenkela yen ge tagalde hinhin. Gega yenbe Yon Baptais belen mata bulun yubul ten baptais tenayin yen tagalde hinhin go po ga nurde hinhin. Munan Holi Spirityen baptais Yesu belen yitin gobe go ma nurde hinhin.

²⁶ Be, yen belen Yuda marte gabu yare kun gor al gabu irde hinhan goyen kafura ma hen saba yirde hinhin. Irkeb Prisilaya un Akwilaya sabamin go nurdeb yaminde tukaryum. Irdeb Apolos goyenbe ire unya gore kenkela wor po Al Kurunyen mata saba irke nurde bebak tiyyin.

²⁷⁻²⁸ Be, Apolos go gor hen henbe Akaia nanare kwen yirin. Irkeb dinun Yesu nin dufaymin tarej irde hitin mar Efesus taunde nin gore Apolos goyen tarej hen hen nin faran yurde asan kayamin. Asan gobe Yesu nin dufaymin sanin irtin mar Akaia nanare nin gore Apolos kenenbe igin igin irnayin yen kayamin. Be, Apolos go Akaia nanare kunbe gor nin Yuda mar nin kafura ma hen mel goya kawan gabu irde saba misinen yirde hike gwaha mat kura gor nin Yuda mar belen mere titek mon hamin. Gwaha irde henyab Yesube Mesaia goyen momon yirde goke Al Kurunyen mere yikala yirde hinhin. Be, Apolos gobe kun gwahade saba yirde hike Al Kurun belen buninen nurde yunen faran yurke Yesu nin dufaymin tarej irtin mar goyen sabamin

nurde tareŋ hamiŋ. Be, Apolos gobe gwahader po gor niŋ sios faranŋ yurde hinhin.

19

Polbe Efesus taunde kurin

¹ Be, Apolos gobe Akaia naŋa bana go niŋ taun Korin hikeyabe Polbe belemiŋ Galesiaya Frigiaya dugu bana mat kuŋ kuŋ makanŋ siŋare niŋ taun Efesus forok yiriŋ. Gorbe Yesu niŋ dufaymiŋ tareŋ irtiŋ mar kura yinyiŋ. ² Irdeb, “Yesu niŋ dufaymiŋ tareŋ iramiŋ goyenbe Holi Spirit mananŋ tamiŋ we?” yeŋ gusuŋanŋ yiryiŋ. Irkeb, “Moŋ, Holi Spirit niŋ yeŋ ha mere gobe tiŋeŋ wor po. Ma po nurde hityen,” inamiŋ. ³ Irkeb, “Be, niŋgeb daniŋ baptais tamiŋ?” yinyiŋ. Irkeb, “Neŋbe Yon Baptais belemŋ saba tagalde hinhin gote miŋ po gama irde baptais titiriŋ,” inamiŋ. ⁴ Irkeb Pol gore gaha yinyiŋ: “Yonbe al belemŋ, ‘Mata bulunŋiniŋ yubul teŋ Al Kurunŋ niŋ bininiŋ mulganŋ hihit,’ yeke gab baptais yirde hinhin. Irdeb, ‘Kame Al kura harhokner wayyeŋ al goke dufaytiŋ sanŋ irnayeŋ,’ yiriŋ. Be, Yon belemŋ yiriŋ al gobe Yesu niŋ yiriŋ,” yinyiŋ. ⁵ Gwaha yinke nurdeb, “Baptais Yesu belemŋ yitiŋ goyen tetek,” inkeb Pol belemŋ Doyanŋ Al Kurunŋ Yesu deŋemde baptais yiryiŋ. ⁶ Be, baptais yirde mel go hende haniŋ yerde Al Kurunŋ gusuŋanŋ irkeb Holi Spirit katyiŋ. Irkeb yende mere moŋ, mere tiŋeŋ kurayen kurayen tiyamiŋ. Irde Al Kurunŋ belemŋ mata kame forok yiryenŋ goke tagalamiŋ. ⁷ Be, gorbe al 12 belemŋ gwaha tiyamiŋ.

⁸ Be, Pol go gor gagasi karwo hinhinyabe Yuda marte gabu yare kuŋ kafura miŋmoŋ gwaha mat bebak tinayiŋ yeŋ mel goya mere tagalde saba yirde hinhin. Mere miŋbe Al Kurun beleŋ yende alya bereya doyaŋ yird yird mata goke mere teŋya saba yirde hinhin. ⁹ Gega tonan tareŋ Yuda mar kurabe Polyen saba goke igiŋ ma nurde Yesu niŋ dufaymiŋ tareŋ ird ird niŋ bada hamiŋ. Irde al buda diliŋde Yesu gama ird ird mata goyen buluŋ mat tagalamiŋ. Goke teŋbe Pol beleŋ mel go yubul teŋbe Yesu niŋ dufaymiŋ saŋiŋ irtiŋ mar go po ga saba nurd nurd ya kurun kura denjembe Tiranus gor yukuriŋ. Gorbe naŋkahalmiŋ naŋkahalmiŋ hugiŋeŋ Al Kurunyen mere miŋ goyen mel goya tagalde saba yirde hinhin. ¹⁰ Be, Pol gobe dama irawa gor hinhin. Goyarebe Esia naŋa bana go niŋ Yuda marya al miŋ hoyan Grik marya goyen tumŋan mere Doyaŋ Al Kurun niŋ yitiŋ goyen nuramiŋ.

Siwa urmiŋ yago

¹¹ Be, Al Kurun beleŋ Pol goyen tareŋmiŋ unke mata tiŋeŋ wor po kurayen kurayen forok yirde hinhin. ¹² Irkeb Pol beleŋ amilya nufol hal hal amil parwek sisan yurtiŋ goyen wor al beleŋ yukuŋ gore po al garbam miŋyaŋ sisan yurde hike igiŋ heŋ hinhan. Irde al kura unguram yaŋ wor gwahade po yirde hike ungura beleŋ al go yubul teŋ kuŋ hinhan.

¹³ Be, Yuda mar al kura beleŋ ungura al bana hinhan goyen yakira teŋ teŋ ge kuŋ waŋ teŋ hinhan. Irde mel gore ungura al bana haŋ goyen yakira tiniŋ yeŋ Doyaŋ Al Kurun Yesu denje urde,

“Pol beleŋ sabamiŋ tagalde hiyen al Yesu gote deŋemde dinhet. Kat kunaŋ!” yineŋ hinhan. ¹⁴ Pris buda gote kurunŋiŋ deŋembe Siwa gote urmiŋ yago 7 goyen manaŋ gwaha teŋ hinhan.

¹⁵ Be, nalu kurarebe al kura unŋuram yaŋ al goyen sope irniŋ yeŋ yamiŋde kuŋbe, “Unŋura go takira tihit,” yeŋ nuramiŋ. Gega unŋura gore wol heŋbe, “Yesuya Polyabe nurd yuneŋ hime. Munan deŋbe ganuŋ mar?” yinyiŋ. ¹⁶ Irdeb al unŋura ketal urtiŋ gore po al 7 goyen yeŋala po yirde hikaka yirde gasa polon yirkeb dari sirsur iramiŋ. Irdeb uliŋhormiŋ yago erek yirde yugu teŋ yunkeb kupson busaharamiŋ. ¹⁷ Irkeb Efesus taunde niŋ Yuda marya al miŋ hoyan Grik marya beleŋ mere momon go nurdeb kafura wor po hamiŋ. Irdeb Doyan Al Kurun Yesu turun iramiŋ. ¹⁸ Irde Yesu niŋ dufaymiŋ tareŋ iramiŋ gega, mata bulunŋiŋ yubul ma titiŋ mar budam goyen goya gab al diliŋde matamiŋ kawan tagalde sopte gwaha ma teŋ hitek yamiŋ. ¹⁹ Irde Yesu niŋ dufaymiŋ tareŋ irtiŋ gega, mere bal asaŋde katiŋ miŋyan marbe asaŋmiŋ goyen yukuŋ kunga tiyamiŋ. Asaŋ kunga tiyamiŋ gote murunŋembe al 50,000 beleŋ nanŋahal unŋurenŋde meten teŋbe hora tenayiŋ goya tuŋande. ²⁰ Be, Doyan Al Kurun niŋ yitiŋ mere gobe gwaha mat saŋiŋ heŋ kurun heŋ tukuriŋ.

²¹ Be, mata gwahade forok yekeb Pol gobe Yerusalem mulgan hewen yeŋ beleŋnebe Masedoniaya Akaiaya nanayan kwen yeŋ dufay hiriŋ. Irdeb, “Yerusalem gor heŋ gabe fudinde wor po Rom manaŋ kwen,” yiriŋ. ²² Gwaha yeŋbe meten

marminj Timotiya Erastusya yad yerke yey wa mehen hej Masedonia nanjare kwaryum. Irkeb yeybe Esia nanjare gor ulyande yara hinhin.

Efesus taunde kanduk kurun forok yirin

²³ Be, Pol go Esia nana bana gon nin taun Efesus hikeyabe gor nin al kura belen Yesu gama ird ird mata goke igin ma nurde kanduk kurun forok iraminj. ²⁴ Gwaha tiyaminj mar al kurabe Demetrius. Yeybe silwa hora belen det yird yird al. Yey belenbe yende unjura birinj Atemisya yaminja gote tonej muknenj muknenj silwa belen yirke al damu tenj hanyen. Irkeb yeyya meten marminja gobe hora kurun wor po yade hanyen.

²⁵ Gega Pol belen wan Al Kurunyen mere kurun irkeb mel gote hora tenj tenj belen bulun hirinj goke binj ar yirin. Ningeb Demetrius gore meten marminja yey meten tenj hinhin gote kadom yago hoy yirke wakeb gaha yinyinj: “Mel, meten tenj hityen garebe hora kurun tulun tenj dunen hijen nurde hanj gogo. ²⁶ Gega Pol inenj hanyen al

gore Efesus taunde gar wan nende alya bereya saba hoyan po yirke yirkeb al budam nende mata yubul tiyan. Goyenbe Efesus taunde gar po monj. Esia nana bana gor nin al mananj tumnanj gwaha yirun goyen wor dindikenj nurdeb kenanj. Al goreb, ‘Det tonej kura al belen yirtinj gobe Al Kurun fudinde monj,’ yey hi. ²⁷ Ningeb meten nininj denem bulun irenj tiya. Goyenbe go po monj. Nende tikula kiryinj bere Atemis gote tonej goyen kerde doloj ird ird ya gobe alya bereya belen tarenj minjmonj yey nurnayinj. Irke denem kurun Esia nana banaya megenj kurun ga

nurd untiŋ ala teŋ haŋyen gobe tareŋ miŋmon yeŋ nurde unnayiŋ,” yinyiŋ.

²⁸ Be, gwaha yinke nurdeb biŋ kak hekeb, “Atemisbe Efesus taunde gar niŋ tikula bere wor po,” yeŋ kwipkwep tiyamiŋ. ²⁹ Irdeb mel gore taunde gor mata kandukŋeŋ yade forok yiramiŋ. Irdeb mel gore Polyen metenŋ kadom, Masedonia naŋare niŋ al irawa, Gaiusya Aristakusya yade gasa yirniŋ yirniŋ yirde yuluŋ teŋ gabu gasuŋ kuruŋde tumŋaŋ kup yeŋ yukamiŋ. ³⁰ Gwaha yirkeb Pol beŋ al buda kuruŋ gabu iramiŋ gote diliŋ mat huwarde mere yire yekeb Yesu niŋ dufaymiŋ saŋiŋ irtiŋ mar beŋ basaŋa irde utaŋ iramiŋ. ³¹ Irde Esia naŋare niŋ doyaŋ mar kurabe Polyen kadom niŋgeb, Pol niŋ yeŋ, “Inke gor ma forok yiyyeŋ,” yeŋ mere keramiŋ. ³² Be, gabu iramiŋ mar gobe kukuwa wor po hamiŋ. Kura marbe mere miŋ hoyanŋ niŋ hewhow teŋ hinhan. Munanŋ kurabe mere miŋ hoyanŋ niŋ weŋwoŋ teŋ hinhan. Al budam wor pobe miŋ goke gabu irhet yeŋ ma nuramiŋ.

³³ Be, goyarebe Yuda mar beŋ sios niŋ po mere fuguru tiniŋ yeŋbe al kura deŋem Aleksanda gare al gabu kuruŋ go diliŋ mat huwarde mere yiri yeŋbe, “Gwaha gwaha yawayiŋ,” inenŋ hulyanŋ iramiŋ. Irkeb al buda kuruŋ go diliŋ mat huwaryiŋ. Irdeb palŋa nirnanŋ yeŋ haniŋ tuŋanŋ yiryiŋ. Mere kandukŋeŋ forok yeŋ hi gobe neŋ Yuda mar beŋ ma teŋ hite yinenŋ tiyyiŋ. ³⁴ Gega gabu iramiŋ mar beŋ keneŋ al gobe Yuda mar al yeŋ bebak teŋbe, “Atemisbe neŋ Efesus marte tikula bere. Yeŋbe kuruŋ wor po!” yeŋ ulyande

wor po wenwon ten hinhan. Irkeb al gobe mere titek ma hirin.

³⁵ Gwaha ten hikeb taunde gor nin doyan al kura beley mel go, “Balmin hinar,” yinenbe gaha yinyin: “Efesus mar, denbe tikula bere Atemisyen ya kurun go doyan irde hanjen. Irde hora himam yende toney yara nanjinde mat po katyin goyen ya go bana kerde doyan irde hanjen gobe megen nin al kurun gayen tumnan nurde han. ³⁶ Ningeb al kura beley usi ma yenayin. Ningeb bekende hen dufay kenkela hen ga mata tinayin. ³⁷ Irem gabe nende tikula bere sukal ma irarun. Irde det toney yirde dolon yirde hityen gote yayan samun kura ma kawe tiyarun. Gega dulin wor po gago yulun ten yawayhan. Mata gabe igin mon. ³⁸ Mere gahade nurd nurd nalum yan geb, Demitriusya kadom wenyu beley al kura merere yirnin yen nurdeb igin yukunbe mere sope irtek mar dilinde gab tagalke nurnayin. ³⁹ Gega mel gore dufay kernayin goyen igin ma nurnayinbe taunde gor nin mere sope ird ird marte karkuwanmin momon yirke gabu kurun irde gab kanduk go sopte sope irnayin. ⁴⁰ Ningeb hanka gabu irde hekhok kurun tahan gabe min minmon wor po tahan. Ningeb Roma gabman beley denenbe merere dukun gusunan dirkeb daha mat wol hetek? Roma gabman beley den mata tahan gake igin ma po nuryen” yen saba yiryin. ⁴¹ Gwaha yinenbe yakira tike bur yen kwamin.

Polbe Masedoniaya Grikya nanjare kuriņ

¹ Be, mata kurunj go hubu hekeb Pol belej gor niņ mar Yesu niņ dufaymiņ tareņ irtiņ goyen hoy yirke gabu iramiņ. Irkeb saba yirde dufaymiņ tareņ irde yubul teņ Masedonia nanjare kuriņ. ² Goyaņ kuņ henjabe Yesu niņ dufaymiņ saņiņ irtiņ mar tareņ heņ heņ ge faraņ yure yeņ saba yirde yirdeb yubul teņ kuņ kuņ Grik nanjare forok yiriņ. ³ Gorbe gagasi karwo hinhin. Irdeb hakwa teņ Siria nanjare kwe yiriņ. Gega Yuda mar belej maytek yamiņ goyen nurdeb mulgaņ heņ Masedonia nanjayaņ mat gab kuņ Siria forok yeweņ yeņ kuriņ. ⁴ Irkeb Beria taunde niņ al Sopater yeņbe Pirus urmiņa, Tesalonaika niņ al irawa Aristakusya Sekundusyabe Derbi taunde niņ al Gaiusya belej Polya kwamiņ. Irde Timotiya Esia nanjare niņ al irawa Tikikusya Trofimusya manañ mel goya tumņaņ kwamiņ. ⁵ Be, mel go wa meheņ heņ kuņ Troas taunde Polya nenya doyaņ dirde hinhan. ⁶ Munañ neņbe, “Yuda Marte Beret Yis Miņmoņ Nen Nen Nalu Kurunj” ineņ hanjen go hubu heke gab Filipai taun go tubul teņ makaņde kurkuņ hakwa teņbe wawuņ siptesoņoņ kamereb Troas forok yitiriņ. Irdeb mel go yupi teņ gorbe wawuņ 7 hinhet.

Polbe Troas kuriņ

⁷ Be, gor hiteke kuņ Sande hekeb neņ tumņaņ Yesu kamyiņ goke dufay heņ heņ ge beret ninin yeņ gabu irtiriņ. Gwaha teņ gise yubul teņ kweņ go yeņbe Al Kurunjen mere saba yirke kuņ kuņ wawuņ binde hiriņ. ⁸ Gabu irde hinhet ya gobe al heņ heņ gasuņ karwo hende bande niņgeb,

nenbe gasun funan hende wor pore gor hinhet. Gorbe hulsi budam yusun yurtin melak hej hinhan. ⁹ Be, Pol mere ten hikeyabe al fonen kura denembe Yutikusbe mene yamere keperde mere palna irde hinhin. Mere nurde arkup ten kun kun bin sir yekeb megen takten mayyin. Irkeb al kura belen aran po kurkunbe kamtin kenamin. ¹⁰ Irkeb Pol wor kurkun kamtin hakwam megen hinhin goyen besa irdeb, “Kafura ma yo. Kama mon geb,” yinyin. ¹¹ Gwaha ten sopte mulgan hej hurkunbe Yesu kamyin goke dufay hej hej nin beret gale hej namin. Go kamereb meremin basan hej saba yirke kun kun fay urkeb yubul ten kurin. ¹² Be, Pol go gwaha tikeb al fonen takten mayke kamyin gega, sopte huwaryin al goyen yaminde tukamin. Irde, “Kama al go gago huwara,” yen bin yurum wor po hamin.

Polbe Troas taunde mat Miletus taunde kurin

¹³ Be, Polbe, “Troas taunde mat kahande kun Asos taunde forok yewen. Irde gor mat gab hakwa hende kwen,” dinkeb nen wa hakwa hende Asos taunde kutirin. Irkeb Polbe yirin gwahade po Asos taunde kurin. ¹⁴ Be, Pol wan Asos taunde dupi tenbe tumnan hakwa hende kun Mitilini motmotde forok yitirin. ¹⁵ Be, fay urkeb gor mat hakwa goyenter po kun Kios motmotde forok yitirin. Irdeb firtirin fay urkeb Kios mat Samos motmotde kutirin. Be, sopte fay urkeb gor mat Miletus taunde kun forok yitirin. ¹⁶ Be, gwahade ten kun hinhetya goyenbe Polbe, “Esia nanare mosoynen po tenbe epte ma Yerusalem

kuŋ Pentekos nalu keneŋ,” yeŋ nurdeb, “Esia naŋa bana goŋ niŋ taun Efesus ma kutek,” yiriŋ.

Polbe Efesus taunde niŋ siosyen doyaŋ mar yinyiŋ

¹⁷ Irdeb Miletus taunde mat po Efesus taunde niŋ sios doyaŋ mar niŋ keya heke kinniŋ yeŋ katamiŋ. ¹⁸ Katenŋ kenkeb Pol beleŋ gaha yinyiŋ: “Esia naŋare haŋkapywa waŋ denya dahade hinhem gobe keŋkela neneŋ hinhan. ¹⁹ Yuda mar beleŋ mere mayde buluŋ nirke kanduk kuruŋ wor po keneŋbe delne fimiŋ katenŋ hinhin. Gega Doyaŋ Al Kuruŋ niŋ metenbe teŋ hinhem po. Gwaha teŋ hinhemyabe deŋne kuruŋ ird ird niŋ ma nurde hinhem. ²⁰ Saba kura igiŋ tareŋ diriyeŋ yeŋ nurdeb kuŋ saba dird dird niŋ bada ma heŋ gabu karkuwaŋyaŋ saba dirde hinhem. Irde kurabe yatiŋyaŋ yatiŋyaŋ kuŋ saba dirde hinhem gobe nurde haŋ gogo. ²¹ Nebe kawan po Yuda marya al miŋ hoyoŋ Grik marya tumŋaŋ Al Kuruŋyen mere saba yirde, ‘Mata buluŋtiŋ yubul teŋ Al Kuruŋ niŋ bitiŋ mulgaŋ hekeb Doyaŋ Al Kuruŋniniŋ Yesu niŋ po dufaytiŋ saŋiŋ irnayiŋ,’ yineŋ hinhem.

²² “Be, ga hime gabe Holi Spirit beleŋ Yerusalem kwa nineŋ hi yeŋ nurde hime geb, gwaha tiyeŋ. Gega gor da mata ulner forok yiyyeŋ gobe go ma nurde hime. ²³ Gega taunyaŋ kuŋ himekeyabe Holi Spirit beleŋ, ‘Gebe Yerusalem kukeb fere gird koyare gernayiŋ. Irke kanduk buluŋ wor po kenayiŋ,’ nineŋ hinhin go po ga nurde hime. ²⁴ Goyenpoga goke kafura ma heweŋ. ‘Al Kuruŋ beleŋ alya bereya niŋ buniŋeŋ nurde yumulgaŋ

teñ teñ belen kiryinj mere iginj goyen momon yirde hayinj,' yeñ Doyanj Al Kurun Yesu belen meten nunyinj goyen bada ma hewen. Meten gobe pasi po irenj. Gwaha teñ himekeya mununke kamenj goyenbe goke ma nurde hime.

²⁵ “Be, Al Kurun belen alya bereya doyanj yird yird mata ninj kunj wanj teñ saba dirde hinhem mar kurabe denj gago goyen kamebe sopte ma nennayinj yeñ nurde hime. ²⁶⁻²⁷ Niñgeb funanj momon direnj tihim. Be, nebe bada ma heñ Al Kurunyen dufay goyen tumnanj momonj dirde himeke nurde pasi hanj. Niñgeb al kura saba nurd nurd ga Al Kurunyen mere ma gama irde kanduk kennayinj gobe yende samunj. Nere kanduk monj yeñ gago hayhay dirde hime. ²⁸ Niñgeb kenkela heñ hinanj ko. Denbe Holi Spirit belen Yesu gama irde hanj mar gote doyanj mar diryinj geb, mel go kenkela doyanj yirde hinayinj. Yesuyen alya bereya sios goke teñ Al Kurun belen Urminj megen teñ kerke katenj kamyinj geb, sios gobe Al Kurunyen wor po. Niñgeb sipsip doyanj mar belen sipsipminj kenkela doyanj yirde hanj gwahade goyen po denj wor sios goyen kenkela wor po doyanj yirde hinayinj. ²⁹ Dubul direnj tihim harhoknerbe kulu duwi belen sipsip yisenj hanyen gwahade goyen po al kura wanjbe dufaytinj bulunj yirnayinj yeñ nurde hime. ³⁰ Irde denj bana gare mananj al kura huwardeb, ‘Yesu ninj dufayminj tareñ irtinj mar goyen dufayminj bulunj yirteke gama dirnanj,’ yeñ Al Kurunyen mere fudinde goyen hoyanj mat saba yirnayinj. ³¹ Niñgeb kenkela wor po heñ hinanj ko. Dama

karwo denya hinhembe huginē nan kahalya wawunya dun kuren dun kuren hayhay dirde esen mere dirde hinhem goyen goke bitin sir ma yiyyen.

³² “Be, Al Kurun belen doyan dirde hiyen goke gago Al Kurun gusunan irde hime. Irde Al Kurun belen buninen nurde dunenbe faran durde hi goke yitin mere goyen bitinde po hiyen yen gusunan irde hime. Mere go bitinde hen kurun hekeb taren hinayin. Irde Al Kurun belen dirnen wen det igin yunen yirin goyen wor tenayin.

³³ Nebe almet horaya ulin umnaya yenen bene huwartin mon. Hubu wor po. ³⁴ Irde kadne yagoya Al Kurunen meten ten hen yabe det kuran nurdeb nigen meten ten hora tenbe detninin damu ten himyen goyen kenkela nurde han gogo.

³⁵ Doyan Al Kurun Yesu belen, ‘Al Kurun dilinde al det yunen yunen mata gobe det yad yad mata gote folekken wor po yen nurde hi,’ yirin goyen bene sir ma yen hiyen. Ningenb mata kurun ten hinhem gobe meten sanin gahade ga ten gab al det minmon mar goyen faran yurde hinayin yen dikala dirde hinhem,” yinyin.

³⁶ Be, Pol go gwaha yinenbe gor gabu iramin marya tumnan dokolhon yugulun tenbe Al Kurun mere iramin. ³⁷ Irdeb mel gore Pol kun kun nin buninen nurde besa irde esen uramin. ³⁸ Mel gobe Pol belen, “Kame sopte ma nennayin,” yirin goke buninen wor po nuramin. Irdeb tumnan po tukun hakware tubul tiyamin.

Polbe Yerusalem kurin

¹ Be, go kamereb Polya nenya tumnan mel go yubul ten hakwa hende kun kun motmot kura denembe Kos gor po forok yen firtirin. Irde fay urkeb Rodes motmotde kutirin. Gor matbe Misia nanare nin taun kura makan sinare hinhin Patara gor kutirin. ² Gorbe hakwa hoyan kura Fonisia nanare kwen ten hike kenenbe go hende kutirin.

³ Hakwa hende kun henyaabe Saiprus motmot ten megen kurun belen pel irde alare mat po Siria nanare kutirin. Kun kunbe Tair taunde forok yitirin. Gorbe taunde gor nin samun yago hakware nin meten mar belen yad sina yiramin. Irkeb nenbe megen kattirin. ⁴ Kat sinare kunbe Yesu nin dufaymin taren irtin mar kura gor yitirin. Irdeb yena gor wawun 7 hinhet. Gor hitekeyabe Holi Spirit belen Polbe kame Yerusalem kun kanduk kinyen goyen mel go bebak yirkeb basina irman hamin. ⁵ Gega Yerusalem kutek naluninin forok yekeb kunin yen gitik titeke Yesu nin dufaymin taren irtin hinhan mar goyen tumnan beremya dirnen wena wor taun go tubul ten nenya kun makan sinare forok yitirin. Irdeb megen dokolhonnin yugulun ten tumnan Al Kurun mere irtirin. ⁶ Go kamereb kadam hayhay girde tenbe yubul ten hakwa hende kuteke denenbe mel gobe mulgan hamin.

⁷ Be, Tair taun go tubul ten kun kunbe Tolemes taunde forok yitirin. Gorbe hakwa tubul ten sinare kurkun Yesu nin dufaymin sanin irtin mar yenenbe yena wawun unjukan po firtirin. ⁸ Irde

fay urkeb taun go tubul ten kuŋ Sisaria taunde forok yitirin. Gorbe Filipyen yare kutirin. Filipbe Al Kurunyen mere goyen alya bereya saba yirde hiyen. Yenbe hakot aposel buda belen meten faran mar nin yekeb yenya al hoyan 6 goya yawaramin al go goyen. ⁹ Yenbe wirin sipte karkuwan hitin gega, fonen po hinhan. Bere sipte gobe Al Kurunyen mere basan hen tagalde hanen.

¹⁰ Be, gorbe wawun budam yara po hitekeyab Al Kurunyen mere basan al kura denem Agabus go Yudia nanare mat katyin. ¹¹ Katen nen hinhetde gor forok yenbe Polyen kan mal temde tendere nin goyen tenbe yingen de haninya kahanya fere tiyyin. Irdeb, “Nigen hanneya kahanneya fere tihim gahade gayen po Yuda mar Yerusalem taunde han gore kan gate min albe haninya kahanya fere ten al min hoyan Yuda mar mon gote haninde kernayin yen Holi Spirit belen nina,” yirin. ¹² Gwaha yeke nurdeb nenya Yesu nin dufaymin taren irtin mar gor nin goya belen Pol goyen Yerusalem ma kwayin inen utan irtirin. ¹³ Gega Pol belen, “Danin esen buninen buninen ten dufayne bulun irde han? Nebe nad fere nirnayin goke ma nurde hime. Doyan Al Kurun Yesu nin wor igin kamen yen nurde hime geb,” dinyin. ¹⁴ Goyenpoga mereninin ma nurtek hekeb, “Al Kurun belen dufay kirtin gobe gwahade po forok yiyyen,” yenbe bada hitirin. ¹⁵ Gwaha tenbe detninin yade Yerusalem hurkunin yen taun go tubul titirin. ¹⁶ Irkeb Yesu nin dufaymin taren irtin mar Sisaria taunde hinhan

gore dukun Yerusalem forok yenbe gar hinayin yen Nasonyen yare dubul tiyamin. Yenbe Saiprus motmotde nin al. Al gobe hakot po Yesu nin dufaymin sanin irtin hinhin.

Polbe Yems kinyin

¹⁷ Be, Yerusalem nin Yesu nin dufaymin taren irtin mar belen denenbe aman hamin. Irkeb gor firtirin. ¹⁸ Irdeb fay urkeb Yems kinnin yen nenya Polya tumnan yen hitte kutirin. Kunbe yenya gor nin doyan mar manan tumnan yintirin. ¹⁹ Pol belen Yemsa doyan marya go yenenbe kadam pere gird tenbe meten ten hinhin goyen minde mat tagalde tukun tukun pasi iryin. Irde Al Kurun belen taren irke al min hoyan Yuda mar mon hitte kun meten dahade ten kun hinhin goyen manan momon yiryin. ²⁰ Irkeb gor hen mere nuramin mar belen Al Kurun turun iramin. Irdeb Pol gaha inamin: “Gebe Yuda mar budam wor po dufaymin Yesu nin sanin iran gobe nurde ha. Goyenpoga go mar gobe tumnan nen Yuda marte tikula manan taren po tanarde gama irde han goyen wor nurde ha gogo. ²¹ Be, mel gobe ge belen Yuda mar mon al min hoyande nin nanare kun henya saba ten hinhan goyen nurde han. Ge belen gon nin Yuda mar saba yirdeb, ‘Nende tikula Mose belen kayyin goyen ma gama irnayin. Irde dirintin yagobe guba ma yen yunnayin,’ yinen hinhan goyen nurde han. ²² Irdeb ge gar wayan gayen hen ga mon nurnin tahan. Ningeb kanduk kurun kura kinnin tihit geb, daha titek? ²³ Ningeb mere girnin tihit gayen po gama ira ko. Mongo kanduk kinnin geb. Be, nende al

sipte kura Yuda marte matare biña tiyañ ga hañ. ²⁴ Niñgeb al sipte goya Al Kurunyen ya balem bana kunayin. Irdeb Yuda marte matare wukken heñ heñ mata doyañ mar hitte kuñ mata tinayin goke hora yunayin. Irkeb go mar gore biña tiyañ al sipte gote tonañ kara tinayin. Gwaha tike gab al tumñañ geneñbe, ‘Mere yeñ ulinde nurde hityen kurun gobe usi. Yeñbe fudinde nende tikula gama irde hi,’ yeñ bebak tinayin. ²⁵ Be, neñ belej al miñ hoyañ Yuda mar moñ gega, Yesu niñ dufaymin taren irtin mar goke bikken asañ kañ yunenbe, ‘Uñgura biñge teñ yuntin ma nene hinayin, dapña darim ma nene hinayin, dapña kura biñinde kañ giti irke kamtin ma haniñde yaka tike kamtin gobe ma nene hinayin, irde leplep mata ma teñ hinayin,’ yineñ mata goyen goke po bisam yirtirin gobe nurde ha gogo,” inamin.

²⁶ Be, inamin go ferde fay urkeb Pol belej al sipte goya tumñañde Yuda marte matare wukken heñ heñ mata go tiyamin. Irdeb go kamereb Al Kurunyen ya balem bana hurkuñbe, “Biña tiyañ goyen pasi irde nende matare wukken heñ heñ mata goyen nalu gwahader ga hubu hiyyen geb, dapña yawañ dunmeke al sipte gake teñ kumga tinayin,” yeñ bebak yiriyin.

Pol fere tiyamin

²⁷ Be, wukken heñ heñ mata teñ hinhan goyen kuñ murun belej heñ nalu 7 hewen tikeb Yuda mar kura Esia nanare mat Yerusalem wayamin gore Pol go Al Kurunyen ya balem ban hike kenamin. Irde Pol go busaharyenkek yeñ tanamin. ²⁸ Irdeb, “Israel mar, farañ durnañ!

Al gare neŋ Israel marya nende tikulaya Al Kurunyen ya balemya gayen gake al tumŋaŋ bulun mat saba yirde hiyen. Irde al miŋ hoyan Grik mar goyen ya balem biŋde yawayun. Irdeb al mali ma hurkutek ya balem goyen bulun irun, ” yinen gor hinhan mar goyen biŋ yakamke biŋ ar yamiŋ. ²⁹ (Be, mel gore Grik mar niŋ yamiŋ gobe Efesus taunde niŋ al Trofimusya Polya belej Yerusalem gor hike yenamiŋ. Niŋgeb dufaymindebe Al Kurunyen ya balem bana al miŋ hoyan goŋ hurkutek moŋ yeŋ bisam irtiŋ hiyen goyen Pol belej al goyen teŋ bana goŋ hurkun daw yeŋ nuramiŋ.)

³⁰ Be, mere go nurdeb goyare po Yerusalem niŋ mar tumŋaŋ biŋ ar yamiŋ. Irkeb kurhan mat mat Al Kurunyen ya balemde gor kup yeŋ wayamiŋ. Irdeb ya bana mat Pol go tulun teŋ siŋare tukukeb goyare po ya gote yamem kurun go tayamiŋ. ³¹ Be, al buda gore mayniŋ teŋ hikeb Roma gabmande fulenŋa marte doyan al kurun go, “Yerusalem bana kanduk kurun forok yihi,” mere momoŋ go nuryiŋ. ³² Nurdeb goyare goyen po fulenŋa marmiŋ kuraya gote doyan marmiŋya yadeb al buda gabu irde hinhande gor kup yeŋ kurkamiŋ. Irkeb al gabu irde Pol mayde hinhan kurun goyen mel go yenenbe tubul po tiyamiŋ. ³³ Irkeb fulenŋa marte doyan al kurun belej fulenŋa marmiŋ hulyan yirke Pol teŋ sen irawa belej po fere tiyamiŋ. Gwaha irdeb al buda kurun hitte fulanŋ kanbe, “Al gabe ganun? Irde daha tiya?” yinen gusunŋaŋ yiryiŋ. ³⁴ Irkeb gabu iramiŋ mar kura belej kwep kwep teŋbe, “Polbe mata gwahade gwahade tiya,” yamiŋ. Irkeb kura

belenbe mere hoyan yen kwep kwep tiyamin. Be, gwaha ten mere tuktawan irkeb doyan al go mere tiyamin goyen bebakken ma nuryin. Irdeb fulenja marmin yinke Pol ten fulenja marte yare kwamin. ³⁵ Kun ya binde hen hurkuni ten hikeb al buda Pol maynin yen gama irde hinhan mar gore bin ar yeke Pol ugun po kertek hamin. Irkeb fulenja mar belen tatum urde ten hurkamin. ³⁶ Irkeb gama irde hinhan mar gore, “Mayke kami! Mayke kami!” yen kwep kwep ten hinhan.

³⁷ Be, ten ya binde hurkuni tikeyabe Pol belen fulenja marte doyan al kurun goyen, “Igin mere kura giren?” inen gusunjan iryin. Irkeb, “Ey, ge gayen Grik mere nurde ha?” inyin. ³⁸ Irdeb sopte po, “Hakot kura Isip nin al Roma gabman asogo ire yen al 4,000 yade sawsawa po kurun nanare yukuri goyenbe ge ma ganun?” inen gusunjan iryin. ³⁹ Irkeb, “Mon, nebe Yuda mar al, Silisia nanare nin taun kurun Tarsus, Roma gabman belen doyan irde hire gor nin al. Ningeb igin nubil tike al ga mere yiren?” inyin.

⁴⁰ Be, fulenja marte doyan almin kurun gore igin inkeb Pol gobe yare hurkun hurkunde gor huwarde, “Balmin hinayin,” yinenbe hanin tunan yiryin. Irkeb balmin hikeyabe Yuda mar gote mere mat mere yiryin.

22

¹ “Kadne yago, merem yan nirhan gayen pet ten nigen ge tagalen tihim ga nurnan ko,” yinyin. ² Go yirin gobe Yuda marte mere mat tike nurdeb liwlaw tiyamin kurun go bada hen balmin palna iramin. Irkeb Pol belen, ³ “Nebe Yuda mar al,

Silisia nanjare niŋ taunde Tarsus kawan himiriŋ. Gega waŋ Yerusalem gar heŋ kurun himiriŋ. Irkeb Gamaliel belej nende tikula Mose belej asininiŋ yago asaŋde kaŋ yunyiŋ goyen goke keŋkela wor po saba niryiŋ. Irkeb deŋ belej gayenter Al Kurun niŋ po nurde mata teŋ haŋ gahade gayen po ne wor gwaha teŋ saba upsineŋ gama irde hinhem. ⁴ Irdeb Yesu belej alya bereya gaha teŋ hinayiŋ yeŋ tikula kiryiŋ goyen gama irde hinhan mar goke biŋ arneŋ nurde yunenbe yade fere teŋ koyare yerdeb kurabe gasa yirmeke kamde hinhan. ⁵ Go teŋ hinhem gobe Al Kurun dolon ird ird mata doyaŋ mar pris buda gote kurunmiŋya Yuda marte doyaŋ marya wor neneŋ hinhan geb, igiŋ momoŋ dirnayiŋ. Nebe mel go hitte kuŋ Damaskus taunde niŋ meten kadom belej faraŋ nurnayiŋ yeŋbe yinmeke asaŋ kaŋ nunamiŋ. Irkeb asaŋ go teŋbe Yesu niŋ dufay saŋiŋ irtiŋ mar goyen fere yirde Yerusalem gar yawaŋ bulun bulun yirniŋ yeŋ Damaskus taunde kumiriŋ.

⁶ “Be, kuŋ kuŋ naŋa baŋkahal hekeb Damaskus taun binde himekeyabe bemel po hulsi tareŋ kura naŋa folekkeŋ kurun gore naŋkinde mat ne hitte po timiyyiŋ. ⁷ Irde gore nirkeb megen nakten mununyiŋ. Irke al melak kura goreb, ‘Sol, Sol, daniŋ mununen bulun bulun nirde ha?’ ninyiŋ. ⁸ “Irkeb Doyaŋ Al Kurun goyen, ‘Gebe ganuŋ?’ inmekeb, ‘Nebe Nasaret niŋ al Yesu, mununen bulun bulun nirde ha al goyen,’ ninyiŋ. ⁹ Be, al neya tumŋaŋ kuŋ hinhet mar gobe hulsi go po ga kenamiŋ. Gega mere gobe al gore mere

tenj hi yenj ma bebak tiyaminj. ¹⁰ Gwaha ninkeb, ‘Doyanj Al Kurunj, daha tiyenj tihim?’ inmekeb, ‘Huwara. Irde Damaskus taunde kwa. Gor gab gwaha gwaha tiyayinj yenj basiņa girmirinj goyen nurayinj,’ ninyinj. ¹¹ Be, hulsi kurunj gore nirke delne kidoma wor po hirinj geb, al kunj hinhet mar gore po nanarde nad Damaskus taunde kwaminj.

¹² “Be, gorbe al kura denjem Ananaias hinhin. Yenbe Yuda marte tikula kenkela gama irde hiyen. Irkeb Yuda mar taun goyenter hinhan goreb palap wor po irde hanyen. ¹³ Be, Ananaias gore ne hitte wanj huwardeb, ‘Kadne, sopte delge wuk yeke nankena,’ yirinj. ¹⁴ Irkeb goyare po delne wuk yeke det yinmirinj. Irkeb yenj belenj gaha ninyinj: ‘Al Kurunj asinininj yago belenj hakot dolonj irde hinhan Al goyen ge belenj gab du-fayminj kenenj bebak tenjbe Al Huwak Yesu goyen delger forok yenj mere girkeb nurayinj yenj bikkenj basiņa giryinj. ¹⁵ Ninjgeb gebe mata kenenj mere nuranj goyen goke kunjbe al nana kurunj ga hike kwa goyen momonj irde tukayinj. ¹⁶ Ninjgeb da doyanj irde ha? Huwarde kunjbe baptais tekeb Al Kurunj belenj mata bulunje halde gunyenj. Irkeb yenj dolonj irayinj,’ ninyinj.

¹⁷ “Be, kamebe mulganj henj Yerusalem wamirinj. Gorbe kunj Al Kurunyen ya balem bana henj mere irde henyabe yuwarwarte Doyanj Al Kurunj kinmirinj. ¹⁸ Irkeb Doyanj Al Kurunj belenj, ‘Taunde gar ninj marbe ge belenj ne ninj tagalde ha gayen fudinde yenj ma nurde asogo girnayinj geb, aranj po Yerusalem ga tubul tenj hoyande kwa,’ ninyinj. ¹⁹⁻²⁰ Gega ne belenj huwardebe, ‘Doyanj Al

Kuruṅ, mel gobe epte ma asogo nirnayiṅ. Nebe meteṅ alge Stiwen hora po mayanṅ goyarebe gor hinhem. Irde al beleṅ Stiwen mayniṅ teṅ hikeb igiṅ nurde go mar gote uliṅhor yago doyanṅ yirde hinhem. Irde meteṅ alge Stiwen goyen hora po uguṅ kerke kamuṅ goyen kinmiṅ. Irdeb Yuda marte gabu yayanṅ kuṅ alya bereya ge niṅ dufaymiṅ tareṅ irtiṅ marbe yawanṅ yusulak teṅ koyare yerde hinhem. Niṅgeb Yerusalem niṅ mar gabe keṅkela nurde nuneṅ haṅ,' inmiriṅ. ²¹ Gega Doyanṅ Al Kuruṅ beleṅ wol heṅbe, 'Ne beleṅ po gad germeke naṅa gisaw al miṅ hoyanṅ Yuda mar moṅde naṅare kwayiṅ. Niṅgeb huwarde kwa!' ninyiṅ," yinyiṅ.

²² Be, al buda go meremiṅ palṅa iramiṅ kuṅ al miṅ hoyanṅ Yuda mar moṅ niṅ tagalke nurdeb biṅ ar yamiṅ. Irkeb, "Al gabe megen gar hitek moṅ niṅ, mayke kami!" yeṅ kwep kwep tiyamiṅ. ²³ Irdeb al buda goreb Pol beleṅ Al Kuruṅ sukal ira yeṅ biṅ ar wor po yekeb kwep kwep teṅ uliṅhor yago yuguya teṅ mulowo yade naṅa kota yemeyde tiyamiṅ. ²⁴ Irkeb fulenṅa marte doyanṅ al kuruṅ beleṅ fulenṅa marmiṅ go yinke Pol go teṅ fulenṅa marte yare tukamiṅ. Irkeb fulenṅa marte doyanṅ al kuruṅ gore, "Kuṅ usulak tike daniṅ merem yanṅ irde kwep kwep irde haṅ goyen momoṅ diryeṅ," yineṅ hulyanṅ yiryiṅ. ²⁵ Irkeb fulenṅa mar beleṅ kuṅ Pol goyen usulak tiniṅ yeṅ haninya kahanya yad giṅ yirdeb hete giti iramiṅ. Irkeb Pol beleṅ fulenṅa mar gote doyanṅ al kura gor hinhin goyen, "Roma mar al ne gahade gayen mere miṅ ma nurdeya mali yusulak tinayiṅ yeṅ

Roma gabman beley igin yitiñ we?” inyiñ. ²⁶ Irkeb fulenja marte doyanj al gob kurunminj hitte kunbe “Al gabe Roma al geb, daha ireñ taha?” inyiñ. ²⁷ Irkeb fulenja marte doyanj al kurunj gore Pol hitte kunbe, “Momonj nira. Ge gayen fudinde Roma al?” inyiñ. Irkeb, “Fudinde,” yiriñ. ²⁸ Irkeb al gore, “Nebe Roma al hewe yenbe hora kurunj tubul tenj gab Roma al himiriñ,” inyiñ. Irkeb Pol beley, “Gebe gwaha tiyariñ gega, Adonebe Roma al geb, ne wor Roma al,” inyiñ.

²⁹ Be, Pol go gwaha yeke nurdeb fulenja mar usulak tenj gusunanj irniñ yenj doyanj hamiñ gobe warga henj okohom po bada hamiñ. Irkeb Pol go Roma al gega, malikan minj minmonj fulenja marminj yinke sende fere tiyamiñ goke kafura hiriñ.

Polbe merere huwaryiñ

³⁰ Irdeb nalu go wawunj henj sopte fay urkeb fulenja marminj yinke Pol go sen yugu tenj unamiñ. Irde, “Da misiñde wor po Yuda mar beley Pol mere uliñde iranj goyen upsineñ bebak tiye,” yenbe pris buda gote karkuwanminja Yuda marte doyanj mar tumnanj wake gabu irke gab gusunanj yire yenj mere kiryiñ. Irkeb tumnanj gabu irke fulenja marte doyanj al kurunj beley Pol tawake al buda kurunj gote diliñde huwaryiñ.

23

Pol beley Yuda marte doyanj mar buda hitte Yesu niñ tagalyiñ

¹ Be, Pol go huwarde Yuda marte doyanj mar gabu iramiñ go yenenbe, “Kadne yago, nebe Al

Kuruᅇ niᅇ meteᅇ po teᅇ heᅇyabe bener wukken wor po nurdeya meteᅇ timeke waᅇ waᅇ gago hihi. Al Kuruᅇ diliᅇde mata buluᅇ kura ma teᅇ himyen,” yinyiᅇ. ² Gwaha yekeb pris buda gote kuruᅇmiᅇ Ananias beleᅇ kadom yago Pol bindere hinhan go hulyaᅇ yirde, “Mohoᅇde go maynaᅇ,” yinyiᅇ. ³ Irkeb Pol beleᅇ meremiᅇ go nurdeb, “Gebe nende tikula ufurd uneᅇbe gor keperde, ‘Gebe buluᅇ gwaha gwaha tiyaᅇ,’ ninha. Goyenbe gigeᅇbe tikula goyen pel irdeb merene keᅇkela ma nurde mali ga maynaᅇ yinha? Gebe siᅇare mat geneᅇmiᅇbe igiᅇ wor po gega, bege banabe tikiᅇ baraᅇ wor po ha. Niᅇgeb goke teᅇbe Al Kuruᅇ beleᅇbe mugunyaᅇ geb,” inyiᅇ. ⁴ Irkeb al Pol bindere hinhan goreb, “Yeᅇbe Al Kuruᅇyen meteᅇ al wor po. Pris buda gote kuruᅇmiᅇ goyen go ma nurde nanyaᅇ irha?” ineᅇ kwep kwep iramiᅇ. ⁵ Irkeb Pol beleᅇ wol heᅇbe, “Kadne yago, nende tikularebe, ‘Doyaᅇ altiᅇ kura mere buluᅇ ma irde hinayiᅇ,’ yitiᅇ gobe nurde hime. Niᅇgeb yeᅇbe al gwahade yeᅇ ma nurde nanyaᅇ irhem,” yinyiᅇ.

⁶⁻⁸ Goyare goyenbe Yuda marte doyaᅇ mar gabu iramiᅇ gobe Farisi marya Sadusi marya goyen Pol beleᅇ yeneᅇ bebak tiyyiᅇ. Be, Farisi marbe al kamdebe sopte huwarnayiᅇ, irde Al Kuruᅇyen miyoᅇbe haᅇ, al toneᅇ manaᅇ haᅇ yeᅇ nurde haᅇyen. Munāᅇ Sadusi mar gobe gwahade ma nurde haᅇyen. Niᅇgeb Pol go mel goyen yeneᅇbe, “Kadne yago, adonebe Farisi al geb, ne manaᅇ gwahade po. Niᅇgeb nebe Al Kuruᅇ beleᅇ al kamkeb kame sopte yisaᅇ hiyyeᅇ gobe fudinde

yeŋ nurdeb goke po doyaŋ heŋ hime goyen goke tagalde himyen. Gega goke igiŋ ma nurde gago merere nerhaŋ,” yeŋ mere saŋiŋ po yiryiŋ. Sadusi marya Farisi marya gobe kadom igiŋ ma nurd guneŋ teŋ hanyen geb, Pol mere tiyyiŋ go nurdeb yiŋgeŋ uliŋ kadom mohonđe tiyamiŋ. Irde dufaymiŋ uŋkureŋ kertek ma hamiŋ. ⁹ Irdeb hekhok teŋ kwipkwep teŋ epte ma tiyamiŋ. Gwaha teŋbe Farisi mar kura Yuda marte tikula saba yird yird mar gore huwardeb, “Al gabe mata buluŋmiŋ kura ma kenhet. Moŋgo Al Kuruŋyen miyoŋ beleŋ yar kura ma det toneŋ beleŋ yar kura inyiŋ kenem daha tinayiŋ?” yamiŋ.

¹⁰ Irde al buda kwipkwep teŋ hinhan go kuŋ buluŋ wor po heŋ artek heke nurdeb, “Moŋgo gwaha teŋ Pol mayke kamyen,” yeŋ fulenə marte doyaŋ al kuruŋ gore fulenə marmiŋ hulyaŋ yirde, “Kurkuŋ Pol tawanaŋ. Munaŋ epte moŋ kenem kwep kwep yirde gasa yirhet yirhet yirde gab teŋ wanayiŋ,” yinyiŋ. Irkeb kuŋ gwahade po teŋbe Pol gob fulenə marte yare teŋ kwamiŋ.

¹¹ Be, gwaha tiyamiŋ go wawuŋ goyenbe Doyaŋ Al Kuruŋ beleŋ Pol diliŋde forok yeŋbe, “Kafura ma yo. Tareŋ po heŋ hayiŋ. Yerusalem gar al ne niŋ momoŋ yirde saba yirde hayen gwahade goyen po Rom taunde manaŋ kuŋ gwahade po teŋ hayiŋ geb,” inyiŋ.

Yuda mar beleŋ Pol mayniŋ yeŋ sege iramiŋ

¹²⁻¹³ Be, fay urkeb go wampot goyenbe Yuda mar kura 40 gwahade goyen gabu irdeb daha mat kura Pol mayteke kamyen yeŋ mere sege iramiŋ. Irdeb, “Fudinde wor po, Polbe mayteke

kamkeya gab bingeya feya netek,” yenbe bina tiyaminj. ¹⁴ Gwaha tenbe Yuda marte doyanj mar parguwakya pris buda gote karkuwanminya hitte kunbe, “Nenbe, ‘Feya bingeya kutnare henbe Pol mayteke kamke wor wor gab ig ulinj titek,’ yihit. ¹⁵ Ningeb denya Yuda marte doyanj maryabe fulenja marte doyanj al kurun hitte kunbe usi irdeb, ‘Pol go sopte tubul tenj dunke mataminj ge kenkela gusunanj irninj,’ innayinj. Irkeb tubul tenj dunkeb tenj wanayinj. Irkeb nenbe belen doyanj henj hitek geb, gonj po mayteke kamyenj,” yinaminj.

¹⁶ Gega Pol yayinj belen mere momonj go nurdeb fulenja marte yare kunj Pol momonj iryinj. ¹⁷ Irkeb Pol gobe fulenja mar 100 gote doyanj al kura hoy irdeb, “Al gabe doyanj altinj hitte kunj mere kura momonj irenj tenj hi geb, yenj hitte tenj kwa,” inyinj.

¹⁸ Irkeb al goreb Pol yayinj goyen fulenja marte doyanj al kurun hitte tukunbe, “Pol koyare hi al gore hoy nirke kunj kenmekeb, ‘Al gare doyanj altinj kurun mere kura momonj irenj tiya. Ningeb doyanj altinj hitte tenj kwa,’ ninkeb gago ge hitte tawayhem,” inyinj. ¹⁹ Gwaha inkeb al gore Pol yayinj go haniinde tanarde hoyanj belen tukunbe, “Da mere momonj nirenj tenj ha?” inyinj. ²⁰ Irkeb al goreb, “Yuda marbe mere sege irde dufay unjkurenj po irhanj. Ningeb gise go goyenbe wanj, ‘Pol tubul tenj dunke tukunj da mata wor po tiyunj goyen Yuda marte doyanj mar diliinde huwarke gusunanj irtek,’ usi girnayinj geb. ²¹ Albe 40 gwahade gore dufay unjkurenj po irdeb, ‘Bingeya feya kutnja irtek geb. Pol maydeya gab mali titek,’

yeŋ biŋa tiyaŋ mar gobe bana kuŋ gere mere niŋ po doyaŋ hiniŋ yahaŋ. Niŋgeb Yuda marte doyaŋ mar beley gise waŋ mere girke goya yende mere ma nurayiŋ. Irde Pol wor tubul ma teŋ yunayiŋ,” inyiŋ. ²² Irkeb fulena marte doyaŋ al kuruŋ gore huwardeb, “Iginge kwa. Goyenpoga mere momoŋ nirha gabe al hoyoŋ kura momoŋ ma irayiŋ,” iney hayhay iryiŋ.

Fuleŋa marte doyaŋ al beley Pol Feliks hitte teŋ kerke kuriŋ

²³ Irdeb fulena mar 100 gote doyaŋ al irawa hoy yiryiŋ. Irke wakeb, “Derbe kuŋ fulena mar kahaŋde kuŋ fulena teŋ hanyen mar 200 ya hos hende mat fulena teŋ hanyen mar 70 goyen yinke gitik tinayiŋ. Irde hakde fulena teŋ hanyen mar 200 goyen manaŋ momoŋ yiriryen. Irdeb deŋ tumŋaŋ 9 kilok wawuŋbe Pol teŋ Sisaria taunde kurkunayiŋ. ²⁴ Irde Roma gabman al deŋem Feliks Yudia naŋa doyaŋ irde hi al hitte kunayiŋ. Moŋgo al beley maynak geb, Polbe hos hende teŋ kunayiŋ,” yinyiŋ. ²⁵ Irde asaŋ kura kaŋbe yunyiŋ. Merebe gahade:

²⁶ “Doyaŋ al Feliks, nebe Klodius Lisias beley asaŋ gago kayhem. Gebe doyaŋ alne wor po yeŋ nurd guney hime.

²⁷ Al gayenbe Yuda mar beley teŋ mayniŋ tiyaŋ. Gega Roma al yeke nurdeb fulena marne yade kuŋbe mayniŋ teŋ hinhan mar haniŋde mat teŋ wamiŋ. ²⁸ Irdeb da misiŋde wor po Yuda mar beley mere uliŋde irde asogo irde haŋ goyen gusuŋaŋ yirde bebak tiye yeŋbe Yuda marte doyaŋ mar gote gabure tukumiŋ.

²⁹ Goyenbe tenj fere tenj mayteke kami yan gega, miñ miñmonj gwaha irniñ tiyañ. Miñ yara kinmiñbe Yuda marte tikula niñ tenj mere uliñde irañ. ³⁰ Irdeb Pol goyen mayniñ yenj mere sege irañ goyen nurdeb balmiñ po tenj kermeke ge hitte kwa gago. Irdeb Yuda mar go da misiñde wor po al go mayniñ tiyañ goyen ge hitte kuñ gab delge mat tagalnayin yinmiñ,” gwahade kayyinj.

³¹ Be, fulenja mar go doyañ almiñ kurunj belen yinyinj goyen po gama irdeb wawunj go po Pol tenj Sisaria taunde kuniñ yenj kuñbe belen Antipatris taunde feramiñ. ³² Irde fay urkeb fulenja mar hos manañ gore po Pol tenj Sisaria taunde kwamiñ. Irkeb fulenja mar hoyañ kurunj gobe gor mat mulganj henj Yerusalem kwamiñ. ³³ Be, fulenja mar Pol tenj kwamiñ go Sisaria taunde forok yenjbe doyañ almiñ belen asañ kayyinj goyen Feliks Yudia nanja doyañ irde hiyen al go unenjbe Pol manañ yenj hitte mekeramiñ. ³⁴ Irkeb Feliks belen asañ go kapyañ henjbe Pol go, “Gebe dare niñ al?” inenj gusunañ iryinj. Irkeb Pol belen wol henjbe, “Nebe Silisia nanjare niñ al,” inyinj. ³⁵ Irkeb, “Iginge gar hayinj. Irkeb mere ulger irde hañ mar goyen wake gab tumnañ merere huwarnayinj. Irkeb meretiñ nurenj,” inyinj. Irdeb metenj marminj hulyañ yirdeb, “Tukuñ Herotyen ya kurunde gor kerde doyañ irde hinayinj,” yinyinj.

24

Polbe Feliks diliñde huwarde mere tiyyinj

¹ Be, wawuñ siptesoñon kamereb pris buda gote kurunmin Ananaiasya Yuda marte doyan mar parguwak kuraya Sisaria kuñ Roma gabman al Feliks hitte Pol go tagal unniñ yeñ kurkamiñ. Goyenterbe al kura denembe Tetulus goyen mel gore, “Neñ farañ durde merere harde mere tiyayin,” inkeb mel goya tumñan kwamiñ. Al gobe Roma gabmanyen mere sope ird ird mata goyen kenkela nurde hinhin al.

² Be, Pol niñ mere kerkeb wayyiniñ. Irkeb Tetulus belen huwarde gaha yiriniñ: “Feliks, gebe doyan al-niniñ wor po. Ge belen upsiniñ doyan dirde hike neñbe dahadem moñ, iginiñ po heñ wañ wañbe gago hite. Dufayge tinen wukken wor po goyen kerde doyan dirkeb naña kurun gayen bana niñ alya bereya tumñan iginiñ po hite. ³ Ge belen meten kurun gwahade ten hayen goyen goke neñ tumñan amanen wor po nurd gunen hityen. ⁴ Be, ne belen mere ugun po timeke piñen nurd nunak geb, bada hewen. Gega ok ninkeb mere muñ kura tiyen. ⁵ Be, al garebe megen kurun gayen kuñ wañ ten Yuda mar biñ yakamde dufaymin bulun yirde hinhin. Irkeb kanduk karkuwan karkuwan forok yeñ hinhan. Yeñbe al buda kura ‘Nasaret niñ mar’ yinen hanjen gote doyan al. ⁶⁻⁷ Irde al gare po Al Kurunyen ya balem bana goñ Yuda mar moñ al miñ hoyan mali ten hurkuñ. Al gare gwaha mat ya balem goyen bulun ireñ ten hikeb

tenj fere titinj.* ⁸ Niñgeb gigenj gab gusunjan irkeb yinjen mohonde kenkela tagalke gab gwahade niñgeb gago tagal unen merere kerhan yen bebak tiyayinj,” inyinj. ⁹ Be, Tetulus belen mere tenj pasi irkeb Yuda mar bana gonj hinhan gore, “Mere tiya gobe fudinde wor po!” yaminj.

¹⁰ Irkeb Feliks belen, “Pol, ge wor huwarde mere tiya,” inen haninj tunanj iryinj. Irkeb Pol go huwardeb Feliks goyen, “Gebe dama budamde wor po nanja kurun gayen doyanj irde hayen. Irde al ge hitte wan merere huwarke ge belen dufay kenkela wor po henya mereminj nurde sope irde hayen. Niñgeb nebe delger gago nigenj ge pet tenj mere tiyenj tihim. ¹¹ Be, nebe Al Kurunj dolonj ire yen Yerusalem taunde hurkuminde mat wan hanja gabe nanja fay 12 hihi. Niñgeb usi yen kenenbe gigenj ga al gusunjan yirke bebak girnayinj. ¹² Be, mere ulner irde hanj mar gayen Al Kurunjen ya balem bana al kuraya kadom mohonde ma tenj himeke nenanj. Irde Yerusalem taun banaya Yuda marte gabu yayanj wor al kura ma binj yakamde hinhem. Hubu wor po. ¹³ Niñgeb tagalde nunen hanj mar gayen daha matbe minj goke kura merere kirtinj yen momonj girke nurayinj? Hubu wor po! ¹⁴ Gega Nasaret

* **24:6-7:** Asanj hoyandebe gahade katinj hi: ⁶ Irde al gare po Al Kurunjen ya balem bana gonj Yuda mar monj al minj hoyanj tenj hurkenj tiyuj. Al gare gwaha mat ya go buluj irenj tenj hike fere titinj. Irde nende matare al gate mata buluj goke tagalde murungem untek nurtinj. ⁷ Gega Fuleja marte doyanj al Lisias belen wan mudunhem mudunhem dirde Pol gayen tenj kunj. ⁸ Irdeb, ‘Al gayen ulinje merem yanj irtek marbe Feliks hitte kunj momonj irnayinj,’ dinunj,” inyinj.

niņ al Yesu belej tikula kiryiņ goyen gama irde haņ mar al goyen kurabe gago ninen haņ gobe fudinde. Mel gabe Yesuyen tikula goyen fudinde moņ yeņ haņ. Gega nebe gwaha mat Al Kurun asininiņ yago belej doloņ irde hinhan Al goyen doloņ irde himyen. Irde Al Kurunyen mere Moseya Al Kurunyen mere basan marya belej asande katiņ kurun goyen fudinde yeņ nurde gama irde himyen. ¹⁵ Irde mel gare Al Kurun diliņde al huwakyabe huwak moņya goyen tumņan Al Kurun belej kamtiņde mat al yisan heke huwarnayiņ yitiņ goyen fudinde yeņ mata goke doyaņ heņ hanyen gwahade goyen po ne manan goke doyaņ heņ himyen. ¹⁶ Goke tenbe bener wukkeņ wor po nurdeya mata ten himeke alya Al Kurunya diliņdebe igiņ po neneņ hinayiņ yeņ kurut yeņ himyen.

¹⁷ “Nebe dama budam po Yerusalem tubul ten nana siņare po kuņ hinhem. Irdeb nere alya bereya Yuda mar kura det miņmoņ al bunineņ goyen faraņ yure yeņ hora ten gab Yerusalem mulgan heņ kumiņ. Be, goya goyenbe Al Kurun wor doloņ irde galak ire yeņ kumiņ. ¹⁸ Be, Al Kurunyen ya balemde heņ Yuda marte matare wukkeņ heņ heņ mata ten himekeyab mel gare waņ nenaņ. Goyenterbe al budamya ma hinhet. Balmiņ po heņ al kura ma buluņ irde hinhem. ¹⁹ Ya bana goņbe Esia naņare niņ Yuda mar kura hinhan gore nenaņ. Niņgeb mata buluņ kura timeke nenaņ kenem mel gore po ga delger huwarde ne niņ tagalke nurayiņ. ²⁰ Gega go mar gobe gar ma haņ geb, haņkapyā Yerusalem gor

Yuda marte doyan mar diliᅇde huwarmeke nere kanduk kura ulner hi keneᅇ gab mel gare igiᅇ momoᅇ girnayiᅇ. ²¹ Nebe Yerusalem gor merere huwardeb, ‘Al kamtiᅇbe sopte huwarnayiᅇ yitiᅇ mere gobe fudinde wor po yeᅇ nurde hime. Mere gwahade timiᅇ gokeb gago merere nerhaᅇ,’ yineᅇ kwep kwep yirmiᅇ. Niᅇgeb kanduknebe gogo po yeᅇ nurde hime,” inyiᅇ.

²² Be, Feliks gobe Yesu beler tikula kiryiᅇ goyer kenkela nurde hinhin. Niᅇgeb mere tiniᅇ tiyamiᅇ goyer utaᅇ yirdeb, “Fuleᅇa marte doyan al kurur Lisias beler wake meremiᅇ nurde gab kanduk gake dufay kura kereᅇ,” yineᅇ yakira tiyyiᅇ. ²³ Irdeb fuleᅇa mar 100 gote doyan al gor hinhin goyer, “Pol go tukur koyare kerde doyan irde hayiᅇ. Goyerpoga kurarebe igiᅇ tubul tike dufaymiᅇde wilwul teᅇ hiyeᅇ. Irkeb diᅇur yago kura waᅇ keneᅇ det kurur nurkeb farur urde hinayiᅇ,” inyiᅇ.

²⁴ Be, hitᅇer yara teᅇbe kur nalu kurarebe Feliksya berem Drusilaya wayaryum. Feliks berem Drusilabe Yuda mar bere. Be, waᅇ gor heᅇbe Feliks go Pol niᅇ keya hiriᅇ. Irkeb waᅇ Yesu Kristu niᅇ dufaymiᅇ taren irde yende mere gama ird ird mata niᅇ tagalke nurde hinhin. ²⁵ Be, Pol beler alya bereya Al Kurur diliᅇde daha mat huwak po hinayiᅇ, irde daha matbe uliᅇde po aman hetek mata fole irde hinayiᅇ, irde kame Al Kurur beler alya bereya igiᅇnya bulunya goyer pota yirde muruᅇgem yunyeᅇ goke tagalyiᅇ. Irkeb Feliks beler mere go nurdeb kafura hiriᅇ. Irdeb, “Ep niᅇ, mulᅇur hawa. Irde nalu kurare kura ge niᅇ

yemeke gab wake sopte mere ten hiren,” inyin.
²⁶ Be, Feliks go han kayen han kayen Pol hoy irde mere ten hinaryum gobe, “Gwaha timeke hora kura nunke gab koyare hi goyen tubul timeke kuyen,” yen dufay henbe gogo ten hinhin. Gega Pol gobe hora kura mun ma unyin.

²⁷ Be, Pol go gwahade po hike kun kun dama irawa hubu hirin. Irkeb Feliks go metenmin tubul ten kutek nalu hekeb al kura denem Porsius Festus belen gasunmin tirin. Gega Feliks gore Yuda mar belen amanen nurd nunnayin yenbe Pol koyare po tubul tenbe kurin.

25

Pol belen Sisar hitte kun kun nin Festus gusunan iryin

¹ Be, Festus belen Feliksyen gasun ten doyan al kurun henbe wawun karwo hubu hekeb Sisaria taunde mat Yerusalem taunde hurkurin. ² Goya goyenbe pris buda gote karkuwanminya Yuda marte doyan marya belen Festus hitte kun Pol mere ulinde iramin. ³ Irdeb, “Pol gobe belen doyan hen mayteke kamyen,” yen bikken mere sege irde ep iramin geb, Festus goyen, “Pol go dunke nen belen Yerusalem gar ten wan merere kertek geb, ingin aranen faran durayin we?” inamin. ⁴ Gega Festus belen wol henbe, “Polbe Sisaria taunde koyare hi. Nebe hen ga mon mulgan hen taunde gor kurken tihim. ⁵ Ningeb mata bulun kura tiyun nurde han kenem doyan martin kura gama nirde kunayin. Kun gor gab

tumnaŋ merere huwardebe da mata buluŋ tiyuŋ goyen tagalnayiŋ,” yinyiŋ.

⁶ Be, Festus go wawuŋ 8 wet kura ma 10 gwahade wet goyen mel goya Yerusalem gor heŋbe Sisaria taunde mulgaŋ heŋ kurkuriŋ. Kuŋ firyiŋ geb, fay urkeb Pol teŋ merere kere yeŋbe mere sope ird ird gasuŋde keperdebe metenŋ mariniŋ hulyaŋ yirde, “Kuŋ Pol teŋ wanaŋ,” yinyiŋ. ⁷ Irkeb Pol go merere huwarke Yuda mar Yerusalem mat katamiŋ gore kuŋbe kalyaŋ keramiŋ. Irdeb mere kanduk kurayen kurayen yeŋ uliŋde iramiŋ. Gega meremiŋ goyen bebakkeŋ kura ma tikeb Festus beleŋ fudinde yeŋ ma nuryiŋ. ⁸ Irkeb Pol wor yiŋgeŋ ge teŋbe, “Nebe Yuda marte tikula muŋ kura ma buluŋ irde himyen. Al Kuruyen ya balem wor goke buluŋ ma nurde himyen. Irde Roma niŋ doyaŋ al kuruŋ Sisaryen mere wor keŋkela po gama irde himyen,” inyiŋ.

⁹ Gega Festus go gwaha timekeb Yuda mar beleŋ biŋde igiŋ nurnayiŋ yeŋbe, “Igiŋ sopte mulgaŋ heŋ Yerusalem hurkuke gab merege gor wor nureŋ?” ineŋ gusuŋaŋ iryiŋ. ¹⁰ Irkeb wol heŋbe, “Nebe Yuda mar buluŋ kura ma yirmiŋ gobe keŋkela wor po nurde ha gogo. Niŋgeb gago Roma gabmanyen metenŋ al diliŋde kandukne sope ire yeŋ delger huwarhem. ¹¹ Goyenbe fudinde mata buluŋ kura timiŋ kenem igiŋ goke teŋ kameŋ. Gote merem moŋ. Gega mel Yuda mar gore mere ulner irde haŋ gayen fudinde moŋ kenem al kura beleŋ epte ma wor po mel gote haniŋde niryenŋ. Niŋgeb gar epte moŋ yeŋ nurde hime geb,

Rom kuŋ Sisar diliŋde gab huwarde mere tiyen yeŋ momoŋ girde hime” inyiŋ. ¹² Irkeb Festusya meten faran marmin yago yinŋen uliŋ Pol mere tiyyiŋ goke sege irdeya gab huwardebe, “Rom kuŋ Sisar diliŋde huwareŋ yaha geb, gwahade po tiyayiŋ,” inyiŋ.

Festus beŋ Pol niŋ Agripa inyiŋ

¹³ Be, naŋa fay karwo gwahade kamereb Yuda marte doyaŋ al kurun Agripaya haymin Bernaisiya beŋ, “Roma gabman al Festus goyen kuŋ kenye. Irkeb palap nirhar yeŋ nuryeŋ,” yeŋ Sisaria taunde kwaryum. ¹⁴ Be, Agripa go sobamde yara po gor hikeb Festus beŋ Pol niŋ momoŋ ire yeŋbe gaha inyiŋ: “Al kura Feliks beŋ ten koyare kerde tubul ten kuŋ gobe gar hi. ¹⁵ Yerusalem taunde hurkumiŋ. Irkeb pris buda gote karkuwanminya Yuda marte doyaŋ mar parguwakya beŋ ne hitte waŋbe al go merem yaŋ irde, ‘Ge beŋ gab al go ten merere kerde mata bulun tiyaŋ inayiŋ,’ yeŋ gusuŋaŋ niraŋ. ¹⁶ Irkeb ne beŋbe, ‘Roma gabmanyen matarebe al kura merere huwarkeb tagal unnayiŋ mar go manaŋ tumŋaŋ merere huwarnayiŋ. Irdeb al goreb mel gote diliŋde yinŋen ge ten mere tiyyeŋ. Gwaha ma tiyyeŋ gobe min minmoŋ epte ma tagal unnayiŋ mar goyen haniŋde mekertek,’ yinmin. ¹⁷ Gwaha yineŋbe tumŋaŋ waŋ gar firtiŋ geb, fay urkeb mere nurd nurd gayen araneŋ po nure yeŋ Pol go tawanaŋ yinmeke tawayaŋ. ¹⁸ Irkeb al buda merem yaŋ iraneŋ mar gore Pol uliŋde mata bulun wor po kura wet tiyuŋ geb, tagalniŋ tahaŋ yimiŋ gega, hubu. ¹⁹ Meremiŋ kura gobe asem

yagot mataya sabaya niŋ al goya kadam mohoŋde tiyaŋ. Irde meremiŋ kurabe Pol gore al kamtiŋ kura deŋembe Yesu goyen huwaryiŋ hi yekeb goke manaŋ kadam mohoŋde tiyaŋ. ²⁰ Irkeb gwaha mat kura meremiŋ goyen fudinde ma usi goyen bebak titek ma himiŋ. Niŋgeb bada heŋ Pol go, ‘Igiŋ Yerusalem taunde hurkuŋ gor sopte merere huwarayiŋ?’ ineŋ gusuŋaŋ irmiŋ. ²¹ Gega Pol beleŋ huwardebe, ‘Nebe Roma gabmanyen doyaŋ al kurun hitte kuŋ yeŋ diliŋ mat huwarde gab mere gayen tagaleŋ,’ ninuŋ. Gwaha ninkeb bada heŋ meten marne hulyaŋ yirdeb, ‘Belheŋ tukun koyare kerde doyaŋ irde hinayiŋ. Irkeb kame ga teŋ kermeke Sisar hitte kuyeŋ,’ yinmiŋ,” inyiŋ.

²² Be, Agripa beleŋ mere momoŋ go nurdeb, “Mere gayen nigeŋ wor po nuren yeŋ nurde hime,” inyiŋ. Irkeb Festus beleŋbe, “Gise ga meremiŋ nurayiŋ,” inyiŋ.

²³ Be, fay urkeb Polyen mere nurye yeŋbe Agripaya haymiŋ Bernaisiya goyen al beleŋ denen turun dirnayiŋ yeŋbe doyaŋ mar karkuwaŋde umŋa bidak teŋ mere sope ird ird gasuŋde kwaryum. Sisaria taunde niŋ fulena mar karkuwaŋya taun gote doyaŋ mar manaŋ yad kwaryum. Be, forok yeŋ gasuŋmiŋyaŋ keperde tukukeb Festus beleŋ meten marmiŋ yinke kuŋ Pol tawayamiŋ. ²⁴ Irkeb Festus beleŋ huwardeb, “Yuda marte doyaŋ al kurun Agripaya deŋ gar gabu irhaŋ mar ga nurnaŋ ko. Al ga keneŋ haŋ gabe Yuda mar kurun Sisaria taunde garya Yerusalem taunde haŋ mar tumŋaŋ gore, ‘Al gabe

daniñ ma tubul teñ dunke mayhet,' yeñ gusuñan nirde kwep kwep teñ epte ma tiyan. ²⁵ Gega mata buluñ bebakkeñ kura tiyuñ irke goke mayteke kamyen yeñ ma kinmiñ. Irde Pol goreb, 'Roma gabman doyañ al kurun hitte kuñ yeñ diliñde merere huwareñ,' yeñ gusuñan niruñ. Niñgeb goke teñbe al ga teñ kermeke Rom kuyeñ yeñ nurmiñ. ²⁶⁻²⁷ Goyenpoga miñ goke asañ kañ al ga teñ kermeke Roma gabman doyañ al kurun Sisar hitte kuyeñ yeñ ma nurde hime. Dufaynerbe al merere yirtin goyen miñ keñkela ma nurde mali po Sisar hitte yad yermeke kunayin gobe igin moñ yeñ nurde hime. Niñgeb goke teñbe diltin mat gago teñ wayhem. Irde Yuda marte doyañ al kurun Agripa, ge manañ gar ha. Niñgeb ge beleñ gusuñan irde mere miñ keneñ bebak teñ gab momoñ nirke asañde kayeñ," inyiñ.

26

Pol beleñ Agripa diliñde mere tiyyin

¹ Be, Festus beleñ gwaha yekeb Agripa gore, "Be, gigen ge kura tagalke nurniñ," inyiñ. Irkeb Pol go mere miñ ure yeñbe haniñ tuñan urde gaha inyiñ: ² "Yuda marte doyañ al kurun Agripa, Yuda mar beleñ mere ulner irde hañ kurun gayenbe fudinde moñ yeñ nigen ge teñ al hoyan diliñde moñ delger po huwarde tagaleñ tihim gake amañeñ nurhem. ³ Delger huwarhem gake amañeñ nurde hime ginhem gobe dahade moñ. Gebe Yuda marte mata keñkela wor po nurde hayen. Irde da misiñde wor po nindikeñ Yuda mar uliñ kadom mohoñde teñ hityen goyen wor

kenkela nurde hayen. Niŋgeb mere tiyeŋ tihim gayen piŋeŋ ma nurayiŋ.

⁴ “Yuda mar kurunŋ gobe ne damde kawan himiriŋ, irde bikkeŋ naŋaner mat waŋ Yerusalem gor keperde kurunŋ henyabe dahade hinhem goyen kenkela wor po nurde nuneŋ haŋ. ⁵ Niŋgeb mel gobe ne hakot al foŋeŋ hinhemya Farisi mar al heŋbe daha teŋ hinhem goyen nurde pasi geb, momoŋ girniŋ yeŋbe igiŋ momoŋ girnayiŋ. Farisi marbe Yuda marte tikula tareŋ wor po tanarde gama irde haŋyen. ⁶ Be, haŋka merere nerhaŋ gabe Al Kurunŋ beleŋ bikkeŋ asininiŋ yago hitte mata kura forok yiyyeŋ yeŋ biŋa tiyyiŋ goyen ne manaŋ goke doyaŋ irde hime niŋgeb, gago merere huwarhem. ⁷ Al Kurunŋ beleŋ biŋa tiyyiŋ gote igineŋbe Yuda mar kurunŋ gayen wawuŋya naŋkahalya hugiŋeŋ Al Kurunŋ doloŋ irde heŋya kentek yeŋ doyaŋ heŋ haŋyen. Gega, doyaŋ al kurunŋ Agripa, Al Kurunŋ beleŋ biŋa tiyyiŋ goyen neŋ tumŋaŋ doyaŋ irde hityen gote igineŋ forok yiriŋ goyen goke tagalde himekeb gago Yuda mar beleŋ merem yaŋ nirde haŋ. Igiŋeŋbe Yesu kamiŋde mat huwariŋ gogo. ⁸ Niŋgeb nebe fudinde wor po Al Kurunŋ beleŋ al kamtiŋbe sopte yisaŋ hiyyeŋ yeŋ nurde hime. Munaŋ deŋ kurunŋ gar gabu irhaŋ mar gabe daniŋ usi yeŋ nurde haŋ?

⁹ “Bikkeŋbe ne wor kamiŋde mat sopte huwariŋ yeŋ hinhan al Nasaret niŋ Yesu goke igiŋ ma nurdeb fudinde wor po asogo ireŋ yeŋ nurde hinhem. ¹⁰ Irdeb goyen po gama irdeb kuŋ pris buda gote karkuwaŋmiŋ momoŋ yirmeke ok

ninkeb kuŋ Yesu niŋ dufaymiŋ saŋiŋ irtiŋ mar goyen budam yade koyare yerde hinhem. Irde gasa yirteke kamnaŋ yeke ne manan, ‘Igiŋ gwaha yirnayiŋ,’ yemeke gasa yirde hinhan. ¹¹ Irde hugiŋeŋ Yuda marte gabu yayan kuŋ Yesu niŋ dufaymiŋ tareŋ irtiŋ mar go yeneŋbe bulun bulun yirde gasa yirde hinhem. Irde, ‘Yesu nanyaŋ irde harhoktiŋ unnayiŋ,’ yineŋ kanduk karkuwan karkuwan yuneŋ hinhem. Nebe go mar goke bene ar wor po yeŋ hinhin geb, yeŋ ge nankeŋe yeŋ taun hoyanđe nanɔ gisaw wor kuŋ hinhem.

¹² “Mata gwahade kurun goyen teŋ kuŋ henya nalu kurarebe pris buda gote karkuwanmiŋ beleŋ igiŋ ninkeb Yesu niŋ dufaymiŋ tareŋ irtiŋ mar fere yire yeŋ Yerusalem taunde mat Damaskus taunde kumiriŋ. ¹³ O, Agripa, kuŋ henyaŋe nanɔ baŋkahal heke hulsi saŋiŋ kura nanɔ folek kurun gore nankeŋde mat neyabe al neya kuŋ hinhet mar hitte temeyke kinmiriŋ. ¹⁴ Be, hulsi kurun gore gwaha dirke neŋ tumnan megen dakten mudunyiŋ. Irke al melak kura Yuda marte mere mat, ‘Sol, Sol, daniŋ bulun bulun nirde ha? Asogo nirde fuleŋa nirde ha gobe gigeŋ manan bulun irde ha geb,’ ninyiŋ. ¹⁵ Irkeb ne beleŋ wol henbe Doyan Al Kurun goyen, ‘Gebe ganun?’ inmekeb Doyan Al Kurun beleŋ gaha ninyiŋ: ‘Nebe Yesu. Ge beleŋ mununeŋ bulun bulun nirde ha al goyen. ¹⁶ Niŋgeb huwara. Haŋkabe meten alne gire yeŋbe gago delger hihim. Niŋgeb delger nenha gaya det budam kame gikala girde heŋ goyen tumnan kuŋ alya bereya hitte tagalde kuŋ hayiŋ. ¹⁷⁻¹⁸ Nigeŋ po gad germeke Yuda marya

al miñ hoyanya hañ bana kwayiñ. Kuñ ne niñ tagalkeb biñ bak yenayiñ. Irkeb Satanyen tareñ bana hañ go tubul teñ Al Kurun hitte waniñ yenbe ne niñ dufaymiñ tareñ irnayiñ. Irkeb Al Kurun beñ mata bulunmiñ halde yunkeb Al Kurun dirneñ weñ henayiñ. Meten go teñ hikeyabe Yuda marya al miñ hoyanya beñ muguney hinayiñ gega, ne beñ doyan girde heñ,' ninyiñ.

¹⁹ “Niñgeb Yuda marte doyan al kurun Agripa, nebe yuwarwarte nanñinde mat Yesu delner forok yeñ mere niryiñ goyen pel ma irde gama irmiriñ. ²⁰ Nebe meremiñ po gama irdeb Damaskus taunde niñ Yuda mar hitte wa Al Kurunyen mere tagalmiriñ. Irdeb Yerusalem taunde niñya Yudia nanare niñya al hitte kuñ Al Kurunyen mere tagalde hinhem. Irde al miñ hoyan Yuda mar moñ hitte wor Al Kurunyen mere tagalde kuñ hinhem. Gwahade tagalde kuñ henyabe, ‘Mata bulunñiñ yubul teñ Al Kurun niñ bitin mulgan henayiñ. Gwaha teñbe Al Kurun diliñde mata igiñ po teñ hinayiñ. Irkeb al hoyan beñ denenbe fudinde Al Kurun niñ biñ mulgan hañ yeñ dennayiñ,’ yeñ saba yirde hinhem. ²¹ Ne gwaha teñ kuñ himekeb Yuda mar beñ goke igiñ ma nurde Al Kurunyen ya balem bana goñ nade mununniñ tiyamiñ. ²² Gega Al Kurun beñ faran nurkeb wañ wañ hanka gago delger huwarde al denem yanya al maliya hitte Yesu niñ tagalde hime. Nebe Moseya Al Kurunyen mere basan marya beñ kame mata kura forok yiyyey yitiñ goyen go po tagalde hime. Hoyan niñ ma tagalde hime. ²³ Mata kame forok yiyyey yeñ

tagalamiŋ gobe Mesaia niŋ tagalamiŋ. ‘Mesaiabe uliŋ misiŋ kurun kateŋ gab kamyen. Irde gor mat huwaryen. Mata gobe tiŋen wor po. Al kura gwaha ma titiŋ. Yenbe Yuda marya Yuda mar moŋ kidoma bana heŋ mata bulun ten haŋ marya goyen biŋ bak yenayiŋ yen gogo kamtiŋde mat huwaryen,’ yamiŋ,” inyiŋ.

Pol beŋ Agripa goyen Yesu gama irayiŋ inyiŋ

²⁴ Be, Pol go yiŋen ge ten hako tagalde hikeyabe Festus beŋ merem waldebe, “Pol, gebe kukuwa haha! Dufay karkuwan karkuwan yawarariŋ gore girke kukuwa heŋ ha gogo,” inen kwep iryiŋ. ²⁵ Gega Pol beŋ wol heŋbe, “Doyan al Festus, mere gabe fudinde yen hime. Kukuwa henya ma yen hime. ²⁶ Yesu uliŋde mata forok yiriŋ gobe balmiŋ ma forok yiriŋ geb, Agripabe mata goyen keŋkela nurde hi. Niŋgeb mere ten hime gab yenbe goke yen hi yen nurde hi. Goke tenbe nebe kafura ma heŋ yen diliŋ mat igiŋ mere ireŋ,” inyiŋ. ²⁷ Irdeb Agripa kenenbe, “Ge gayen Al Kurunyen mere basan mar beŋ mere tagalde hinhan goyenbe fudinde yen nurde ha? Ne benerbe fudinde yen nurde ha yen geneŋ hime,” inyiŋ. ²⁸ Gwaha inke Agripa beŋ wol heŋbe, “Gayamuŋ gayen po parsay irmekeb Kristen al hiwi yen nurde gago kurut nirde ha?” inyiŋ. ²⁹ Irkeb wol heŋbe, “Nalu ulyanđe ma dolfonde goke ma nurde hime. Gega haŋka geya al buda kurun gar heŋ merene nurhan gayen tumnan ne himiŋ gwahade po den wor Yesu niŋ dufaytiŋ saniŋ yirniyiŋ yen Al Kurun gusuŋan irde hime.

Gega gama nirde koyare hinan yey ma dinen hime,” inyin.

³⁰ Irkeb Yuda marte doyan al kurun Agripaya haymin Bernaisiya Roma gabman doyan al Festusyabe al buda kurun gor hinhan goya tumnan bur yinin yey huwamin. ³¹ Irdeb mere sope ird ird gasun go tubul ten kun henya yingen ulin mere tenbe, “Al gabe mata bulun kura ma tiyun gega, da misinde wor po ten koyare kerde mayteke kami yey kurut yey han?” yamin. ³² Be, Agripa belen Festus go, “Al gabe kun Sisar dilinde huwarde ga mere tiyen ma yiyun manhan han ka gayenbe okohom po tubul titeke kuwon,” inyin.

27

Rom kun kun nin Festus belen Pol go hakwa hende kiryin

¹ Be, Festus gore Pol go Rom taunde ten kermeke kuyen yey nurde al kura denembe Yulius haninde kiryin. Al gobe “Sisaryen Fuleña Mar” yinen hanjen gote fuleña mar 100 doyan yirde hinhin. Goyenterbe al hoyan kura koyare hinhan mar go manan al gote haninde yiryin. Irke Yulius belen mel go yade hakwa ten Itali nanare kunin tikeb nen manan Pol go gama irde tumnan kunin titirin. ² Be, Sisaria taun nen hinhetde gorbe hakwa kura Esia nanare nin taun Adramitium mat wayyin goyen kintirin. Irdeb hakwa go sopte mulgan hen Esia nanare nin taun makan sinayan kwen ten hike nurtirin. Irde go hende kutirin. Hakwa hende gorbe Masedonia nanare nin taun Tesalonaika nin al Aristakusya tumnan kutirin.

³ Be, kuñ fay urkeb Saidon taunde forok yitirin. Gorbe Yulius belen Pol igin igin ire yenbe, “Kuñ dige yago kura yena. Irkeb det kuran nurde ha goyen faran gurnayin,” inyin.

⁴ Be, taun go tubul ten kutekeb meñe kurun wor po huwarke kuñ kuñninin metenen diryin. Irkeb Saiprus motmotbe hanninin tapa belen pel irde ketal urde kutirin. ⁵ Irde Saiprus motmot murun fafor tenbe Silisiaya Pamfilia nanare nin makan ala goyen kahal po paten kuñ Lisia nanare nin taun Maira forok yitirin. ⁶ Gorbe Yulius belen Isip nanare nin taun Aleksandria nin hakwa kura goyen Itali nanare kwen ten hike kinyin. Irdeb hakwa go hende kunan dinkeb go hende hurkutirin.

⁷ Be, kutirin gega meñe kurun huwarkeb wawun budam makande hinhet. Irde bekkende kuñ kuñbe Nidus taunde forok yitirin. Irde gor mat Rom po kuniñ yitirin gega, meñe mun kura falmuk ma hirin. Irkeb bada hen hakwa go bul irde Krit motmot murun denembe Salmone goyen hanninin yase belen pel irde motmot go ketal urde kutirin. ⁸ Be, kutirin goyenbe meñe kurun po geb, hakwa bemel kuñ kuñ goyen metenen diryin. Irkeb makan feren gama irtinen ten kuñ tiyun kura denembe “Makan Kamtinde” gor forok yitirin. Tiyun gobe Lasea taun bindere hinhin.

⁹ Be, belen kuñ hinhetya goyenbe nana fay budam wor po yubul titirin. Irde gonbe Yuda marte Binje Kutna Nalu hubu hen meñe bulun kurun forok yeke makande epte ma kutek nalu hewen tike ¹⁰ Pol belen Yuliusya hakware nin

metenj marya goyen, “Mel, kuniñ yeke kuniñ tihit go belenbe kanduk kurunj kenteke geb. Hakwaya samunya yemeyde nindikenj mananj bulunj hetek geb,” yinenj hayhay yiryinj. ¹¹⁻¹² Gega al budam belenj, “Garbe meñe nalure hakwa hitek monj geb, Finiks taunde kuniñ. Gorbe naña bulunj heke hakwa hitek gasunj iginj geb, taunde gor henj meñe goyen doyanj irde hiteke wanj fole tike gab kutek,” yaminj. Finiks taun gobe Krit motmot goyen murunj, naña kurkur belenj mat hinhin. Be, al budam gwaha yekebe Yulius belenj Polyen mere gama irtinjenbe hakware ninj metenj marte doyanj alya hakwa gote minj al gote mere po fudinde yenj nuryinj.

Karam meñe kafuram wor po huwaryinj

¹³ Be, kuniñ titekeyabe meñe iginj mat wake kenenbe mel gore, “Meñe neñ yitinj go gago forok yihi,” yaminj. Irde anja tulunj tike hurkukeb hakwa go tenj Krit motmot goyen makanj ferenj gama irtinjen tenj kwaminj. ¹⁴ Gega henj ga monj yuwara meñe kurunj Krit motmot dugure mat katyinj. ¹⁵ Irke Finiks taunde kuniñ yenj tunanj urtirinj gega, meñe go kurunj wor po geb kutek monj hekeb tubul tike yenj belenj po hakwa go tenj makanj alare tukurinj. ¹⁶ Irde meñe belenj dukukeb motmot dirnenj kura denembe Kauda goyen ketal urde kutirinj. Goyenterbe hakwa dirnenj kura hakwa kurunj neñ kunj hinhetde gor feñ titinj tulunj tenj hinhin goyen bulunj hiyyenkek yenbe tenj hakwa kurunj hende kirninj yenj hakware ninj metenj mar belenj kurut yaminj. Metenjenj yiryinj gega, kamebe tenj keraminj. ¹⁷ Irdeb

hakwa kurun go hende kun hinhet goyen galan yiyyenkek yenbe kan taren belen po yade hakwa yufuk bana yerke kurkukeb hakwa goyen he fere titin yara irde taren iramin. Irde Libia nanare nin makan sinare Sairtis inen hanyende gor ka kininin karkuwan gor hanyen geb, hakwa go kun gor nek yiyyen yen kafura hamin. Irdeb gwaha irteke hakwa ga bekennde kwi yen anga tubul tike kurkurin. Goyenbe meje belen ten kun hinhin po.

¹⁸ Be, karam meje kafuram kurun goyen mun kura ma falmuk hiri. Irkeb makan duba karkuwan karkuwan gore wan hakwa go karim ma irde hinhan. Irkeb kun fay urkeb hakwa goyen mun kura hipirken hiwi yenbe hakware nin meten mar belen tiyun kurar nin det goyen kura yade makende yemeyamin. ¹⁹ Be, sopte po fay urkeb meten mar belen hakware nin meten ten ten det kura yade yemeyamin. ²⁰ Be, nalu sobamde po makende hinhet goya goyenbe menyaya makanya goyen kura mun falmuk ma po haryum. Bulun wor po hekeb nanaya dinambeya mun kura ma yintirin. Irdeb, “Go ma hitek. Makende po kamnin tihit,” yen nurtirin.

²¹ Be, al buda kurun go dula ma tike kun kun nalu ulyande hiri. Irkeb Pol belen huwarde gaha yinyin: “Mel, mere dirmin goyen nurdeb Krit motmot ma tubul titin manhan kanduk kurun gahade ma kentewon. Irde hakware nin detya samunya kurun gayen ma yemeywon. ²² Goyenpoga nen al buda kurun gayenbe kura ma po kamtek. Hakwa po ga bulun hiyyen. Ningeb kafura ma yo. Taren hen hinayin. ²³ Nebe

Al Kurunyen meten al. Yen ge po meten ten hime. Ningeb hanƙa wawunbe yende miyon belen wanbe, ²⁴ ‘Pol kafura ma yo. Gebe Sisar dilinde huwarde mere tiyayin geb. Irde Al Kurun belen geya hakwa hende kun han mar buninen nurd yunen faran yuryen geb go ma kamnayin,’ nina. ²⁵ Ningeb nebe Al Kurun belen nina gwahade po forok yiyyen yen heken nurde hime. Ningeb goke tenbe gago kafura ma hen sanin po hinayin dinhem. ²⁶ Goyenbe hakwa gabe kun motmotde kura gor hen gab bulun hiyyen geb, goyen nurde ga hinayin,” yinyin.

²⁷ Be, hakwa ten Krit motmotde nin taun kura denembe “Makan Kamtinde,” go tubul ten wan wan wawun 14 hiri. Goyenterbe mene belen po dade makan kura denem Mediterenian Makan belen gon dukurin. Irkeb wawun binde gwahadebe hakware nin meten mar goreb megen kura bindere hi yara nuramin. ²⁸ Gwahade nurdeb kan yulan kura tenbe det kanduk ten kan murun kurhan fen tenbe ten kerke makan bana kurkurin. Gwahade irde makan go dukunmin tunan tiyaminbe 40 mita kenamin. Be, mun kura kutnen tenbe sopte po tunan tiyamin. Irde goyareb dukunminbe 30 mita po kenamin. ²⁹ Gwahade kenenbe mongo ugun po kutekeb hakwa ga hora hende hurkun galan yiyyen yenbe anga sipte yade hakwa kimyan belen mat yemeyamin. Gwaha irde gor henbe aranen fay urwon yen nurde hinhan.

³⁰ Goya goyenbe hakware nin meten mar kurabe busaharnin yen anga hoyan kura sopte

murun belen mat yemeyhet usi tenbe kun hakwa dirnen biknen isan hen hakwa kurun hende keramin goyen ten kerke makende kurkun hinhin. ³¹ Irkeb Pol belen go yenenbe fulena marya doyan almin Yuliusya hitte kunbe, “Meten mar gayen hakwa ga tubul ten busaharnayinbe den kurun gayen epte ma hinayin,” yinyin. ³² Gwaha yinkeb fulena mar goreb kun hakwa dirnen giti irtin kan go walke makan alare katkeb tubul tiyamin.

³³ Be, nanan minge hekeb Pol belen mel go yenenbe, “Nanan fay 14 bana gayen kafura wor po hen binde kura ma nan. ³⁴ Goyenbe kuratin mun kura ma kamyen. Ningeb dufaytin taren irde binde nene taren po hen hinayin,” yen kimnen yiryin. ³⁵ Be, Pol go gwaha yinenbe kun beret tenbe al buda kurun go dilinde beret goke Al Kurun turun irde ubala ten nirin. ³⁶ Irkeb al buda go Pol belen gwaha yinkeb binde igin nurde sanin henbe binde namin. ³⁷ Be, hakwa hende gorbe al 276 hinhet. ³⁸ Be, binde kenkela wor po hen namin. Irde ep irhet yen nurdeb binde kura hinhan gobe hakwa mun kura hipirken hiwi yenbe yade makende yemeyamin.

³⁹ Be, nanan fay urkeb hakware nin meten mar belen megen kura kenamin. Goyenpoga nanan gor hihit yen bebak ma tiyamin. Irde hakwa kun gor hen hen gasun kura sawsawa minyan goyen kenenbe igin wet gor kunin yen nuramin. ⁴⁰ Irdeb al kurabe kun anan gote kan walde pasi yirkeb al kurabe kun hakwa tigiri ten ten det kimyan belen hiyen gote kan goyen yugu tiyamin.

Munan kura marbe hakwa hende nin sel goyen isan hamin. Irkeb hakwa gobe makan sinare sawsawa minyannde kurin. ⁴¹ Gega kun henyabe katul kurun hende hurkun nek yen dapsan hirin. Irkeb makan duba karkuwan wan kimyan belen mayke maykeb gilgalan iryin.

⁴² Gwaha tike kenenbe fulen mar belen al koyare nin yade kun hinhan goyen galun ten kun huginen busaharnak yen bidilare gasa yirnin tiyamin. ⁴³ Gega doyan almin Yulius belen Pol nin nurdeb fulen marmun utan yiryin. Irdeb, “Fe galun ten ten nurde han mar go wa solok yen galun ten sinare kunayin. ⁴⁴ Irde fe galun ten ten ma nurde han marbe hakwa galan yitinde nin he parwek kura ma det potpot titek kura yanarde galun ten kunayin,” yinyin. Be, gwaha mat nen tumnan ala igin po sinare forok yitirin. Al kura ma kamamin.

28

Malta motmot

¹ Be, nen tumnan sinare hetekeb motmotde gor nin mar belen, “Motmot gabe Malta,” dinamin. ² Gorbe kigarin kurun katke nana menjek wor po hirin geb, mel gore gargar wor po dirde dukun kak kawalde dunamin. ³ Irkeb Pol belen kun he fere kura tawan kak hende kiryin. Goya goyenbe kunere duwi kura he fere bana gon hin hin geb, kak belen uka irke busaharde katenbe Pol haniinde isen binun tiyyin. ⁴ Irkeb motmotde gor nin al belen kenenbe yingen ulin mere tenbe, “Fudinde wor po, al gabe al gasa yirke kamde

kamde al. Niŋgeb yeŋbe makaŋde po kamwon gega, go ma kamkeb al banare hi goreb mata buluŋminde muruŋgembe kunere beleŋ isa gago,” yamiŋ. ⁵ Gega Pol go uliŋde misiŋ kura ma nuryiŋ. Irde kunere go taraŋ teŋ kak alare timiyyiŋ. ⁶ Goyenbe mel gore Polbe haniŋya uliŋya pompom wet yiniŋ tahaŋ ma, huwarde hire mat diliŋ girgir irke takteŋ mayke bemel po kameŋ tiya yeŋ nuramiŋ. Irde Pol go daha kura tiyeŋ tiya yeŋ keŋkela po keneŋ hinhan. Gega daha kura ma tike keneŋbe, “Neŋbe usi tihit. Al gabe unŋura geb, gago ma kama,” yamiŋ.

⁷ Be, Malta motmotde niŋ doyaŋ al kura deŋembe Publius goyen gor hinhin. Yeŋbe neŋ hinhet bindere hinhin, irde megeŋmiŋbe kurun wor po. Be, yeŋ beleŋ neŋ hoy dirke kuŋ yeŋya wawuŋ karwo gor firtiriŋ. Gor hitekeb yeŋ beleŋ gargar dirde igiŋ igiŋ wor po dirke amaneŋ nurde hinhet. ⁸ Be, gor hinhetya goyenbe Publius naniŋbe aygaŋya kasorsorya buluŋ wor po irkeb gasuŋde po firtiŋde hinhin. Irkeb Pol go mere momoŋmiŋ nurdeb kuŋ keneŋ haniŋ yerde uneŋ Al Kurun gusuŋaŋ irkeb igiŋ hiriŋ. ⁹ Be, goyen keneŋbe garbam mar kurun motmot goyenter niŋ goyen pasi po Pol hitte wayamiŋ. Irkeb yeŋ beleŋ garbam mar goke Al Kurun gusuŋaŋ irkeb igiŋ hamiŋ. ¹⁰⁻¹¹ Irkeb go keneŋbe palap wor po dirde mata igiŋ igiŋ po diramiŋ.

Pol go Rom taunde forok yiriŋ

Be, Malta motmotde gorbe gagasi karwo hinhet. Go kamereb hakwa kura meŋe kurun nalu heke gor heŋ heŋbe nalu go hubu heke kweŋ

teñ hinhin goyen kenenbe hakwa go hende kutek yitirin. Irkeb al buda Malta motmotde niñ gore hakwa hende kuñ henyabe det goke nurnayin yenbe det galak dirde yingen po yukun hakwa binde yerde dunamin. Hakwa gobe Isip nanare niñ taun Aleksandria niñ. Hakwa go murundebe Grik marte tikula al irawa denembe Kestaya Poluksyat tonen yirtin.

¹² Be, Malta motmotde matbe kuñ kuñ Sisili motmot kurunde gor niñ taun kura denembe Sairakus forok yitirin. Irde nana fay karwo gor hinhet. ¹³ Irde gor matbe kuñ Itali nanare niñ taun kura Regium forok yitirin. Be, firtirin fay urkeb taun go tubul ten kutirin. Kuñ henyabe mene igin mat huwarke igin po kutirin. Be, wawun hen kuñ sopte fay urkeb Itali nanare niñ taun hoyan kura Puteoli forok yitirin. ¹⁴ Gorbe Yesu niñ dufaymin taren irtin mar yupi titirin. Irkeb yen belen pere dirde gargar diramin. Be, mel goyabe meten nana unken gor hinhet. Go kamereb Rom kuniñ yen taun go tubul ten kahanininde kutirin. ¹⁵ Irkeb al buda kura Yesu niñ dufaymin taren irtin mar Rom taunde gor niñ belen nende mere momon nuramin. Irdeb wan nen ge doyan hiniñ yen gasun kura “Apius Maket” inen hanyende gor doyan dirde hinhan. Munan al buda kurabe taun kura denembe “Ferd ferd Gasun Karwo” inen hanyende gor wan doyan dirde hinhan. Be, kuñ gor forok yen Pol belen al buda go yenen binde igin nurde sanin hen Al Kurun turun iryin.

¹⁶ Be, kuñ Rom taunde forok yitirin. Irkeb

Roma gabman belen Pol go koyare ma kerdebe ya kura unamin. Irke gor henbe gagasim gagasim ya go damu tej hinhin. Goyenpoga yen unkuwen po ma hinhin. Fuleña al unkuwen kura belen doyan irde hinhin.

¹⁷ Be, Pol go kuñ nana fay karwo kamereb Yuda marte doyan mar gor hinhan goke keya hirin. Be, wan gabu irkeb gaha yinyin: “Kadne yago, nebe nende alya bereya bulun ma yirmin. Irde asininin yagot mata kura ma pel irmin. Gega Yuda mar Yerusalem han gore merem yan nirde Roma mar haninde neran. ¹⁸ Irkeb Roma mar belen gusunan niran gega, min goke kura mununke kamtek mon geb, nade sinare nirnin tiyan. ¹⁹ Irkeb Yuda mar goreb goke igin ma nuran. Irkeb nebe gwaha kura titek mon nurdeb, ‘Sisar dilinde ga mere tiyen,’ yen Roma al go inmin. Gega nere al goyen tagal yune yen ma gwaha inmin. ²⁰ Ningeb nigen goyen momon dire yenbe gago den ge keya hihim. Yuda mar kurun gare al kame wan doyan diryen yen doyan irde hanjen al goke tagalde himekeb gago koyare neran,” yinyin.

²¹ Irkeb mel gore wol henbe, “Yuda mar Yudia nanare han gore kura asan kan ge nin momon dirdem mon. Irde nende al kura Yudia nanare mat wayan gore kura ulger mere bulunen kura ma tagalke nurnin. ²² Gega al budam hike kwa kurun gabe den Yesu gama irde han mar goke tagalde dunen han. Ningeb goke momon dirke nurnin yen nurde hite,” inamin.

²³ Be, gwaha inenbe sopte gabu irnin yen nalu tiyamin. Be, nalu tiyaminde gor hekeb Pol hin-

hinde gor al karim ma gabu iramiņ. Haņkapyā gabu iramiņ gwahade moņ. Irkeb wampot mat Al Kurun belen dirneņ weņ doyaņ yird yird mata goke saba yirke kuņ kuņ wawuņ hiriņ. Irde Yesu niņ momoņ yirmeke bebak tinaņ yeņbe Mose belen tikula asaņde kayyiņ goya Al Kurunyen mere basaņ mar belen asaņde katiņde gor mat mere gote miņ tagalyiņ. ²⁴ Irkeb kura marbe Pol belen mere tiyyiņ gobe fudinde yekeb kurabe usi yeņ nuramiņ. ²⁵ Mel gore gwaha yeke Pol belen yeneņbe mere funaņ gaha yinyiņ: “Holi Spirit belen mere fudinde kura asetin yago nurnaņ yeņ Al Kurunyen mere basaņ al Aisaia momoņ irkeb gahade kayyiņ:

²⁶ ‘Al Kurun belen Israel mar hitte kuņ gaha yinayiņ nina:

Denbe merene nurde hinayiņ, irde keneņ hinayiņ gega, bebak ma po teņ hinayiņ.

²⁷ Fudinde wor po, mel gate biņbe saņiņ wor po.

Kirminbe migisuņ yurtiņ. Irde diliņbe mala titiņ.

Moņ manhan kirmiņde nurde, diliņde keneņbe biņde bebak wor po teņ ne hitte mulgaņ heņ wake sope yirmewoņ,’ yitiņ hi. *Aisaia 6:9-10*

²⁸⁻²⁹ Niņgeb yiriņ gwahade po deņ Yuda marbe Al Kurunyen mere pel irde haņyen geb, Al Kurun belen alya bereya yumulgaņ teņ teņ gote mere igiņ goyen al miņ hoyaņ Yuda mar moņ hitte teņ kerke kukeb yeņ belen gab nurde gama irde

hinayin goyen momon dirde hime gago,” yinyin.*

³⁰ Be, Pol gobe ya kura Roma gabman belen unke gor henbe gagasim gagasim damu ten hinhin. Gorbe dama iraw hikeyabe al belen kinnin yen wan hinhan. Irkeb yen belen, “Iginge, wan nenen hinayin,” yinen hinhin. ³¹ Irkeb kafuramon Al Kurun belen dirnen wen doyan yird yird mataya Doyan Al Kurun Yesu Kristu nin tagalde saba yirde hinhin. Irkeb meten ten hinhin goyen al kura belen utan irtek ma hiri.

* **28:28-29:** Asan hoyandeb gahade hi: 29 Irkeb al buda kurun gob bur yen kun henyabe Pol mere tiyyin goke yingen ulin kadom mohaṅde tiyamin.

**Al Kurunyen Mere Igin
The New Testament in the Gwahatike Language of
Papua New Guinea
Nupela Testamen long tok ples Gwahatike long
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

PDF generated using Haiola and XeLaTeX on 11 Nov 2022 from source files dated 9 Oct 2020

dbba218f-41f3-5f08-b0b6-2a7c919093ab